



~~$\frac{b^2}{a}$~~

$$b^2 a^2 = (a^2)^2 = a^4 b$$

$$\frac{b^2 a^2}{a^2 b}$$








WRATISLAVIÆ sumptibus IESAIÆ FELLGIBELI Bibliop. 1705

J. Sandrart sculp.



Handwritten scribbles and initials, including 'A.A.' and 'S.L.'



42.

Handwritten notes at the bottom of the page, including 'Mey...' and 'M...'.

Pol 8. II. 2



JOANNIS OWENI
EPIGRAM-
MATA.



VRATISLAVIÆ,
APUD MICHAEL. HUBERTUM.


1742.

JOHANNIS OWENI

EPIGRAMMATA



2512



WID. MICHAEL. BIBLIOTHECA. MUSEI. HISTORIC. NAT. TORONIAE.





Ad Lectorem.

Clericus es? legito hæc; Laicus? legito ista li-
benter:

Crede mihi, inuenies hic quod uterque uoles.

D. Du. Tr. Med.

2 Ad D. Joannem Audoënum de libro.

Quominus edatur, nihil impedit: aut ego carmen
Non sapio, aut ætas, si sapit, ista leget.

Ingenii turere tui tantum esse periculum;

Judicii tamen est alea jacta mei.

Joann. Hosknius, J. Conf.

*3 Ad Jo. Audoënum de tribus Epigrammatum
libellis.*

Quicquid habent Veteres Venerum, Charitesque
leporum;

Quicquid Musæ joci, quicquid Apollo salis;

Quodcumque est Sophiæ, quodcumque est artis ubique,

Ingenii aut Genii quicquid ubique uiget;

Omne id, Oëne, tuis, reor, infedisse libellis,

Hæc quando nobis lemmata dia dabis.

Joan. Bowman, Theol.

4 Ad Joannem Audoënum.

Quæ, rogas, nobis, Odoëne, Epigramma pro-
betur?

Dicam: Quæle tuum parturit ingenium;

Quod breue, quod castum, doctum, celere atque po-
litum,

Quodque habet multos, & sine dente, sales.

A 3

Hoc

Hoc tua Musa dabit, Genius promittit, & ultra
Confirmat Dominæ mentio prima tuæ.

Tuus Guilielmus Iames Theol.

5

In laudem Autoris.

Quod fuit, est, & semper erit solemne Poëtis,
Carpimur in libris, fœmina virque, tuis:
Judice me, tamen hæc Epigrammata falsa merentur,
Laudet ut ingenium vir mulierque tuum.

Iana Audoëna Oxoniensis.

Ad Lectorem.

6 *In laudem Autoris: cujus Epigrammata in-
tra mensem secundo prodierunt
(1606.)*

Scripserunt Latii, scripsere Epigrammata Graji:
Quos inter vitam Nominis unus habet.
Excipite hunc, omnes superavit Oënus, & ipsum
Æquavit; si non & superavit eum.

D. Du. Tr. Med.

De 3. horum Epigrammatum
editione.

7

Ad Autorem.

Hic liber est mundus; movet, & sine fine movetur:
Ipse licet taceas, Bibliopola probat.
Nam tua perpetuum exercent Epigrammata prælum,
Pene fatigatis ter repetita typis.

Ioan. Hoskins I. C.

IOAN-

JOANNIS AUDOENI,
EPIGRAMMATUM
LIBER PRIMUS.

1 *Ad Illustrissimam Heroinam Dominam Mariam
Neville, Patronam suam.*

Inveniant nostri patronum ut ubique libelli,
Libros Lectori dedico, meque tibi,

2 *Ad Lectorem.*

Qui legis ista, tuam reprehendo, si mea laudas
Omnia, stultitiam: si nihil, invidiam.

3 *Ad Jo. HOSKINS I. C. Poëtam ingenio-
sissimum de suo libro.*

Hic liber est Mundus: homines sunt, Hoskine,
versus,
Invenies paucos hic, ut in orbe, bonos.

4 *Ad dominam Mariam Nevile, Patronam suam.*

Si nos Pythagoræ non fallunt dogmata, corpus
Intrarunt Pallas, Juno, Venusque tuum.

5 *Ad eandem.*

Ut Sol in cœlis, ut lux in sole, videtur
Virtus in vultu sic habitare tuo.

Spectator quicumque venit, discedit amator:
Aut illum virtus, aut tua forma capit.

6 *Ad ejusdem filium, Thom. Neville, maxime spei
puerum.*

DE Genio tam mira tuo memorantur, ut omnem
Exsuperent, quamvis omnia vera, fidem.

Qui puerum laudat, spem non, rem laudat in illo
Non spes, ingenium res probat ipsa tuum.

7 *Ad ejusdem filiam, Cæciliam Neville.*

Es similis Matri: de te mihi dicere plura
Nil opus est; Matri te similem esse, fat est.

LIBER PRIMUS.

10

8 *Nosce te ipsum. In Harpalum.*

TU non es tanti, si dignus ut Harpale, nosci,
Quære aliquid dignum cognitione tua.

9 *Ad Caufidicum.*

SI felix, rerum potuit qui noscere causas;
Qui nosti causas dicere, quantus homo es?

10 *In Ioannem Protum.*

DUcturum uxorem memini te, Prote, minatum,
Ebrius uxorem ducere nemo potest.

Uxori nubas potius, quæ sobria potum
Ducere te noctu possit ab urbe domum.

11 *In Aulum, Nobilem ignobilem.*

DEgener, Aule, tuis majoribus omnia debes,
Debebit, credo, nil tibi posteritas.

12 *In Henricum.*

EMisti fatuum bis denis, Henrice, libris;
Emissem tanto non ego te pretio.

13 *Venus.*

PRincipium dulce est, at finis amoris amarus,
Lata venire Venus, tristis abire solet.

Flumina quæsitum sic in mare dulcia currunt:
Postquam gustarunt æquor, amara fluunt.

14 *Ad Gilbertum.*

STare negas terram; nobis miracula narras:
Hæc cum scribebas, in rate forsan eras.

15 *Ad Medicos & Jurisconsultos.*

ULceribus, Galene, vales tantummodo nostris:
Stulcitiæ nostræ, Justiniane, sapis.

16 *O tempora! O mores!*

SCaliget annosi correxit Tempora mundi:
Quis jam, qui Mores corrigat, alter erit?

17 *Judicium Pavidis.*

CUm Paris electus Divis tribus arbiter esset,
Nec præferret utram sciret utriusque magis:

Maje-

Majestas tandem Veneri Junonia cessit,
 Palladis & virtus; omnia vicit amor.
 Si nunc judicium renovata lite subirent,
 Vinceret una duas Juno Moneta Deas.

18 *Germana veritas.*

Mersum in nescio quo Verum latitare profundo,
 Democritus, nemo quod reperiret, ait.
 Si latet in vino Verum (ut proverbialia dicunt,)
 Invenit Verum Teuto, vel inveniet.

19 *Ad Linum.*

Est tibi librorum, Line, copia: Doctior esses,
 Si tibi librarum copia tanta foret.

20 *Ad quendam nobilem Adolescentem.*

Qvisque senectutem, mortem tibi nemo precatur.
 Optatur morbus, non medicina tibi.

21 *Ad quendam pauperem medicum.*

Qui modo venisti nostram Mendicus in urbem,
 Paulum murato nomine sis Medicus.

Pharmaca das ægroto: aurum tibi porrigit æger.
 Tu morbum curas illius; ille tuum.

22 *In quandam.*

Forma tibi famam peperit: sed filia matrem
 Occidit; formam non bona fama bonam.

23 *In Marcum.*

Esse in natura Vacuum cur, Marce, negasti?
 Cum tamen ingenii tam sit inane caput.

In Scriptores nostri temporis.

24 *Ad Solinum.*

Nunquid in octavo mendacia plurima vulgus
 Edat, at in quarto quæris, an in folio.

In Decimo Sexto menticos plurima (Seclo)
 Suspitor Historicos quolibet in folio.

25 *Phillida.*

Basia, Phylli, aliis dare non vis: at data sumis,
 Nimirum scis hæc accipiendo dari.

16

Ad eandem.

Ignis amor si sit (veluti proverbialia dicunt,) Heu mihi! quam tuus est frigidus ignis amor.

27

Impius Atheus.

Utere temporibus presentibus, utere rebus: Tempus erit, nullum quum tibi tempus erit: Grammaticus de preterito dicatque futuro; Tempore presentis, dum licet, utar Ego.

28

Epithaphium Athei:

Mortuus est, quasi victurus post funera non sit: Sic vixit, tanquam non moriturus erat.

29

Optativus modus.

Infinitivo prope par modus Optativus: Optandi finem nam sibi nemo facit.

30

In Alanam.

Conjugio esse jugum non intolerantius ullum, Nil aliud toto clamat Alana die. Post tot clamores & iurgia nocte fatetur, Conjugio nullum suavius esse jugum.

31

Propheta, Poeta.

Illi de rebus predicere vera futuris, Hi de preteritis dicere falsa solent.

32

De vita & morte.

Ad mortem sic vita fluit, velut ad mare flumen: Vivere nam res est dulcis; amara mori.

33

De Vulcano.

Arma faber Marti Vulcanus splendida fecit; Cornua Vulcano Mars speciosa dedit. Nimirum hoc operæ pretium, Vulcane, tulisti, Cornua pro ferro, sicine Glaucus eras?

34

Grammatica Anglica.

Foemineo generi tribuuntur - - -
Propria quæ Maribus. - - -

35

Librum Arbitrium.

Arbitrui, pro quo jam in partes scinditur orbis,
Vir libertatem perdidit, uxor habet.

36

De Vita & Venere.

Omnis ad extremum propter licet Actio finem:
Oderunt finem Vita Venusque suum.

37

Campi Elyfii.

Obscuri pater Aeneas loca cæca per Orci
Iviffe in campos fingitur Elyfios.
Nam pius Aeneas, infernum ingressus Elyfæ,
Quis neget in campis quin foret Elyfiis?
Maritus & Mœchus.

38

Maritus.

Hanc ego mi uxorem duxi; tulit alter amorem:
Sic vos non vobis mellificatis apes.

38

Mœchi.

Hos ego filiolos feci; tulit alter honores:
Sic vos non vobis nidificatis aves.

39

Rhetorica nova.

Qui caret argento, frustra uritur argumento,
Qui dare scit, non qui dicere, Rhetor erit.

40

In Cottam nuper culculatum.

Induit, uxoris pertæsus Cotta, cucullum;
Ut mundo moriens exueret cucullum.

41

Insignia Genevensium.

Clavem Aquilamque gerit duplex insigne Geneva:
Illud Papatus; hoc habet imperii.
Hoc insigne tuum, quo jure Geneva tenebis,
Si repetat clavem Roma; Rudolphus avem?

42

In Borbonii Poëtæ nugas.

Quas tu duxisti nugas, non esse putasti:
Non dico nugas esse, sed esse puto.

43

Fides.

Plurima apud veteres fidium fit, nulla fidorum
Mentio; priscorum nam fuit una fides.

LIBER PRIMUS.

14

In Paulinum Medicum.

CUr patiens, Pauline, tuus tibi dicitur æger?
Impatiens morbi sit licet, atque tui.
Te quoniam patitur, patiens tuus ergo vocatur:
Nam plus, quam morbus, torquet eum medicus.

45

In Cottulam.

SI verum dixit de Socrate Apollo, sapisti
Cottula: nam tu scis te quoque scire nihil.

46

In Fabianum.

Fertilis a multis si terra vocata ferendis;
Fertilis est, multos nam Fabiana tulit.

47

In Avaros, jocus.

Naturam parvo contentam vulgus inepte
Laudat, & indigne damnat Avaritiam.
Solut enim parcus minimo fatiatur Avarus:
Nam Natura parum sat putat. Ille nihil.

48

Ad Philopatrum.

Pro patria sit dulce mori licet atque decorum;
Vivere pro patria dulcius esse puto.

49

Orbis.

In mundo nil constat; in orbem vertitur orbis.
Quid mirum, recti quod sit in orbe nihil?

50

In Aretinum.

Est modus in rebus: tamen experientia monstrat,
In Veneris nullum rebus inesse modum.
Mille modos Veneris lascivia repperit; & quod
Natura fieri debuit, Arte facit.

51

In Silium.

Atheus es, quia Papiſtam tibi non licet eſſe:
Et Proteſtantem non libet eſſe tibi.

52

In Atheos.

Nulla domus domino caruit, vos hancine tantam
Nullius domini creditis eſſe domum?

53 *Medicus.*

Accipit oblatum Medicus, dare non solet, aurum.
Pharmaca dat medicus, non solet accipere.

Ordonner medicos, ægros Ordonner oportet.

Alterius sic res altera poscit opem.

54 *Jurisconsultum.*

Jurisprudentes prudentes jure vocantur:
Tam bene cum studeant provideantque sibi.

55 *Aulicus.*

Si bonus es; melior, non major tempore fies.
Si magnus; major tempore, non melior.

56 *Ad Marcum luscum.*

Unus, Marce, deest oculus tibi; sufficit unus:
Plura vident oculi, non meliora, duo.

Sunt mihi binæ aures, tamen his nil audio veri;

Bini oculi; video nil tamen hisce boni.

57 *In Paulum.*

NE pereat tua fama, struis tibi, Paule, sepulcrum;
Tanquam non possint ipsa sepulcra mori.

Secretum contra Canitiem.

58 *Ad Bithynicum.*

NE tua sit posthac, Bithynice, cana senectus,
(O te felicem!) calva juvena facit.

Probatum est.

59 *In Theodorum.*

Ducentem ad cœlos Theodorus, conjuge ducta,
Credidit angustam se reperisse viam.

Esse videbatur Theodoro quæ via Cœli,

Duxit ad Infernum: nam via lata fuit.

60 *Apollo & Musæ.*

Musæ sunt generis muliebris; Apollo virilis;
Unus enim Musis præstat Apollo novem.

61 *In Alanum, jam senem.*

Uxoris cubito cubitum conjungit Alanus:

Et solet hunc dulcem dicere concubitum.

62

Kalend. Januar.

MUnera divitibus non das (ne dando rogaret)
 Pauperibus donat nil (quia pauper) Olus.
 Expectans meliora datis, dat munera Quintus:
 Quodque verebatur poscere, dando petit.

63

In Pontiam.

IN mare Cornutos jaciendos Pontius inquit,
 Pontia respondit: Disce natate prius.

64

Opus tenebrarum.

Servandam ad Speciem, qua non magis utilis illi,
 Res individuo nulla nociva magis.

65

Mentiris.

Mentiris! Cave militibus ne dixeris unquam:
 Majus eo nullum dedecus esse putant,
 Mentiris, tantum qui dedecus esse putatis,
 Mentiri quare creditis esse decus?

66

In Hypocrytam.

Nil juras, metuisque superstitiosus haberi:
 Omnia mentiris; Relligiosus homo es,

67

Androgynus.

IN quo Mercurii facies Venerisque videtur,
 Nec vir, nec virgo est; Hermaphroditus homo est!

68

Venus.

Usque fluit fugitivus Amor, refluitque vicissim,
 Ut mare: quid mirum? nam Venus orta mari.
 Nulla fides Veneri; levis est, interque planetas
 Ponitur (haud inter sidera fixa) Venus.

69

In Rivales.

Unusquisque sibi vult Phyllida solus habere:
 Crede mihi, non est hic amor; invidia est.

70

Mulier.

Dista fuit mulier quasi (a) mollior: est tamen Eva
 Non de carne sui sumpta, sed osse, viri.

(a) Varro de ling. lat.

71 *Medicorum & Jurisconsultorum cognatio.*

Jurisconsultorum idem status, & Medicorum est,
 Damna quibus licito sunt aliena lucro.
 Hi morbus ægrorum, ægrorum litibus illi
 Dant patienter opem, dum potiantur opum.

72 *De Pamphilo ad Philippum,*

Non patitur Vacuum in rebus Natura, Philippe:
 Naturam sequitur, Pamphilus ergo ducem,

73 *Ad Calvum.*

Arboribus redeunt crines, & gramina campis:
 At capiti frondes non rediere tuo.

74 *Nilo negliocchi, Ætna nel cuore.*

Frigidus ardentes intravit Nilus ocellos,
 Du mcor Ætneo carpitur igne meum.
 Nec tantus fluvio lachrymarum extingvitur ardor,
 Nec tanti fletus flumina ficcant amor,
 Sic sibi discordes, exercent vim tamen ambo,
 In me concordes, ignis & unda suam.

75 *Ceteris paribus. In Camillam.*

Pacta Camilla procis ambita & amata duobus,
 Quorum pulchellus sed brevis alter erat,
 Non formosus erat, sed erat longissimus alter;
 Utrum horum mavis, virgo rogata rudis.
 Continuo lustrans oculis, & brachia longa,
 Nasum, crura, pedes, omnia longa videns;
 Prudenter respondit ad hoc magis anne prudenter?
 Hunc longum volo, si cætera sunt paria.

76 *De Gigantibus & Nanis.*

Montra, Gigas Nanusque, duo contraria formis:
 Vir, Gigas, immanis; Nanus, inanis homo.

77 *In duos Abbatis spurios.*

In templo orantes reliquis cum fratribus una
 Vos duo, non fiste dicitis, Abba Pater.

78 *Sacer-*



78

Sacerdotes.

PResbyteri uxores duxere: quid inde lucrantur?
Scilicet in Decimis hoc habuere prius.

79

Participium.

CUm Verbum sit Eras mus Nomen, quid sit Erasmus,
Ingenio Lector colligat inde suo.

80

Casus ad Jurisconsultos.

CUm propria imprudens conjux uxore coivit,
Quam falso alterius credidit esse viri.
Hoc genitum coitu, Consulti juris & æqui,
Legitime natum dicitis, ane nothum?

81

De Aurora.

MIraris, lucem summo quod mane priorem
Sole vides? Lux est condita Sole prior.

82

De Die.

SIt Nox centoculo quamvis oculatior Argo;
Plus uno cernit lumine lusca Dies.

83

De Nocte.

Induitur tristem cur Nox atrata colorem?
Luget defunctum Nox, quasi nupta Diem.
Consolarentur mœstam nisi sidera noctem,
Opprimeret reducem nos dolor ante diem.

84

In Marcum.

CArmine, Marce, tuo laudas me: fallor, an hoc tu,
Ut tua collaudem carmina, Marce, facis?

85

Mors.

Restituunt furtum fures, vi rapta latrones;
Omnia mors aufert restituitque nihil.

86

Ad Amicum.

CUm sis dimidium dominæ, quam diligis unam,
Dimidiumque tuus, parte quota meus es?
Te scribis tamen usque meum. Qui conjuge ducta
Vix tuus es, pacto quo meus esse potes?

87 *Vir bonus.*
SI quicquid rarum carum est preciumque meretur,
 Crede mihi, res est Vir pretiosa Bonus.

88 *In quendam senem.*
EX nigro mentum senio mutatur in album:
 Candida quæ fuerat mens tibi, facta nigra est.

89 *In Paulinum.*
Quicquid ab antiquo, Pauline, rogaris amico,
 Hoc de facturum cras mihi semper ais.
 Visne tibi dignas reddam pro munere grates;
 Gratia pro meritis cras referenda tibi.

90 *In fucatas.*
Quæ pictas geritis facies, vos jure potestis
 Dicere cum Flacco: Pulvis & umbra sumus.

91 *In Cottam.*
Totus es uxoris, non solus, Cotta, Camillæ?
 Sola tua est; at non tota Camilla tua est.

92 *Politicus.*
Dissimula, simula, quoties occasio poscit,
 Moribus ut morem temporibusque geras.
 Temporibus, qui rite sapis, servire memento
 Omnibus; ut tempus serviat omne tibi.

93 *In Venerem.*
Cur Venus illicitum sequitur Vulcania Martem?
 Vulcanus licita claudicat in Venere.

94 *In Damianum.*
Nemo simul dominis par est servire duobus.
 Tu servis Dominæ; non igitur Domino.

95 *In Marcum.*
Barba tibi crevit, ceciderunt, Marce, capilli:
 Inde tibi gravis est barba, caputque leve.

96 *Ad D. Jo. Hoskins.*
Ambiguus tecum peragens socialiter annos,
 Oxoniæ juvenis, Winto niæq; puer.

Sæpe tuum in dubiis sine fuce expertus amorem
 Rebus, & indubiam sum sine fraude fidem.
 Hoc tibi mnemosynon me mittere iussit amoris,
 Qui mihi te junxit, me tibi vinxit: Amor.

97 *In Epicharmum.*

CUr non vis Epicharme mori; sed mortuus esse?
 Vis Epicharme mori; sed sine morte mori.
 Fert mortem dolor: aufert mors optata dolorem.
 Est igitur pejor morte, Epicharme, dolor.

98 *In Phyllida.*

Sicut equo jaculans Parthus fugit & ferit hostem:
 Phyllis amatorem sic fugiendo capit.

99 *In Hallum Grammaticastrum.*

Sum famosus, adhuc jejunus dum foret, Hallus:
 Infamis nunc sum, cum satur esset, ait.

100 *De Magnete.*

Cuncta trahunt ad se Magnates aurea; sicut
 Ad se Magnetes ferrea cuncta trahunt.
 Tecum nil mihi sit gens aulica (docta rogare;)
 Cum das parca fatis; prodiga, quando petis.
 Omnia te adversum spectantia, nulla retrorsum.
 Munera me terrent, ut nihil inde petam.

101 *Mors.*

Mors quid sit, rogitas? si scirem, mortuus essem?
 Ad me, cum fuero mortuus, ergo venit.

102 *Clients.*

Cantabunt reduces coram latrone Clientes:
 Semper enim vacuus currit ab urbe Clients.

103 *In Zoilum.*

Quod mores accuso malos, me, Zoile, carpis;
 Consciis an forsitan quod reprehendo tuos?
 Cur tibi præ reliquis metuas? fortasse ego, mores
 Cum reprehendo malos, tum reprehendo meos.

104 *Children and Fooles tell thruth.*

ANglica veridicos dicunt proverbialia stultos;
Ergo Anglis verum dicere stultitia est.

105 *In Calvum.*

Certa tuæ frontis fuerat mensura, priusquam
Nescio, quæ frondes abstulit aura tuas.

Ex quo decussit tibi sunt de vertice crines,
Perpetuæ frontis jam caput instar habes.

Quanta tibi nunc sit frons dicere non putes: ergo
Fronti nulla fides est adhibenda tuæ.

106 *In eundem.*

CAlve, meos nunquam potui numerare capillos;
Nec tu, (nam nulli sunt) numerare tuos.

107 *Apologia Fortuna.*

Nulla mala est Fortuna æqua omnibus, omnibus
una

Spem dat pauperibus, divitibusque metum.

108 *In Cottam.*

Intrasset calidum nuper cum Cotta lupanar,
Dicitur infecta re rediisse domum.

109 *In Procillum, Magnatem.*

Si non audires dicentem fallā, Procille,
Auderet falsum dicere nemo tibi.

110 *Ad Paulum Jurisconsultum.*

Inter te Dominamque tuam sic dividis annum,
Ut vix dimidia parte sit ille tuus.

Conjugis una tuæ pars dicta Vocatio; nempe
Tum vacat uxoris rebus adesse tibi.

Altera pars non tota tua est, rem quando relicta
Negligis uxoris, remque clientis agis.

Terminus hæc anni pars litigiosa vocatur.

Non male, nam Venerem terminat ille tuam;

111 *Ad eundem.*

Terminus est nullus tibi nulla vocatio lucri:
Totus enim lucro litigiisque vacas.

112

Ad Marinum.

A Lecto surgit quoties intacta, Marine,
 Conjux, in vultus irruit ungue tuos.
 Infensam blande alloqueris, sed inania perdis
 Verba; satis fieri re cupit illa sibi.

113

Chirurgus.

B Ella magis pacem ne precer? mihi servit utrum-
 que:

o Ambo Patroni Marsque Venusque mei.

114

Lues Venerea.

I Tala terra mihi patria est, Gallique parentes;
 Gallicus, in dubio est, Italicusne vocer.

115

Calumniatores, Adulatores.

Dixit Anaxagoras atram esse nivem, gravis Autor:
 Hæc ætas multos vidit Anaxagoras.
 Laudavit niveas corvi vulpecula pennas:
 Hei mihi, quot vulpes sæcula nostra ferunt!

116

In Ponticum.

TE mihi dixisti resipiscere: non tibi credo,
 Pontice, qui nunquam te sapuisse scio.

117

Herculeus labor decimus tertius.

Conjugis ingentes animos linguamque domare,
 Herculis est decimus tertius iste labor.

118

Mars, Mors.

Bella famem, pestemque fames mortalibus affert;
 Est igitur bellum, pejus utroque malum.
 Omega nostrorum mors est, Mars Alpha malorum.
 In bello distant Omega & Alpha parum.

119

In Cynthiam.

Sint utinam similes formæ tibi, Cynthia, mores:
 Sicque tibi tam mens candida, quam manus est.

120

In Gelliam.

Dum pecces sine teste, putas te, Gellia, tutam,
 Quanquam turpe nihil tu sine teste facis.

121 *In Albinum.*

Nunc tua res agitur, paries nam proximus ardet,
Albinum Felix obuius admonuit.

Uxorem facto properans Albinus in ipso
Repperit: O inquit; Nunc mea res agitur!

122 *In Claudium Philosophastrum.*

In tres partitus species Bona, Claudius æger,
Pauper, & insipiens nil habet ipse trium,

123 *De Bardella, latrone Mantuano.*

Bardellam Monachus solans in morte latronem,
Euge, tibi in Cælo cœna paratur, ait.

Respondit Bardella; Hodie jejunia seruo,
Cœnabis nostro, si lubet, ipse loco.

124 *In fulem Floram.*

Cum quocunque cois, rem factam, Flora, fateris:
Plusque fatendo mali, quam faciendo facis.

125 *In Quintillum.*

Quintillus cur nil dat amico? donat amicæ
Omnia; cui primum se, sua deinde dedit.

126 *Ad Aulum, de Quinto sene.*

Quintius indomitam quod duxerit, Aule, juven-
cam,

Condis in insanum cur Epigramma senem?

Convenientius huic Epicedion esset amanti
Amenti; effodit jam * taphon ipse sibi.

* Sepulchrum.

127 *In Costum.*

Tu peccas impune, at non tua mentula: nuper
Supplicium capitis pertulit ulla sui.

128 *Ad Cynthiæ epistolam responsio.*

Candida charta ad me tua venit; Epistola nigra:
Hæc index cordis; corporis illa tui.

129 *Ad Sextilianum Sp.*

Te cum progenuit, non credo creare volebat
Te tuus, ac tantum se recreare, pater.

Si

Si plus quam donum mens respicienda datoris,
Non debes vitam, Sextiliane, patri.

130 *In Porciam, Hypocritam.*

Displicet in nostro tibi mentula lecta libello:
Vis sine pene librum; non sine pene virum.

131 *Saturni tres filii.*

Theologi ambigui; Juristæ lenti & iniqui;
Immundi Medici; Mundus ab his regitur.

132 *Ad amicum conjugatum de Cœlibatu.*

Væ soli, Sapiens Rex non sine conjuge dixit;
Nil melius vita Cælibe, Paulus ait.

Væ nobis, inquit, conjux: at væ mihi cælebs:

Væ nostrum simplex ergo, tuumque duplex.

Proverb. Cambro Britannicum: *Gwell,*
iwguarsi, negwami, id est, Melius est væ
mihi, quam væ nobis,

133 *In I. Corneum.*

Audi, cerne, tace: cui publica contigit uxor,
Hæc tria præcipue verba notanda tibi.

134 *In Cajum.*

Accusaretur cum coram Præsule Cajus:
Confessus bigamum seque professus ait:
Unius uxoris vir Episcopus esse jubetur:
Ergo licet Laico nunquid habere duas?

135 *In Pomponiam.*

Corpore cum quæstum faciat Pomponia, punctum
(Utile nam dulci miscuit) omne tulit.

136 *In Pinotum, colico morbo laborantem.*

Si non efflasset animam, Pinote, perisses:
Quod mors est aliis, hoc tibi vita fuit.

137 *In Pampomiam.*

Induit instabiles capiti Pomponia plumas:
Quodque insigne fuit Martis, erit Veneris.

Scili-

Scilicet in Martis gerit has Cytherea favorem:
Indicat hoc, Marti quam sit amica Venus.

Suum cuique pulchrum.

Cic. Tuscul. quæst lib. 5.

238

Ad H. L.

Plus tibi vicini conjux, tua plus placet illi:
Cuique igitur pulchrum non solet esse suum.

139

Venus.

Cum tam Venalis quam Bacchus proffet in urbe,
Cur insigne suum non habet alma Venus?

Difficilia, quæ pulchra.

140

Ad Marinum.

Si sit difficilis, quæ pulchra, Marine: puellam
Accipe tu facilem; da mihi difficilem.

141

In Theodorum.

Uxorem tibi more novo fas ducere non est:
Quid refert? veteri nam tibi lege licet.

At tu * Mosaicam violasti bis quoque legem:

Nupta prior meretrix nam fuit; hæc vidua est.

* Levit. 21. v. 7. 13. & 14.

Strena Kalend. Jan. 1599.

142

Ad Germanicum,

Mitto tibi carmen, Germanice; numeris instar:
Mitte mihi munus; carminis instar erit.

143

Sara.

Quæ velit ancillam concedere nupta marito,
Res est hoc nostro tempore rara, Sara.

144

Ad D. T.

Servus discipuli cum sis, Dominique Magister,
Invideo titulis & miseresco tuis.

145

In Paulam Asheam.

Vir ducatne duas, an nubat virgo duobus,
Quæritur: hanc litem solvere Paula volens,

B

Una

Una viris, inquit, magis apta duobus: In una
Consistent aliter quomodo carne duo?

1,6 *In Medio virtus.*

AMbulat in medio mulier pomposa viroꝝ,
Virtus jam medium perdidit ergo locum.

147 *In Acerram.*

FELix, quem faciunt aliorum cornua cautum;
Sæpe suo cœlebs dixit Acerra patri.

148 *Ad Pinotum.*

Eſſe velim Venerem qualem, Pinote, requiris,
Venalem nolo, vendibilemque volo.

149 *In Quintum & Quintinam.*

Conjugis observat nutus, ut numina, Quintus;
Verba putat leges, imperiumque preces,
Ducit, agit miserum, quo vult, Quintina, maritum;
Ut dubites, habeat non habeatne virum.

Contra naturam & mores, legesque loquendi,
(Grammatici fugite hinc) hæc Vir & hic Mulier.

150 *Ad Amicam absentem.*

UXor amore miser, tantoque potentius uxor,
Quanto qui me urit longius ignis abest.

151 *In Paulinam.*

PRimo infida viro Paulina, infida secundo:
Toto interregni tempore casta fuit:

Castâ metu famæ, plusquam formidine culpæ,
Fructifero metuens credere semen agro;
Multus nam peteret licet importunus amator,
Concessit nulli, sede vacante, locum.

152 *In Gelliam.*

Dicere si sacris pretium est Simonia rebus:
Est rem divinam mercis habere loco:
Tu Simoniaca es vere, quæ vendis amorem,
Gellia; nam res est spiritualis amor.

In quandam.

153
Res tibi immensum quam parvo tempore crevit?
 O Mega nunc, annos o Micron ante duos.

Enigma.

154
Dic, quibus hoc animal terræ nascatur in oris?
 Masculus est mater cui, Mulierque pater.

Aliud ad Ponticum.

155
Esse duos oculos miror tibi, Pontice; cujus
 Unocula est mater, unoculusque pater.

In D. Vitum.

156
Ans cornutus, Vite, nescio; te scio Taurum:
 Nuper enim nati sunt tibi tres Vituli.

*Dactylus.**Ad Amatorem.*

157
AD Dominam intrepido vis tendere carmina
 cursu?

Scire operæ pretium est, quo pede versus eat:
 Nimirum pedibus metrorum ex omnibus unum
 Præ reliquis mulier dactylon omnis amat.

Amor descendens.

158
Incipit a geminis, perque os descendit, ocellis,
 Incidat in centrum donec Amoris amor.

In Balbam.

159
BAlba vale sponso cum diceret, inquit: Apud nos
 Spero futu-tu-rum te, Phi-Philippe brevi.

De Furto problema.

160
Qui domino invito rem contrectaverit, est far,
 Quid si hoc invita non faciat Domina?

In ponticum.

161
Pollicitus nonnulla, nihil mihi, Pontice, præstas?
 Ut medicus, quamvis nil det, ait: Recipe.

162 *In Cerelliam, eunucho Gallo nuptam.*

Nunc ego Spartanos iterum desidero mores?
Spondeat ut nudo nuda puella viro,
Nuper enim sterilli desponsa Cerellia Franco,
Crediderat Gallo nubere; nupta Capō est.

163 *De cornibus problema.*

Si quando sacra jura tori violaverit uxor,
Cur gerit immeritus cornua vir? Caput est.

164 *Ad Germanicum Cal. Jan. 1600.*

Vel munus donato mihi, vel reddito versus:
Quos hac donavi conditione tibi.

165 *Christ Church Colledge in
Oxford.*

Sit domus imperfecta licet similisque ruinæ!
At patet in laudes (b) area lata tuas
(b) Christ Church quadrangle.

166 *In Phyllida.*

Phyllis amica capi nostro se carmine fingit:
Carmen amat; carnem sed mage Phyllis amat.

167 *Ad Samuelem.*

Daniel.

Tempora consumo nugis & inanibus, & sic
Ne pereant, vitæ tempora perdo meæ.

168 *Ad Lectorem, de seipso.*

Nostra tibi brevitās ignavia forte videtur,
Crede mihi, labor est non levis, esse brevem;
Non facio ut multi, qui multa & stulta loquuntur:
Sermo meus stultus forte; tamen brevis est.

169 *In*



169 *In gloriosum Thraſonem.*

CUr immenſa gerit miles, calcaria Thraſo?
Quæritur: Immenſum gloria calcar habet.


170 *De Seipſo.*

Qui petit accipiet; Jacobus Apoſtolus inquit:
O ſi Jacobus Rex mihi dicat idem!

171 *Muſica Aulica duarum vocum.*



dum tollitur, Aulicus
inquit,



dum cadit, alter ait.

172 *Ad Lectorem.*

TAbificum non accendat liber iſte Tabaccum,
Terge libro potius poſteriora meo.

173 *Ad Librum.*

ME vivo, moriere Liber fortaffe: quid inde?
Sæpe ſenem moritur filius ante patrem.
Seu moriare igitur vivo me, ſive ſuperſtes
Sis, mihi Mortalem me genuiſſe ſcio.

FINIS
LIBRI PRIMI.

JOANNIS AVDOENI
EPIGRAMMATUM
LIBER SECUNDUS.

1 *Ad Lectorem.*

NE placeant stultis, quorum sunt omnia plena,
Carmina non multis nostra placere volo,
Sat mihi sunt pauci lectores; est satis unus:
Si me nemo legat, sat mihi Nullus erit.

2 *Ad incomparabilem Heroïnam D. Mariam
Neville, Patronam suam.*

Ex vatum ingeniis multorum gloria pendet;
Debetur merito laus tua tota tuo.

3 *Ad eandem.*

Si quem forsan habes, inimico nil male; amicis
Omnibus ex animo visque facisque bene:
Vetum hoc est, quod tu non oblivisceris unquam;
Unum illud, nunquam quod meminisse soles.

4 *Ad eandem.*

Pingitur in tabulis formæ peritura venustas:
Vivat ut in tabulis quod perit in facie.
Non possum in tabulis, quod possum, carmine pingo,
Vivat ut in chartis, quod perit in tabulis:
In tabula quanquam te ponere solus Apelles
Dignus, & in versu solus Apollo fuit.

5 *Ad D. I. Poëtam ingeniosissimum.*

Egregius non sum vates; tamen è grege vatum:
È grege tu vatum non es; at egregius.

6 *Quid novi? ad D. I. Harington Equitem.*

Sulca rogatorum me turba moratur euntem,
Quæritat in lingua dum nova quisque sua.
Numquid Oëne novi? Nil novi scilicet, inquam,
Aut si quid novi, nil tamen, ajo, novi.

7 *Aula.*
Quisquis in ambigua se non accommodat aula
 Omnibus ingeniis, non habet ingenium.

8 *In Aulam.*
Factus eques quare es? te pluris ut æstimet uxor?
 Jam non te, sed se diliget, Aule, magis.
 Et tibi constabit pluris, quam constitit olim;
 Carior ergo tibi, quam fuit, uxor erit.

9 *In Chymicum.*
Rem decoxit iners Chymicus, dum decoquit au-
 Et bona dilapidat omnia pro lapide. (rum =
 10 *Trojanus.*

Trojani eversa sapuerunt denique Troja:
 Quis non (c) Trojanum se fateatur in hoc?
 (c) Atræ Trojan.

11 *De remedio amoris.*
Igni subtrahito lignum (jejunia servans):
 A muliere sede) sicut ab igne) procul.
 Si tuus istorum neutro consumitur ardor,
 Uxor ducenda est. Hæc erit instar aquæ.

12 *Troynevant. Ad Londinenses.*
Ex cinere ut Phœnix Phœnicis nascitur alter,
 Londinum Trojæ prodiit è cinere,
 13 *I. Consultorum Deus,*

Magnus in urbe Deus Romana Terminus olim:
 Est Westminsteria major in æde Deus.
 14 *Terra.*

Omnibus in rebus medium laudare solemus:
 Scilicet in medio credimus esse modum.
 Est igitur cælo tellus laudatior alto:
 In mundo medium nam tenet illa locum.

15 *Ad Jacobum Reg. Defensorem fidei.*
Maximus es Regnum fidei qui castra sequuntur:
 Nempe tuæ fidei creditur ipsa Fides.

16 *Ad illustrissimum Comitem Dorcestriae Thomam Sackeville, summum Angliae Thesaurarium, &c.*

Thesaurarius es regni regnoque fidelis:
Præstat thesauris omnibus ista fides.

17 *Ad illustrissimum Comitem Salisburia, Robertum Cacilium, Regis summum Secretarium, &c.*

Tu secreta tibi regnorum credita servas:
Estque tuæ fidei semper habenda fides.

18 *Ad Magnificos Venetos.*

Imperii Emporii (mirum) fundamenta vestri
Funditus in fluido sunt solidata salo.

Ne solum mutis habitentur piscibus undæ,
Æquoris incultas incoluistis aquas.

Orbis in Oceano quæ quondam pars fuit, urbs est;
Natura ante salum quod fuit, arte solum.

Imperio sedem hanc æterno plus prope vobis
Quam sibi constantem constituistis aquam.

Quid mirum vestram consistere legibus urbem,
Legibus exleges cum teneatis aquas?

19 *Ad Nobilissimum Heroa D. Thom. Egerton, Angliae Cancellarium.*

Legem ne violet Vis adversaria juris
Maxima, justitiam callida jura premant:

Jure tibi in leges permessa potentia; summum
Intra cancellos Jus cohibere suos.

20 *Ad illustriss. D. Henric. Howard. Comitem Northamptonia, &c.*

Sis claris, Howarde, licet majoribus ortus,
Jamque renascentis nobilitatis honor:

Tu tamen (in prisco mirabile quot fuit ævo.
At nunc prodigii pondus & instar habet)

Postponis meritis mercedem, legibus arma,
Virtuti vires, ingenioque genus.

²¹ *G. Cæcilius nuper Angliæ Thesaur. 1596.*

Parvae sunt arma fortis, stratagemata parvi,
Sit nisi consilium Cæciliusque domi.

Cæcilius, velut alter Atlas, divinitus ortus:
Hic humeris cælum sustinet; ille Statum.
Virtute duce, Comite fortuna.

²² *De eodem.*

Fortunam Comitem regina creavit Elisa;
Cur non virtutem fecerat ergo Ducem?

²³ *Ad Reverentissimum D. Richardum Vaghan,
Episcopum Londiniensem.*

Præful es (o Britonum decus immortale tuorum!)
Tu Londinensi primus in urbe Brito.

²⁴ *In eundem.*

Hi mihi doctores semper placuere, docenda
Qui faciunt, plus quam qui facienda docent.

Pastor es Anglorum doctissimus optimus ergo:
Nam facienda docens ipse docenda facis.

²⁵ *Ad Rev. D. Thomam Bilson, Episcop.
Wintoniensem.*

Tu mihi Præceptor quondam, Bilson, fuisti:
Debeo præceptis, scribo quod ista, tuis.

²⁶ *Gulielmi Wicham, Episcopi olim Wintoniensis Vita,
a Martino L. L. Doctore Latine edita.*

Defunctum vitæ, defuncto reddere vitam,
Non est cujusvis: hic labor; hoc opus est.

Quod nisi fecisses, jam tu, Martine perisses:
Ergo per hunc unum vivitis ambo librum.

²⁷ *Collegium Wintoniense.*

Prima Scholas Europæ inter Wintonica; cujus
Pars ego quæ mea laus maxima, parva fui.

Hunc tibi primatum nec Zoilus ipse negabit,
Si tibi Wichamum noverit ipse patrem.

Philippus Sidnejus.

QUOD sit ab antiquo tantum cantatus Homero,
 Felicem Macedo Rex vocat Æacidem.
 O me infelicem! quia tu, divine Philippe,
 Felix carminibus non potes esse meis.

Ad eundem.

QUÏ scribenda facit, scribitve legenda, beatus,
 Ille beator es tu, quod utrumque facis.
 Digna legi scribis, facis & dignissima scribi.
 Scripta probant doctum te tua; facta probum.

30 *In Nuptias Gulielmi, Comitis Penbrokiæ; &
 Mariæ Comitis Salopiæ filia. 1605.*

MORIBUS, ingenio, formaque, ætate, bonisque,
 Estis, & Heroica nobilitate, pares.
 Nobiliore tamen longè te conjuge dignum
 Censeo, te dignam nobiliore viro.

31 *Ad Elizabetham, Comitissam Rutlandiæ,
 Philip. Sidneji filiam.*

QUOD pater ille tuus fuerit, laus magna Philip-
 pi est.

Laus tua, quod tanti filia patris eras.

32 *Ad Luciam Comitissam Bedfordiæ.*

PRÆCLARUM lux ipsa dedit tibi, Lucia nomen;
 Luceat in toto nomen, ut orbe tuum.

Te pater illustris generosaque mater in orbem;
 In lucem virtus ingeniumque tulit.

Annulus Equestris.

33 *Ad D. Henricum Goodoyeer, Equitem dignis-
 simum.*

NOBILITAS aurum, Virtus tua gemma sit: usque
 Versetur digitis Annulus iste tuis.

34 *Ad D. Joan. Harington, Equitem doctissimum.*

CARMINA non sine re tua sunt, sine nomine quam-
 Scriptores alii, re sine, nomen habent. (quam-

35 *Ad D. B.*
SI bene, qui latuit, bene vixit, tu bene vivis:
 Ingeniumque tuum grande latendo patet.

36 *Ad D. Thomam Chalonorum Equitem, Præ-
 positum Domini Principis.*

PRincipis efformas tenerum sic pectus, ut olim
 Non modo regnorum Rex fit, at ipse sui.
 Quatuor hoc quintum regnis ut præferat unum,
 Impariumque sui quatuor Imperiis.

37 *Ad Adamum Newton, Principi à studiis.*

TERGEMINI Britonum regni spes altera Princeps
 Jam docilis docto discit ab ore tue.
 Quem sic instituis, ventura ut nesciat ætas,
 Rex fuerit major, doctior, an melior.

38 *Ad D. Gualterum Gwyn*

PRincipis incrementa boni, vates pius, optas;
 Et (d) Cresce Arthuri in sede futurus; ais:
 Ingenium natura dedit, fortuna secundet;
 Et Crescente tuus principe crescat honos.

(d) Fatale quasi Anagramma Principis, ut exstat in
 libro Anagram Domini G. Gwyn, in Scotia ante re-
 natam Britanniam edito.

39 *Franciscus Drakus.*

DRake, pererrati novit quem terminus orbis,
 Quemque semel mundi vidit utrumque la-
 tus;

Si taceant homines, facient te sidera notum;
 Atque polus de te discet uterque loqui.
 Plus ultra Herculeis inscribas, Drake, columnis;
 Et magno, dicas Hercule major Ego.

40 *Vires Britannicæ. Ad Principem.*

ANglorum portæ sunt portus, mœnia classës,
 Castra æquor, valli corpora, corda duces.

41

Globus terrestris.

Terra aqua unda globum faciunt (quis crederet)
unum:

Scilicet hæc semper manat; at illa manet.

42

Infana Sanitas.

Quo tibi potarum plus est in ventre Salutem;
Hoc minus, e potis hisce, salutis habes.
Contingant utinam tales tibi mille salutes.

Non equidem invideo; mi satis una salus.

Una salus sænis nullam potare Salutem;
Non est in pota vera salute salus.

43

Theologus.

Scire tuum nihil est, nisi te scire hoc sciat alter:
Politicus.

Si sciat hoc alter, scire tuum nihil est.

44

Omnes appetunt bonum.

Fallor? an a verbo nomen trahit optimus: opto?
Optat enim sapiens optima quisque sibi.

45

Rara avis in terris.

Virgo puellari morbo Burgunda laborans,
Jam desperata sæpe salutis ope,

A Medicis mentam consultis jussa minutam
Sumere, quæ multis utilis herba fuit,

Quam per peccatum vel vivere, maluit (id quod
Peccati pretium debuit esse) mori.

46

Democritus & Heraclitus.

Ille nihil nisi risit; & iste nihil nisi flevit?
Istene ridendus, flendus an ille magis?

47

In Langam.

Langa Lutherano nubens Papanæ marito,
Ansam ut dissidii tolleret omnis, ait:

Jurgia ne pacem perturbent ulla futuram,
Tu mihi sis facilis non ego dura tibi:

Arbitrii libertatem mihi credito, eritque,
De reliqua tecum lis mihi nulla fide?

48 King. *Arthurs* round table.

CUr præfert mensam quadratæ, *Arthure* rotundam?

Fecerunt homines quadra, rotunda Deus.

49 *Ad Annam.*

Multum amet, ingenii nec fit vulgaris oportet,
Ex merito qui te laudet ametque tuo.

50 *In Henricum.*

Commendans animam Cœlo, terræque cadaver,
Henricus horrendum mortis iturus iter

Uxorem interea tempus captate, novumque
Audiuit sibi jam conciliare virum.

Invidus audito hoc, delusa uxore, revixit,
Denuo; decreffet cum tamen ante mori.

51 *De Amore & Fide.*

Fecerunt Amor atque Fides divortia, nusquam
Non suspecta Fides: suspiciosus Amor.

52 *Amator.*

Spes incerta, timor constans, fugitiva voluptas,
Gaudia mœsta, dolor dulcis; amarus Amor.

53 *Ætas Aurea.*

Cognita Tartarei cum nondum vis foret auri,
Aurea curætas illa vocata fuit?

54 *In Alanam.*

IN thalamo Natura locum cui præbuit imum;

In mensa summum sumit Alana sibi:

Scilicet imperium facilis cum conjuge conjux

Dividit, hic noctes regnat, & illa dies.

Mors Germanica,

55 *Ad Polynicum.*

Mors (inquit Seneca) est non esse, Polynice, contra
Germanus mortem non bibere esse putat.

56 *In Philodemum.*

Rara fugis propter pretium: communia quæris:
Carior est cara vilis amica tibi.

57

In Battum.

Batte, tacenda ultro loqueris, veniamque precaris;
Visne tibi venia nil opus esse? tace.

58

Gordius nodus.

Quem solvit Rex ense suo: magis estne solutus
Ingenio nodus Gordius, an gladio?
Ingenio nodum potes hunc dissolvere nullo:
Sed nec Alexander scinderet ense suo.

59

Amor.

Bellum, pax rursus; vitia hæc in amoribus insunt;
Se comitantur enim semper Eras & Eris.

60

*Lites. Leges. Ad D. Guil. Jones, I. C.
cognatum suum.*

Lis genuit leges; legum lis filia: vivi
Non sine lite solet, nec sine lege potest.

61

Parcus & Prodigus.

Rhetoricæ studiosus ego sum; Prodigus inquit;
Parcus ait, Logicæ sum studiosus ego.
Semper clausa manus Logicam designat avari;
Prodiga Rhetoricam semper aperta manus.

62

Novus.

Romanis gnavis cum vix dolor ipse labor fit,
Ignavis Grajis est labor ipse dolor.

63

Vir bonus, fortis, sapiens.

Divitiis plerumque caret bonus (intus abundans)
Ingenio fortis vir, sapiensque fide.

64

Ordo velleris aurei.

Dux Burgundorum, Vetus, ut fert fama; Philip-
pus
Ordinis aurati velleris autor erat,
Auriferos cujus nunc hæres possidet Indos;
Non igitur fuit hic Ordo, sed Augurium.

65 *In Comitibus Dorcestrie Angliæ Thesaurarii dictum.*

Nec temere, nec timidè.

OMnia despera prudenter: & omnia spera
Fortiter: ut caveas omnia, nil metuas.

66 *In D. Henrici Neville ejusdem generis dictum;*
Ne vile velis.

Nil vanum nec vile velis, generosè Neville:
Nil prope cum valeant vilia, vana nihil.

67 *Ad D. Philippum Sidnejum, de ipsius
Arcadia.*

Ipsè tuam moriens (vel conjuge teste) jubebas
Arcadium sævis ignibus esse cibum.

Si meruit mortem, quia flammam accendit amoris;
Mergi, non uri, debuit iste liber.

In librum quæcunque cadat sententia, nulla
Debit ingenium morte perire tuum.

68 *Ad Janam Audænam, doctissimam Fæminam.*

Nulla duarum audita mihi neque visa sororum,
Longævus genuit quas tibi quinque pater.

Quod sint ergo scio; quales tibi Jana sorores
Nescio; si similes sunt tibi, Jana, scio.

69 *Ad D. Joannem Thorium, amicum suum.*

Nulli inimicus ero, sed nec bis amicus amico:
Nam cuicumque semel, semper amicus ero,

70 *Grammatica Feneratorum.*

Serpentes, nantes, gradientes, atque volantes,
Hos, has omnes, hæc omnia vincit Amor.

Hic, hæc, hoc, Nummus, regina Pecunia & Aurum,
Sunt tria, queis vincens omnia cedit amor.

71 *Ad quendam neutri parentum similem.*

Cur tam dissimilem sibi te genuere parentes,
Qui tamen unanimes te genuere simul?

Certa

Certa tibi cecidit neutrius forma parentis,
Dum, te formet uter, certat uterque parens.

40 *Ad duos anonymos, Venetiis reduces.*

EXpensas quadruplex ut compensatio vobis
Redderet, ad Venetos instituistis iter.
Unde lucro simul ac vestro rediistis, amici
Gaudebant damno vos rediisse suo.

73 *Adulterium & Fornicatio.*

IGnavus Mœcho tantum distare videtur
Scortator, quantum Comicus a Tragico.

74 *De Hercul. Ad C. D.*

FRangere quem nulla valuit virtute, labores
Quis fuit Herculos maximus inter? Amor.
Lenam non potuit, potuit superare Leenam?
Quem Fera non valuit vincere, vicit Hera.

75 *Osculum salutationis.*

BASIA da tria Phylle mihi: tria si dare non vis
Oscula, da saltem tot, quot habes labia,
Das unum, fumisque, negas duo basia Phylli;
Vel tibi sume tuum, vel mihi redde meum.

76 *Problema ad Physicos de basiis.*

SI nihil ad suavem spectarent basia gustum,
Oscula cur solo semper ab ore damus?

77 *In Labienum.*

SIC, inquit, petitur cœlum? sic itur ad astra?
Ascendens furcam fur Labienus ait.

78 *In Alexandrum.*

UNUS Pellæo juveni non sufficit orbis;
O Juvenis! mundo mens tibi major erat.
Uni Pellæus juvenis non sufficit orbi;
Magnus Alexander, sed tamen orbe minor.

79 *Ad Firmicum; in Aulum.*

TU credis nullis; omnes tibi, Firmice, credunt;
Omnibus, Aule, soles credere; nemo tibi.

80 *In quendam Carminificem.*

Sic potas, tanquam sine potu nemo Poëta,
Aut tanquam potus quisque Poëta foret
Ebrie Carminifex, domatur syllaba primæ
Proxima; tum titulis, quod manet, adde tuis.

81 *In anonymi cuiusdam mendaces epistolas.*

Ad nostras non rara manus tua epistola venit:
Aut raro aut nunquam scribis Evangelium.

82 *Medice cura teipsum. Ad Gilbertum.*

Ut teipsum cures frustra Gilberte, moneris:
Est tibi nam semper maxima cura tui.

83 *In foeneratorem quendam anonymum.*

Mutua quæ Flavæ festertia mille dedisti,
Foenero, cum solido restituenda petis.

Si tibi reddiderit sortem, nil nomine debet
Foeneris: (e) usuram corporis ejus habes.

(e) Quod non habet in ære, luit in corpore,

84 *In Hypocritam.*

Omnia dissimulans simulansve facis: licet ingens
Dissimulare dolor sit, simulare labor.

85 *Erasmi Moria.*

Stultitiæ laudem scripsisti primus, Erasme:
Indicat ingenium Stultitia ista tuum.

86 *Anagrammatistæ.*

Quoniam Vocales huc illuc pellere tandem
Vultis, & infantes cogere litterulas?

Otia ut Augusto faciente, solebat in unum
Cogere Tyrhis ovis rure, capras Corydon.

87 *In quendam Doctorem indoctum.*

Artis nuper eras imperbis inersque Magister:
Barbatus nunc es Doctor, inersque magis.

88 *Nudus Amor.*

Qvæ villis natura feros, & gramine campos
Ornat, aves pluma, vellere vestit oves.

Deni-

Denique frigidulo quodcunque sub aëre nasci
Contigit, innata veste vel arte tegit?

Vestivit nudum cur omnia præter amorem?

Quo nudus magis est, hoc minus alget amor.

89 *De Fisco. Ad D. Jo. Pits. amicum suum.*

INfluit in fiscum collecta pecunia, sicut
Undique flumineas imbibit æquor aquas.

Effluit ex fisco dispensa pecunia; sicut

Æquoris in fontes versa recurrit aqua.

Nec dum fluminibus saturæ sunt æquoris undæ,

Nec jugis fontes evacuantur aquæ.

90

In perfidam.

Credendo vanis, didici non credere verbis;
Spes desperantem me mea falsa facit.

91

Paccatum argenteum.

Viderunt nullos Saturnia secula mœchos:
Mundus erat, donec sub Jove mundus erat.

92

Lena.

Nulla tibi pars est non vendita corporis; ipsam
Distraheres animam, nemo licetur eam.

Distraheres animam, si non emtore careres;

Nullus eam pretio, Dæmona præter, emet.

93

Philautia.

TU persona secunda, ille ultima, prima Ego: no-
Nemo tamen sibi non esse videtur Ego. (strum

94

Sapientia.

Quis dives? sapiens: quis pauper? stultus iners-
Si sapio ergo, brevi tempore dives ero. (que

Quis sapiens? dives: quis stultus? pauper inopsque;
Ergo, si dives non ero, stultus ero.

95

Etymon Veneris.

D'citur (ut (f) Cicero) quod ad omnia sponte
veniret,

An quod veniret omnibus alma Venus?

(f) de nat. deorum lib. 2.

96. In

96 *In ebriosum quendam.*

TAm potabile si foret autem, optabile quam sit;
Quanta tuus venter aurifodina foret?

97 *Ad Pollam,*

BAsia, Polla, negas nulli; das oscula nulli;
Humida sed siccas vertis ad ora genas.

Imponenda novis si sunt nova nomina rebus,
Oscula jam debent nomen habere novum.

98 *Amicus & Conjux.*

Spiritus est carus nobis; hinc carus amicus:
Cara viro conjux cur? quia cara caro.

99 *Ira.*

AN, quia virtutem soleat calcare, vocavit
Iram Virtutis calcar Aristoteles?

100 *Flora Romana.*

Quæ vectigalem totum sibi fecerat orbem,
Vectigalis erat Roma superba sibi.

Nam pro vectura quicquid tibi, Flora dabatur,
Vectigal potes hoc jure vocare tuum.

101 *Etymon Anglicæ vocis Anger (ira.)*

Angitur iracundus homo: non re modo, verum
Nomine, quam prope sunt Anger & Angor

102 *De seipso. (idem?)*

Ludicra dum tracto graviter, studeo quasi ludens;
Dum leviter tracto seria, ludo studens.

103 *Tituli Muliebres.*

Vir quamcunque Comes duxit, Comitissa vo-
catur;

Non semper, nupsit cui Committissa, Comes.

Sic à Sole suum derivat Cynthia lumen:

Sol à se lucem, non aliunde, petit.

104 *Ad Zoilum.*

Laudatur, merito laudator, amatur amator.

Ergo ut lauderis lauda; ut ameris ama.

105

Media ætas.

Ultima dum fragilis ducatur linea vitæ,
 Certa tenet medium linea nulla locum:
 Quæ media a doctis & vulgo dicitur Ætas,
 Ante obitum quæ sit; dicere nemo potest.

106

Ad tinctorum quendam canescentem.

Qui Barbæ color ater erat, mutatus in album est
 Natura hoc fieri, non tamen arte solet.

107

Ad Aulum.

Elegit regem nova Roma superba Superbum:
 Quid mirum? reges nemo superbus amat.
 Dic cur tam pauci regum inveniantur amici?
 Sunt quoniam pauci regibus, Aule, pares.

Bed.

110

Ad D. Mauritium Griffin, popularem suum.

Angli *Bed* Lectum vocitant, Cambrique sepulcrum
 Lectus enim tumuli, mortis imago sopor.

109

Bibliotheca Rideri.

Quid sibi ridendi vult Bibliotheca Rideri?
 Unus enim non est Bibliotheca liber.
 Verborum cum theca sit hæc, non theca librorum:
 Lexicon hæc dici Dictionthea potest.

110

Numus. Ad I. Tovey, amicum suum.

Anum numum vocitant Criticque numisma Latini,
 Quod nomen Argivi quodque nomisma vocant?
 An quia, Nume potens? numerata pecunia vulgo
 Diceris, a numero tu quoque nomen habes?
 Annie, Deam quia te, Regina Pecunia, mundus
 Æstimat, & nummo Numen in esse putat?

111

In I. S. Favaram.

Ferrea cista auri custos tibi; ferrea porta?
 Ferrea tota domus: ferreus & dominus.

112 *De Flora Romana. Ad Grammaticos.*

PLacabant Floram pro frugum floribus olim
Romani & Floram constituere Deam.
Corporis atque bonæ nimium quæ prodiga famæ,
Dicitur ad frugem non rediisse bonam;
Sed se prostituens in primo flore juventæ,
Cum fructu florem perdidit ipsa suum.

113 *In I. Protum.*

Sicut ab arboribus ventoso sidere quassis
Autumni, frondes decutiuntur humi:
Omnia gesticulans moto sic vertice Calvus
Decussit crinem concutiendo caput.

114 *In Theodorum.*

Jam septendenos ageret cum rex David annos,
Fovit ei gelidum pulchra puella latus.
Cui ne dissimilis tanto videre Prophetæ,
Duxisti juvenem jam, Theodore, senex.

115 *Anglica plaga. 1603.*

Consumtis tot peste viris, tot peste puellis,
Vix habet in nobis jam nova plaga locum.

116 *Ad quandam.*

Quam natura tibi si tam fortuna faveret,
Ditior Anglorum fœmina nulla foret.
Tempore Trojani belli si nata fuisses,
Digna fuit causa Troja perire tua.

117 *In perjurum, proprio chirographo con-*
victum.

Pesfidus es, frustra verum qui voce negasti:
Cum prodat te non inficianda manus;
Major, ut in dictis constantia quam sit in actis,
Os idcirco tibi non dedit ora Deus.
Cui binas Deus ergo manus, linguam dedit unam,
Unde manus simplex est tibi, lingua duplex?

118 *In Cottulam Grammaticastrum.*

EXposuit græcam Labyrinthi Cottula vocem,
 Reddat in accessum quod Labor intus iter.
 Anagramma Romæ.

119 *Ad Carthaginenses.*

ANnibal in paucas fortunam distulit horas,
 Non bene Romanas præmeditatus opes.
 Vincere cum sciret, fortuna nesciit uti
 Pœnus homo, quamvis Afer, eoque vafer.
 Heu quantum Annibal nocuit differre parato?
 Servata est minima maxima Roma mora.

120 *In Magnum Clericum.*

PLurima degustat stomachus, nil concoquit æger:
 Sic tu scis, fateor, multa; nihilque sapis.

121 *In quendam Davis, jam nuper defunctum.*

DAviſis jactas te Londinensibus ortum,
 Cambrensem nactus ne videre patrem:
 Quæ tua nobilitas (saperes modo) summa fuisset,
 Respuis, obscuros & tibi quæris avos.
 Quam male cum patria tibi convenit, & bene terra?
 Namque pudet patriæ te; patriamque tui.

122 *In Aulum.*

Quicquid es, insipiens sapientibus, Aule, videris,
 Et stultis sapiens esse; quid ipse tibi?

123 *In Linum, Doctorem.*

CUr tu pro forma cupidè facis omnia; famam
 Negligis ingenii? Forma dat esse rei,
 Audeat hoc si quis Physicum, Line, dogma negare,
 Affero: Doctori Forma dat esse tibi.

124 *In Thaida.*

OUtinam vel bella minus, bona vel magis esses:
 Turpius est pulchra nam meretrice nihil,

125 *Polygraphus Anonymus.*

CUm premeret te dira fames, urgeret egestas,
 Pinderet & fauces infatiata sitis; Dis-

Distrahit miseros, distractior ipse, libellos.
 Quid faceres? svasit sic male svada fames;
 Paupertate tibi sic imperitante; coactus
 Es libros tu nunc edere, tunc edere.

126 *In Calvum.*

ECce tibi nulli superant in vertice crines;
 Nullus in infida stat tibi fronte pilus.
 Omnibus amissis à tergo & fronte capillis:
 Quid tibi jam restat perdere, Calve? caput.

127 *Ad Claudium & Linum.*

Nil nisi velle deest bonus ut sis, improbe Claudi:
 Improbus ut, Line, sis, nil nisi posse deest.

128 *Ad G. R.*

SIve Georgius in nostro vis esse libello, Nom.
 Quam lente in versum progrediare vides,
 Siye tui generis celebrarem carmine laudes, Gen.
 Difficilis fieret mentio crebra tui.
 Seu meritas vellem versu tibi reddere grates, Dat.
 Nulla tibi posset gratia digna dari.
 Est bene, quod versu non accuseris in ullo; Acc.
 Hac una nomen conditione placet.
 Si te appellari malles, generose Georgi; Voc.
 Semper in extremum conjiciere locum.
 Hei mihi, sermones tecum producere longos, Abl.
 Non possunt ullo carmina nostra modo.

129 *Militat omnis amans.*

Non male militibus meretrices contulit Aulus:
 Mars locat armatum corpus; inerme Venus.

130 *Sacramentum militare.*

Sacramenta vocant sacra juramenta Latini.
 Quæ præstat lecto bellica turba duci:
 Si Sacramentum nil est nisi juramentum,
 Sacramenta quidem plura duobus erunt.

131 *In Alanum, & avarum & maucum.*

MUnera si gratis manco donaris Alano,
Fiet centimanus, qui modo mancus erat;
Si tamen exspectes aliud pro munere munus;
Quamvis centimanus sit, tibi mancus erit.

132 *Regum status.*

DUm non vult alter, timet alter dicere verum
Regibus. O miserum Regis in orbe statum!

133 *Vis, Jus. Ad D. Guil. Jones L. C. Cognatum suum.*

VI jus adversum, Vis adversaria Juri,
Inversum adversum nomen utrumque sibi.

134 *In Marcum.*

UXores, viduas, ancillas, scorta puellas
Diligis; uxorem negligis ipse tuam,
Inter tam variæ Veneris certamina, quare
Quod licet, hoc solum non tibi, Marce, libet?

135 *Desperate debet.*

Debitor*Uxoris quis non? solvendo quis autem?
Uxori solidum (g) solvere nemo potest,
(g) Solvendo esse non intelligitur, nisi qui solidum po-
test solvere. Jabol, de verb. sign. L. Solvendo.

136 *In Culianum.*

VIr sapiens (b) miraculum: Hodie miracula cessant;
Hoc igitur nostro tempore nemo sapit.

At, Culiane, sapis: quare miracula nondum
Cessant; aut nondum tu, Culiane, sapis.

(b) Cic. de Divin. lib. 2.

137 *In Marcum, hominem venustum.*

Marce, tui patrem Venus improba adussit; ut esses
Ex aliqua saltem parte venustus homo.

138 *In Adr. V.*

Ridiculos versus, ridenda Epigrammata scribis,
Ridendum in quibus est ridiculum nihil.

Nullus

Nullus in his jocus est, at risit lector: id ipsum
Risit, in his nullam versibus esse jocum.

139 *Ad quendam Grammaticastrum.*
Ego, tu, ille.

NULLUS homo est, qui se non præferat omnibus
unum,

Hinc personarum prima vocatur Ego.

Præsentem laudas, absentem lædis amicum:

Scilicet hinc mihi, Tu proximus Ille tibi.

140 *Petite, & dabitur vobis.*

QVÆ fuit a Domino promissa petentibus olim
Gratia, nunc solis dantibus illa datur.

Dant homines hodie gratis nihil; omnia gratis,

Ex nihilo nil fit; da, dabiturque tibi.

Date, & dabitur vobis.

141 *Conjuges, Liberi, Parentes.*

SUNT unum vir & uxor, erant duo corpora: ad
unum

Corpus erant, duo sunt, filius atque pater.

142 *In Marcum Causidicum.*

IPSE tibi causas dicis; non, Marce, clienti;

Qui tibi Londinum, non sibi, portat opes.

Certa tibi lex est; lis est incerta clienti:

Tu lucri, damni certus & ille sui.

143 *Ad Patrem.*

VIR quanto præstantior est, quam foemina, tanto
Parte mei natus sum meliore tuus.

144 *In Atilum.*

ATILUS antiquos referens ab origine mores,

Conjugis inclusæ vir dominusque suæ est,

Scilicet hoc præstat mulieri, quod Deus Evæ

Dixerat: Ærumnas multiplicabo tuas.

145 *Qualem uxorem velit. Ad amicum suum.*

G. Guil. Batton.

Hanc volo, quæ facilis sit amari, eadem sed amare
Difficilis; bello corpore, mente bona.

Rivales in amore volo; mereatur amorem

Multorum quod amo; nil ego solus amem.

146 *Ad quendam, quod nullos sibi similes liberos
gigneret, conquerentem.*

Visne tibi similem generari ex conjuge prolem?

Uxorem primo quære tibi similem.

147 *Ad Maritos. De amore conjugali.*

Cum pater uxorem noster sibi sumeret Evam,
Quem plus diligeret conjuge, nemo fuit.

Ego maritalis summus, velut ordine primus,
Patrius est, nata prole, secundus amor.

148 *Epitaphium Draki.*

Relligio quamvis Romana resurgeret olim,
Effoderet tumulum non puto, Drake, tum.

Non est, quod metuas, ne te combusserit ulla
Posteritas: in aqua tutus ab igne jaces.

149 *Epitaphium nobilis pueri avo & patre
superstite defuncti.*

Non servat methodum, Logicæ mors nescia no-
stræ,

Occidit ante patrem natus, avumque nepos.

150 *Epitaphium Mauri.*

Corpus mente sua caret, & mens corpore Mauri:
Maurus utroque caret; nil nisi nomen habet.

151 *Epitaphium Pyrami & Thisbes.*

Abstulit hunc vobis mors, hostis amica dolorem,
Qui mortem vobis attulit ante dolor.

152 *Morus moriens.*

Abscindi passus caput est à corpore Morus;
Abscindi crines noluit à capite.

153 *Tres linguae crucifixæ.*

Lingua Pelasga artis custos, Sophiæque vetustæ;
Romana imperii; tertia lingua Dei.

154 *Don Antonio, Rex Portugallie.*

Inter te regnumque tuum divortia nuper,
At sine consensu, facta fuere, tuo,
Dicere de regno potes ipse tuo, quod & olim
Christus (i) de regno dixerat ipse suo.
(i) Regnum meum non est de hoc mundo.

155 *Alexander, Aristoteles.*

Maximus hic Regum, doctissimus ille Sophorum;
Magnus Alexander, Major Aristoteles;
Doctus Alexandrum meliorem reddidit ille;
Non hic majorem magnus Aristotelem.

156 *Plato.*

Quæ primum in labris pueri sedere Platonis,
In libris residens usque Platonis; apes.

157 *Georgica Virgilio.*

Carina de terris scribis, Maro, culta colendis,
Tu lectoris agros ingeniumque colis.

158 *Persus Poëta.*

Scripta tenebrofi lego, non intelligo, Persi;
Lectores nimium negligit ille suos.

159 *Tacitus.*

Veracem fecit probitas, natura sagacem;
Obscurum brevitatis; te gravitasque brevem.

160 *Ad Martialem.*

Dicere de rebus, personis parcere nosti.
Sunt sine felle tui, non sine melle sales,

161 *Ad Patriarcham.*

Semper dum tua Laura legetur, lis erit, utrum
Tu Laura, lauro dignior anne fores.

162 *Plinius a Ph. Hollando medico Anglice
versus.*

Plinius est longus, quia multa; brevis, quia mul-
tum

Scribit; at Hollandus (k) longior, & (l) brevior.

(k) Quia plenior. (l) Quia planior.

163 *De Cicerone. Ad Catullum.*

TU quod dixisti, Verum; verumque, Catulle,
Quod prædixisti de Cicerone; fuit.

164 *In Historicos hujus seculi. Ad D. Th. Sacke-
ville, Comitis Dorcestriæ filium.*

Mendacem historico non esse satis fuit olim:
Mendacem contra nunc satis esse sat est.

Hic negat, alter ait: credet miserabilis utri
Proxima posteritas? hic ait, ille negat.

Scinditur historicum studia in contraria vulgus;
Vixque minor constat cui sit habenda fides.

165 *Reges. Populus.*

LAbitur indocto populus sub principe: sicut
Præcapitis titubant ebrietate pedes.

166 *Senatus.*

Rex regnat solus, cur non regit omnia solus?
Qui regit & regitur, rectius ille regit.

Historia.

167 *Ad D. Th. Sackeville.*

Historia versando peritus, id absque periculo,
Quod docti damnis experiuntur, habes,
Nec tam multa gravis rerum experientia longo
Tempore, quam parvo te docet historia.

De Diæta.

168 *Ad D. Joan. Harington, equitem.*

St tarde cupis esse Senex, utaris oportet
Vel modico medico, vel Medice modice.

Sumta,

Sumta, cibus tanquam, lædit medicina salutem:

At Sumptus prodest, ut medicina cibus.

169 *Pares Franciæ.*

Non omnino pares estis tamen est quoque quæ-
Imparium paritas imparitas Parium. (dam

170 *P. Magnus. C. Major. F. Maximus.*

Maximus hic Magno minor est, Majoreque major:
Quis fuit istorum maximus ergo trium?

171 *Ad doctissimum D. Thomam Sacheville, Comi-
tis Dorcestriæ filium.*

Judicium ingeniumque tuum describere versu,
Ingeniumque mihi judiciumque deest.

Judicio, ingenio polles, potes omnia, si non
Fallor ab ingenio judicioque meo.

Judicium ingeniumque meum quodcunque sit, haud
sum

Falsus in ingenio judicioque tuo.

172 *De seipso. Ad D. Sam. Danielelem
Poëtam.*

Si bona non facio, quid mirum, Epigrammata: nun-
quam

Verificans unguis rodo, caputve scabo.

173 *Quinquè sensus.*

Quinqve voluntatisque voluptatisque ministri,
Officium faciunt, an magis officiant?

174 *Visus.*

Quo similis menti magis est, magis avocat, illam
Vifus, & ad nutus ducit agitque suos.

175 *Auditus.*

Quam cito vocalis vanescit in aure voluptas?

Quæ velut aura venit, quæ velut aura fugit.

176 *Odoratus.*

Os oculosque inter, naris gnarissima, quiddam
Carnale, & quiddam spirituale sapit.

177

Gustus.

Quo vis ut gustus major sit in ore voluptas,
Hoc tibi constabit pluris, emenda fame.

178

Tactus.

Est qui delectet nos tantum, est quique titillet
Tactus: & hic juvenes afficit, ille senes.

179

Objecta sensuum.

Visa, audita, olfacta mihi, gustataque, tacta
Afficiunt sensus inficiuntque meos.

180

Tactus & Gustus.

Sunt qui nare nihil, sunt qui nihil aure juventur:
Sunt etiam quorum lumina luce carent.

Gustu autem tactuque caret cur nemo? tuetur
Ille individuum sensus, at hic speciem.

181

Epigramma Satyra.

Nil aliud Satyræ quam sunt Epigrammata longa:
Est præter Satyram nil Epigramma breve.

Nil Satyræ, si non sapiant Epigrammata, pungunt:
Nil Satyram sapiat, nil Epigramma juvat.

182

Mutus.

Labra movet, veris non verberat aëre verbis:
Quid velit, interpretes dicat Apollonius.

183

Cæcus & Surdus.

Cur oculis pollet magis hic, magis auribus ille?
Hic oculis audit, auribus ille videt.

184

Dentes & Linguae.

Dens quasi dictus edens, lingua a lingendo vo-
cata,

Traxit ab officio nomen uterque suo.

185

Phœnix & Vipera.

Tu pereundo paris viventem mortua Phœnix?
Vipera vi pariens, tu pariendo peris.

186

Bombyx.

Arte mea pereo, tumulum mihi fabricor ipse,
Fila mei fati duco, necemque neo.

187 *Dextra.*
SIve quid accipio seu do, cur porrigo dextram?
 Ne, mea quid faciat dextra, sinistra sciat.

188 *Læva.*
ALævare datum nomen tibi, Læva; laboris
 Impatiens longi, desidiofa manus.

189 *Dies Solis.*
QVæ prima emicuit lux, nondum Sole creato,
 Unde fit, ut Solis dicta fit illa dies?

190 *Terra di Lavoro.*
PLena voluptatis, tellus Campania quondam,
 Cur hodie nomen, Terra Laboris, habes?

191 *Vestes.*
ANtiquata viget novitas, renovata vetustas
 Nascitur, & veteres nunc novitate placent.

192 *Vinum.*
Anguſto tristem pellens ex corde dolorem,
 Tu cor lætificas lætificando meum.

193 *Ovis.*
Seu caro, seu corium, foetus, simus, alea, chorda,
 Lanave, lacve deest, omnia præstat ovis.

194 *Agrorum stercoratio.*
Vile excrementum stercus, sed inutile non es;
 Tuntimento das alimenta meo.

195 *Harmonia.*
Inter dissimiles voces concordia major
 Quam similes: Hominem vir mulierque facit.

196 *Pfittacus.*
Si rerum sit fas invertere nomina, *Parres.*
 Garrulus inverso nomine *Prater erit.*

197 *Atramentum & Charta.*
Certius ut feriat dubios color ater ocellos,
 Poscit ab opposito lumen operaque suo.

198

Comædia.

Indicat in scena nostros Comædia mores:
Non habet in nobis fabula ficta locum.

199

*Palliatuſ & Togatuſ.**Palliatuſ.*

Longiuſ a terra quam noſ ſunt pallia noſtra:
Togatuſ.

Verro toga terram, menſ ſuper aſtra volat.

200

Satyra.

Idem qui legum, Satyrarum finiſ, idemque
Principium, mores hoſ genuere mali.

201

Eunucluſ.

Teſtibus exſectiſ periit mihi maſcula virtuſ.
Me tamen eſſe virum mentula (m) teſtiſ erit.
(m) Faſſum teſtimonium.

202

Clepsydra.

Clepsydra mentitur veriſſima: nempe foramen
Tempore ſit ſemper majuſ, arena minor.

203

Mercator.

Dives utrum pauperne ſit, haud mihi dicere
promptum eſt.

Qui ſpeſ infido credit opesque mari.

204

Libido.

Deformem nigra formoſam nocte videri,
Non nox atra facit: cæca libido facit.

205

Dominæ.

Quo magiſ uxori dominatur nemo vir, unuſ.
Uxorem Dominam cur vocat ille ſuam?

206

Mileſ.

Inſigit Maſ multa licet tibi vulnera, non tam
Maſ nocet armatuſ, quam tibi nuda Venuſ.

207

Exercituſ.

Genſ ingeſ, fidei maleſida immaniſ, amantque
Cædiſ, & humano ſanguine tineta manuſ.

208 *Amantium lacrymæ.*

HUmorem fervens ex lingno expellit ut ignis,
Ex oculo lacrymas elicit intus amor.

209 *Stella.*

IMpare qui numero gaudet, mihi credere par est,
Impare quod numero condidit astra Deus.

210 *Venetia.*

UT mare nil nisi aquæ, cælum nihil est nisi stellæ;
Sic sunt Venetiæ nil nisi divitiæ.

211 *Lyra.*

INdam diversis cum sit concordia chordis;
Tam discors hominum non pudet esse genus?

212 *Auceps.*

EXcipe crudelem, qui ludere nescius, ignem,
Cuncta elementa tuis dant alimenta jocis.

213 *Echo.*

VOcem nulla potest ars sculperè, pingere nulla:
Sola repercussos exprimit Echo sonos.

214 *Speculum.*

Fingere non Phidias nec Apelles pingere motum
Novit: tu Phidia plus & Apelle facis.

215 *Echo & Speculum.*

NIl in se, præter vocem, vitale habet Echo?
Ut vivat speculum, non nisi voce caret.

216 *Musica. Ad amicum suum D. G. Jamies.*

OPtima Musarum est; reliquis idcirco negatum
Artibus, a Musis Musica nomen habet.

217 *Ad D. Henricum Fanchew, Equitem, Musarum Mæcenatem.*

TRes tibi donavi (n) libros: Tu tres mihi libras,
Nullus adhuc nostrum carius emit opus.

(n) Exemplar primæ editionis.

Albion.

128

Ad Regem.

Distracta imperiis olim fuit Anglia septem:
 Divisa in partes Insula tota novem.
 Infelix quondam divisa Britannia, sub te
 Principe jam felix, Albion (o) Olbion est.
 (o) Beatum.

JOANNIS AUDOENI,
 EPIGRAMMATUM
 LIBER TERTIUS.

1 *Ad Illustrissimam & laudatissimam Dom. Ma-*
riam Neville, Patronam suam.

TE quoties laudo, nil mentior, at nec adolor;
 Laudis nulla capit plusve, minusve cupit,
 Non quæris, sis laude licet dignissima, laudem:
 Est inter laudes hæc prope summa tuas.

2

Ad eandem.

QVæ parientis onus, cum nondum nata fuisses,
 Matris erat; nunc es nata parentis honos.

3

Ad Lectorem de suo libro.

NE tibi non placeant, vereor, mea carmina, lector
 Candide; ne placeant, lector inepte, tibi.

4

Elizabetha nuper Anglorum Reginae Vir-
ginis partus.

SCotia nobiscum gentem concrevit in unam;
 Iste tuæ partus virginitatis erat.

Est unire magis, quam multiplicare beatum;
 Tuque magis felix non pariendo parens.

5

Ad Hollandum, 1602.

TU non invita gessisti bella Minerva,
 Anglorum Pallas dum tibi ferret opem,

For-

Fortunæ totæ versa tuæ est, mors (alter Ulysses)
Pallada furripuit Palladiumque tuum.

5 *Ad Jacobum, Regem Britannia, &c.*

Aurea præfati venit jam Principis ætas,
Bruti indivisum qui diadema geras;

Et penitus toto divisos orbe Britannos
Veniat, & palmam pacis in orbe ferat.

Ut qui pacifice sentit, jam dicere possit:

Omne bonum nobis ex (p) Aquilone venit.

(p) Owenius enim Henric. 7. avus ex Boreali

Wallia: Jacobus 1. ex Boreali Britannia ortus.

7 *Ad Henricum Principem.*

Spes Britonum soboles tanto sperando parenti,
Dimidium matris, dimidiumque patris.

Nobilium exemplar, sed vixi mitabile, morum,

Quos cuncti, quamvis pauci imitentur, amant:

Insevitne tibi pater hoc ex traduce mores?

An dedit in mammis mater? utrumque puto.

8 *Βασιλικὸν δῶρον.*

Nil opus autorem hunc; nihil hunc laudare li-
bellum

Hoc opus autorem laudet, hic autor opus.

9 *Ad Dominam Mariam Neville, Comitissæ Dor-
cestriae filiam, patronam suam.*

Dicit te Speculum formosam, Fama pudicam;
Mentitur Speculum nil tibi, Fama nihil:

Fama malum, quo non aliud velocius ullum,

Ausa tamen de te nil male Fama loqui.

10 *De Sicilia ejusdem filiola. Ad eundem.*

Nemo potest animi mores effingere pictor:

Attamen hæc mores monstrat imago tuos.

11 *Ad Lectorem candidum.*

Optima quæ bona sunt; mediocria, quæ mala, dices
Carmina iudicio, lector amice, tuo.

Ad lectorem nigrum.

Pessima quæ mala sunt: mala quæ mediocria, di-
ces
Carmina censura, lector inique, tua.

12 *Herculis bivium. Ad nobilem opt. spei adolescen-
tem D. Thomam Pauckering.*

Sunt qui in quadriviis triviisque insigniter errent;
Herculis in bivio maximus error inest.

13 *De virtute. Ad Mauritium Merick, cogna-
rum suum.*

Contemnit laudem virtus, licet usque sequatur
Gloria virtutem, corpus ut umbra suum.
Est etenim virtus aliquid, nil gloria: sicut
Est aliquid corpus, corporis umbra nihil.

14 *Horologium vite. Ad D. Joannem West,
amicum suum.*

Latus ad Occasum, nunquam rediturus ad Ortum,
Vivo hodie, moriat cras, heri natus eram.

15 *De Deo.*

Tantus es Euclides quantum comprehendere nescit,
Et talis, qualem nescit Aristoteles.

16 *De Atheo.*

Insipiens in corde suo: Non est Deus, inquit,
Dixit; at hoc nullus credidit insipiens.
Insipiens negat esse Deum si nemo, quis ergo
Atheus est? Nullum qui cupit esse Deum.

17 *Caritas.*

UT nisi quæ sit amans, conjux esse nulla fidelis:
Sic ibi nulla fides est, ubi nullus amor.

18 *Dives & Lazarus.*

Est in Evangelio, verum sine nomine Dives;
Pauper, ubi æternum, Lazare nomen habes.

19 *Crescit & multiplicamini.*

Primus homo fuerat primum res unica; postquam
Facta fuit mulier prima, fit ipse duo.

Divisum postquam Deus Evæ junxit Adamum,
Ante velut fuerat, non duo, at unus erat.

Multiplicavit eum primo Deus ergo: deinde
Unuit, ut posset multiplicare magis.

20 *Unio.*

UNio divina est, divisio Dæmone nata:

Unus enim DEUS est, Dæmones inumeri.

21 *Tres tentatores.*

TRes, Caro & immundus Mundus, Satanasque,
Sophista:

Hic Logicus, reliqui Rhetores ambo boni.

22 *Spiritus & Caro.*

Spiritus huc illuc, miserum Caro me trahit: in me
Divisum Imperium cum Jove Cæsar habet.

Pax vobis; siquidem vos inter amabilis esset
Pax semel, in toto pax simul orbe foret.

23 *Homo homini Lupus, Homo homini Deus.*

Humano generi Lupus & Deus est homo, quare?
Nam Deus est homini Christus, Adamq; lupus.

24 *Verbum Domini.*

PAuca vident homines, Deus omnia prævidet; inde
Vanus homo loquitur sæpe, Deusque semel.

25 *Via lata & angusta.*

Jussit ad angustam magno conamine vitam
Ire per angustam litera sacra viam.

In latum te angusta locum nisi semita ducat,
Ducet in angustum te via lata locum.

26 *S. Johannes Baptista.*

ANte ivit Christum Baptista, ut nuncia Phœbi
Solem præcurrit lux, aperitque diem.

27 *De Autumno. Ad Amicum suum, D.
Richardum Conok.*

Aufert arboribus frondes Autumnus, & idem
Fert secum Fructus; nos faciamus idem.

28 *Miseria vita.*

Vivere quisque diu, quamvis & egenus & æger,
Optat, id est, miserum se cupit esse diu.
Invitus moritur miser & miserabilis Irus;
Hoc est, invitus definit esse miser.

29 *De Natura & Gratia. Ad Theodorum Prisë,
Theologum, cognatum suum.*

Natura obscuram lucem, ceu Luna, ministrat:
Sol quasi, splendidus Gratia lumen habet.

30 *Catechismus.*

Sunt credenda tibi bis iæx, orandaque septem,
Si salvus fieri vis, facienda decem.

31 *Dives.*

In cœlum dives cur raro ascendit? Avarum
Pœnitet expensi, præterea nihili.

32 *(q) O spes fallaces! Ad fratrem suum, The-
mam Owen.*

(q) Cic. pro Milone.

Ores fallaces potius! spes vero fideles.
Quæ vel ad extremum nos comitantur iter.

33 *Redemptor.*

Unus homo nobis moriendo restituit rem,
Unus ut humanum perdidit ante genus,
Non ponebat enim rumores ante salutem,
Opprobrium causa factus, Adame, tua.

34 *Spiritus Sanctus.*

Ut semper veniunt ad candida recta columbæ:
Ingreditur Sanctus candida corda Deus.

35

Fortitudo.

SCit Sapiens, vult cuique suum jus reddere justus;
Qui facere hoc audet, Fortis habendus erit.

36

De Rege.

LEx sine Rege, velut lumen sine Sole fuisset:
Rex sine lege, velut sol sine luce foret.
Grex Regem primo legit, Rex cum grege legem
Condedit: hinc legem Rex regit, atque gregem.

37

Cambro-Britannus.

Tecum participant in nomine Scotus & Anglus:
Jam tu non solus, Walle, Britannus eris.

38

Anglo-Scoti.

Legibus inter se varii qua lege coibunt;
Jungat eos Regni, lex ea summa, Salus.

39

Ad Regem.

Henricus Rosas, Regna Jacobus.

Candidus Anglorum celebres rubeosque colores
Secum Cadmæas fonservere manus;

Ovigenæque velut Gemini, duo sidera, fratres
Alternas obeunt lucis in orbe vices.

Utque dies nocti succedit, noxque diei,
Utraque sic, victrix, victaque sæpe Rosa est:

Donec quæ mater (r) Cambrorum Mona vocatur,
Insula quam Taciti non tacuere libri.

(Felix prole parens) Oweni (s) Britonis ortu
Clara *Des dŵgŵr* nomine reque tulit.

Ejus enim æterna Princeps de stirpe Rosarum
Altera cui conjux, altera mater erat.

Post varios casus & mille pericula regni,
Connubio stabili junxit utramque Rosam,

Quarum ne fierent aliquo divortia casu,
Regna maritali tu, velut ille Rosas

(r) Proverbiū Britan. *Mon man Gymri.* (s) Hic
non indignum notatu est Britannico sanguini terge-
minum

minum Britanniae Imperium occulto quodam fato restitutum, 1. Regn. Scotiae per Stuartum, 2. regnum Angliae per Tyderum, 3. Imperium totius Insulae per Jacobum I. ex utroque oriundum.

40

Apocalypsis Joannis Nap.

Nonaginta duos durabit mundus in annos;
Mundus ad arbitrium sistat obitque tuum,
Cur mundi finem propiorem non facis? ut ne
Ante obitum mendax arguerere sapias.

41

Deus homo.

Nec sentire Deus, nec mortem homo vincere solus
Posset; utrumque facit Christus; utrumque
fuit.

42

Mors.

Mors, vitanda malo, sancto invitanda, malorum
Ultimus est finis, vel sine fine malum.

43

Deus.

Immensus DEus est, quia scilicet omnia mensus;
Innumerabilis est, unus enim Deus est.

44

Miraculum.

Miretur populus miracula: nil mihi mirum est,
Præter eum, solus qui facit illa, Deum.

45

Adami lapsus.

Theologis animam subjecit lapsus Adami,
Et corpus Medicis, & bona Juridicis.

46

Ad Adamum.

EVa, parens mortis, malo te falsa fefellit;
Dumque tuum strueret VÆ, tibi dixit AVE.

47

Ad Prædicatores.

Nuncius auroræ, prius ut se suscitet ipsum
Quam reliquos, alas explicat ante suas:
Gallorum ritu, verbi sic præco feracis,
Ut moveas alios, tu moveare prius.

48

Tentator.

Sic, velut in muros mures, in pectora Dæmon
Invenit occultas, aut facit ipse vias.

Mortificatio.

49

Ad amicum quendam senescentem.

Mortuus ut vivas, vivus moriaris oportet:
Affluere ergo prius, quam moriari mori.

50

Hodie.

Hoc quod adest Hodie quod nomen habebat heri?
Cras.

Cras hodie quodnam nomen habebit? Heri.
Cras lentum quod adest nunquam, nec abest procul
unquam,

Quonam appelletur nomine cras? Hodie.

51

*(1) Tibi soli peccavi.**(2) Psal. 51.*

Subditus in legem peccat Regemque Deumque;
Rex peccat soli (rex quia nempe) Deo.

52

Oratio.

Christus uti clausis penetraverat ostia portis;
Sic cæli penetrant invia claustra preces.

53

*Mariæ Magdalenaæ fletus; Ad cognatum suum
Elizabethæ Win.*

Vana vivendo vagus quidquid peccavit ocellus
Abluit erratis illacrymando suis.

Fallor, an hinc oculo plorandi infusa facultas,

(u) Peccandi quoniam fons & origo fuit?

(u) Gen. cap. 3. v. 8.

De spe & metu.

54

Ad Amicum suum Robertum Bowyer.

Divitiæ atque metus comites sunt; spes & egestas;
Res optanda tamen spes, miseranda metus.

Pauperis est sperare, timereque divitis esto.

Quam sperare equidem mala timere modo.

55 *Me-*

Methusalem mortuus est.

Non vixisse diu vita est; at vivere vita est:
Quid iuvat ergo diu vivere, deinde mori?

*De Jure & Justitia. Ad amicum suum
Ric. Trevor LL. Doct.*

Trita magis Juris quam Justitiæ via; quanquam
Juris iter longum, Justitiæque breve est.

De hominum Intemperantia.

*Ad Joannem Gifford. Medicinæ Doct.
doctiss.*

Qui fragilem longe cupimus producere vitam,
Luxuria vitæ cur breviamus iter?

Nolumus, & volumus produci tempora vitæ;
Nolumus a nobis, malumus a Medicis.

Ad Ponticum.

Pauper es? haud facile est fieri tibi, Pontice, di-
tem:

Dives es? ex facili ditior esse potes.

Pharisæi.

Dicunt, non faciunt: culpa est ea temporis hujus:
Fiat quod dictum est; dicitur inde Fides,

Libertas.

Si felix est qui, quæ vult, habet omnia, quare
Velle solent homines, quæ voluisse dolent?

Virtus libertas est optima maxima; solus
Ille potest ut vult vivere, qui bene vult.

Christus Cujas.

Conceptus Nazareth, ortus tibi conscia Bethlemæ:
Ut quot Naturæ tot tibi sint patriæ.

Christus crucifixus.

Erranti, pereunti, ægro, via, vita, salusque
Mors mortis pendens in cruce, cruxque crucis.

63 *Cruce Christi.*
CRux Christum tulit ista, crucem Christus tulit
 istam;

Pro nobis illum crux tulit, ille crucem.

64 *De Religione. Ad amicum suum, Joan.
 Bowman Theolog.*

ARbor amœna pio platanda in pectore, cujus
 In radice labor, fructibus insit honor.
 Primus in orbe Deos fecit timor, haud male dictum;
 Est etenim pietas prima, timere Deum.
 Vel in radice est pietas, in vertice mel est:
 Relligionis enim fons timor, amnis amor.

65 *In Prodigum & Parcum,*
Hic nisi post mortem veteri nil donat amico:
 Ille nihil, quod post funera donet, habet.

66 *Conjuges.*
UXorem vir amato, marito pareat uxor:
 Conjugis illa sui Cor; Caput ille suæ.

67 *Studium.*
AMentes fiunt studiosi scire studentes:
 Nemo fit insanus, qui studet esse bonus.

68 *Memento mori.*
Mors incertarum rerum certissima; cunctis
 Incertum quando, certum aliquando mori.
 Nullus ab occasu procul est homo, nullus ab ortu:
 Nec tamen illius, nec memor hujus homo.

69 *B. Virgo.*
SPonsa Dei Patrisque parens, & filia Fili,
 Virgo, nec absque viro, mater, at absque viro.

70 *Quod rarum, non carum.
 Paradoxon.*

Commune est vitium, tamen est nil carius illo,
 Res vilis Virtus, rara sit usque licet.

71

Bellua.

Præteriti spes nulla manet: spes sola futuri;
 Res abeunt sine spe; spes redeunt sine re.
 Dum nos præteriti dolor angit, cura futuri:
 Bellua quod præsens est capit; illa sapit.

72

Ratio.

Rerum regina est ratio naturaque mater:
 Nam natura parit res, ratioque regit.

73

Natura.

Natura ingenuit rationem provida nobis;
 Naturam ratio nos jubet ergo sequi.

74

Παῖπνοσία.

Libertas, infanda loqui, tibi sola videtur:
 Libera lingua sat est, cui tacuisse licet.

75

Ad Marcum. Problema.

Sis bonus, anne malus, quid refert, Marce? pre-
 muntur
 Jure mali, quasi vi; vi quasi jure, boni.

76

In Antiquarios & Novatores.

Sulta hæc invidia est, cui cuncta recentia sordent,
 Invida stultitia est, cui nova sola placent.

77

Mors Christiana.

Ducet ad æternam te mors brevis, ut via, vitam.
 Ut mors interitus non sit, at introitus.

78

Ad Christum.

Anchora spei nostræ, navis fidei, mare amoris,
 Terræ sal, cœli sol, animæque salus:
 Morte tua letum deletum, mortua mors est;
 Crederet ad mortem quis potuisse mori?

79

Philautia.

Crimina qui cernunt aliorum, nec sua cernunt;
 Hi sapiunt aliis, desipiuntque sibi.

80 *Vita Sanctorum.*

Sanctorum vitas legere, & non vivere, frustra est:
Sanctorum vitas degite, non legite.

81 *Patria.*

Est domi ubique bonus, sapiens non exulat us-
quam,

Omne solum Forti patria & omne salum.

Exilium est, ubicunque male est, patria est, ubi contra;
Patria ubique bonis, exiliumque malis.

82 *In Atheum.*

Præteriti tibi nulla fides, spes nulla futuri;
Præsentis totum te tenet unus Amor.

83 *In Hæreticos.*

Aurum Virgilius de stercore colligit Enni;
Ex auro stercus colligis Hæreticus.
Laudationis multiplex effectus.

84 *Ad Encomiasticos.*

Fit melior laudando bonus, peiorque malignus,
Cautior astutus, simplicior stolidus.

85 *Festina lente.*

Nemo repente bonus: lente properare memento,
Virtutis quamvis ingrediare viam,
Utile consilium fit, inutile festinanti.

Corrige primo animum, corrige deinde, tuum.

86 *Invidus & Stultus.*

Deficit hunc ratio recta, illum mens bona; verum
Cernere dum non vult ille, nec iste potest.

87 *Λόγος.*

Sermo DEI totus Ratio est, Oratio noster:
Sic λόγος est, loquitur quod DEUS, & quod ho-
mo.

88 *Opinio.*

Credere vult nemo, credit sibi quisque, fidemque,
Sicut amicitias, utilitate probat.

89

Ars.

Naturæ in gremio Deus artes condidit; ut sit
Usque quod acquirat quodque requirat homo.

90

Apologia Adami.

CUr ego peccavi quasi princeps arguor autor?
Non ego peccavi primus; at Eva prius.

91

Serpens.

Tentator tuas ipse, tuus deceptor es idem,
Te qui tentaret, tu nisi, nullus erat.

92

Semper eadem.

UNus in orbe Deus semper fuit, est, erit idem:
Cur non est eadem semper & una fides?

Una fides, vel una dies, illuminet orbem;
Unus ut in Cœlo Sol, & in orbe Deus,

93

Oratio mentalis.

SIt purum pectus domus oratoria, lector
Spiritus, & mundum cor manuale precum.

94

Quinque vulnera.

PHarmaca sunt potius, quam vulnera, vulnera
Christi,

Curat enim plagis vulnera nostra suis;

De Amicitia adumbrata.

95

Ad D. Joannem Sukling, amicum suum.

DUm sol obscurum radiis illuminat orbem,
Est individuus corporis umbra comes.

Quamprimum liquidus nebulis offunditur aër,
Ecce repente tuum deserit umbra latus,

Te bona dum splendet fortuna, sequuntur amici;
Ut te, tum lucet sol, solet umbra sequi.

96

Virtus.

Non est in verbis virtus, at rebus inhæret;
Res sunt, non voces, Spes, Amor, atque Fides.

97

Rachel.

Sublato natus quare fles; cumque dolore
Perdis eum, quem non absque dolore paris!

98

Salomon.

Prudentes quot sunt, tot sunt miracula mundi;
Nam mirabilius quid sapiente viro?
At Salomon septem senior Sapientibus: ergo
Octavus non est, primus at esse potest.

99

Spes.

Cum mihi sit casus prudentia nulla futuri,
Quid speremve boni, quid metuamve mali;
Non despero tamen, cum spe mihi spiritus exit:
Producit vitam spes mihi longa brevem.

100

Ignorantia humana.

Vivere vix quid sit novi: mirum nihil ergo,
Si quid sit nasci nescio; quidve mori.

101

Christus Via.

Ad cœlos vis scire viam tibi qua sit eundum?
Ad te descendit cœlitus ipsa Via.

102

De Fama. Ad Nobiliss. max. spei adolescentem, D. Joan. Harington, Equitem.

Quærito virtutes, virtutum spernito laudes:
Nominis est etenim gloria, non hominis.

103

Fides.

Pythagorea Fides est inter dogmata princeps,
Quicquid Pythagoras dixerat, Ἀγρός ἔφα.

104

Æquanimitas.

Seu mortis venit, seu nondum venerit hora:
Culpa est velle mori; culpaque nolle mori.

105

*Tempora novissima. Ad amicū suū
Carolū Raves, Theologia*

Doctorum.

Tempora, si non erro, novissima prima fuerunt
Nempe novum tempus, cum novus orbis, erat.

Die

Dic mihi jam, veterum lector studiose librorum,
Hoc tempus nostrum sit vetus, ane novum?

106

Voluntas.

Vis bonus esse? velis tantum, fiesque volendo:
Is tibi posse dabit, qui tibi velle dedit.

107

Ad Solem.

Phœbe bis octogies terra pulcherrime major,
Innumerabiliter cum videre minor:

Qui mihi tantillo vermi, Sol tante, videris
Tantulus, heu videor quantulus esse tibi?

108

Probitas.

Vir sapiens plerumque bono est sapientior; esto
Dummodo sit melior vir sapiente bonus.

109

Homo.

Cor, nisi cura, nihil; caro nil, nisi triste cadaver:
Nasci, ægrotare est; vivere, sæpe mori.

110

Multiloquium. Ad Prædicatores.

Sermones crebri morum sunt signa malorum;
Nam quid opus verbis est, ubi facta fides?

111

Mors contra & secundum naturam.

Non prius auferres prolem, quam dura parentem
O Mors, naturam si sequerere ducem.

Naturam in vita, naturam in morte sequamur;
Vult Natura hominem vivere, vultque mori.

112

Eloquentia.

Facundus non est, qui multa, at qui bene dicit;
Ut nec fœcundus, qui mala gignit, ager.

113

Deus.

Ut prohibent oculum nebulæ discernere cœlum;
Sic vidit ob mentis nubila nemo Deum.

Nemo Deum vidit; pauci audivere loquentem:

Hinc tam rara (x) fides; at mage rarus (y) Amor.

(x) Fides ex auditu (y) Amor ex visu.

114 *Ad Ponticum.*

Sæpe rogas, quot habes annos: respondeo, nullos
Quomodo? quos habui, Pontice, non habeo.

115 *Ad Carolum Rives. Theolog. Doctorem,
veterem amicum. De Amore &
Amicitia.*

Natura a longa quod consuetudine differt,
Hoc ab amicitia, Carole, distat amor,

116 *Principes.*

Præ vobis pietatem & Relligionis honorem
Semper & antiquam fertis in ore fidem:
Relligio sed vos augendi accendit honoris,
Non restaurandæ Relligionis honor.

117 *O tempora? o mores!*

Cur accusat homo mores ac tempora, culpam
Moribus adscribens temporibusque suam?
Non in temporibus vitium est, aut moribus ullum,
Non vitiamur ab his temporibus, sed in his.

118 *Philosophia.*

Plurima scire volunt omnes, ac credere pauci.
Hinc multi credunt plurima, pauca sciunt.

119 *Malum infinitum.*

Mille modis morimur mortales, nascimur uno:
Sunt hominum morbi mille, sed una Salus.

120 *De Controversiis.*

Theologi certant, & adhuc sub iudice lis est;
O utinam lis sub iudice tota foret!

Theologi certant, & adhuc de iudice lis est:
O utinam lis de iudice sola foret!

Tanta vel in nobis utinam lis esset amoris,
Quantus, in hoc lacero tempore, litis amor.

121

Christus in Cruce.

IN medio Christus latronum quando pependit,
Aut nunquam, aut Virtus tunc fuit in medio.

122

Temporis filia.

Quod verum est, lateat quamvis, aliquando patebit,

Hinc & apud Graecos nomen ἀληθεία habet.

123

*De Medicina & Jurisprudencia. Ad Henricum
Martin. Doctorem V. Jurisprudenciss. & Joannem
Giffor. Doctorem Medicinæ peritissimum, amicos suos.*

Vivere naturæ si convenienter amarent
Mortales, medica nil opus esset ope.

Si saperent homines, rixis avidisque carerent
Litibus & queruli garrulitate fori.

Sic incompositus post serinia Bartolus iret,
Et mus illectum roderet Hypocratem.

124

Conjuges.

Discordes nos tota domus non continet ambos,
Concordes lectus non tamen unus habet.

125

Dies brevissima.

Una dies nostræ suprema brevissima vitæ:
Est etenim fini proximus illa dies.

126

Querimonia virtutis.

Rarus amoris amor, virtutis nullus amator;
In pretio pretium nunc in honore honor est.
Divitiæ prostant, emiturque pecunia nummis;
Et sua jam virtus præmia vilis emit.

127

Durus pater.

Ingnatum quo, dure parens, es parcior, hoc es
Largior; huic moriens omnia namque dabis.

128

Oratio ad Deum in Morbo.

Naturæ natura, Deus bone, cum mihi posse
Vivere sustuleris, da mihi velle mori.

129

Ad litigatores.

Si iudex tibi surdus erit, desertus ab'ibis :
 Et frustra, amissa lite, disertus eris.
 Judicibus plusquam juri studuisse juvabit ;
 Hos tibi, quam leges, conciliato prius.

130

In Brunonium.

Instituere patres ideo jejunia nostri,
 Ut caro spiritui pareat, ille Deo :
 Tu semper plena servas jejunia mensa,
 Spiritus ut carni seruiat, illa tibi.

131

Tempus.

Omnia fert ætas secum : aufert omnia secum :
 Omnia tempus habent ; omnia tempus habet.

131

Cessatio miraculorum.

Abbreviata Dei, siquidem miracula cessant,
 Est manus ? an potius nostra minuta fides ?

133

Ad Irum.

Vivere te semper velles ; tu vivere semper
 Non potes : at semper vivere velle potes
 At cum tam misere vivas, ego nescio quare,
 Velle licet possis vivere posse velis.

134

Scientia.

Judice me, soli semperque perinde beati
 Sunt, quicumque sciunt omnia, quique nihil.

135

Christus.

Fluis noctis ut est aurora, & origo diei ;
 Quo plus in vita dormio, vivo minus.

136

Quis tu ?

Quis oculos videam ipse meos, oculi mihi de-
 sunt ;

Qua mentem videam mens inea mente caret.
 Si mens ; una mei pars optima, nescio quid sit,
 Unde tibi possum dicere, sim quid ego ?

D 2

137 Re-

137

Regnum Cœlorum.

Regnum cœlorum, quo non patet amplius ullum,
Cur ad tam paucos pertinet? arcta via est,

138

Dolor & voluptas.

Cor corpusq; dolor præsens gravat usque, futurus
Suspensam cruciat, præteritusque juvat.

Præsens præterito juvat emta dolore voluptas:

Venturo præsens emta dolore nocet.

139

Petrus.

Ultimus in Solyma Kaiphas fuit urbe sacerdos:
Ut perhibent, Roma primus in urbe Kephas.

140

De somno.

Si somnus nihil est nisi mors, nil mors nisi somnus,
Quo plus in vita dormio, vivo minus.

141

Roma.

Incepto fratrem Cain orbe occidit Abelem,
Incepta fratrem Romulus urbe Remum,
Roma Remi polluta recens, ut mundus Abelis,
Sanguine: principium est Orbis & Urbis idem.

142

Hominis perfectio.

Unus cujusque rei perfectio summa
Est, ad principium posse redire suum.

Tunc igitur perfectus homo summeque beatus,

In Cœlum & terram quando revertat, ero,

143

*Domine, adauge fidem nostram.**(7.) Luc. cap. 17.*

Non augenda fides, potius minuenda videtur.
Vix cum sint homines tot, quot in orbe fides.
Sortitur sibi quique fidem, sibi quisque magistrum:
Nunquam plus fidei perfidiæque fuit.

Domine, diminue fides nostras.

144

In avarum.

Improbis Herculeum Nihil ultra transit: avarus
Plus ultra Caroli semper habere cupit.

145 *Bonum transcendens.*

TRanscendit Genus omne Bonum, nullisque te-
netur

Finibus; est igitur nullus in orbe Bonus.

146 *Omnia vanitas.*

DEfleret mores, si viveret Heraclitus,
Nostrique rideret tempora Democritus:
Quamquam ad ridendum curas & inania mundi,
Splenis Democritus non satis unus habet:
Ad casus hominum, lacrymarum rore rigandos,
Heraclite, oculi non fatis ambo tui.

147 *In Epicureos.*

SÆpe ego de Veneris juvenes brevitate querentes
Audi, & vitæ de brevitate senes.
Vita voluptatis brevis est, vitæque voluptas;
Qui pariter parvi pendit utramque, sapit.

148 *Opera.*

Qui bene fecerunt, illi sua facta sequentur;
Qui male fecerunt, facta sequentur eos.

149 *Initium sapientiæ timor.*

Speraret cœlos nemo, si nemo timeret
Infera, prudenti spem facit ipse metus.

150 *In Battalogiam.*

Non contentus eos, doctas quod inanibus aures
Vocibus, & tempus garrulitate teras;
Post longo enectum sermone levique propellum,
Temporis aggredieris de brevitate queri.
Oxonium redeas, melius distinguere discas;
Sermo quidem longus, non breve tempus erat.

151 *In eundem.*

Nulla sat ut Tulli est oratio longa disertæ;
Sic tua, Batta, brevis concio nulla satis.

152

In Polytheos.

O Stolidæ gentes, quæ vos dementia cepit,
Plures quam mundus esse putare deos?

153

De ingenio & studio.

Ingenium, studio si non acuatur, hebescit,
Ut telum, assiduam eos nisi præstet opem.
Ingenium studiis alitur, teritur quoque sicut
Tela terendo acuit eos, acuendo terit.

154

Nosce teipsum.

Qualis sit, talem se nemo intelligit; atqui
Se meminit puerum vir, juvenemque senex.

155

Ars longa, vita brevis.

UT solide sapiat, nulli sua sufficit ætas;
Mors prius a tergo, quam sapiamus, adest.

156

In Moranum senem.

Non discenda modo, sed dediscenda supersunt
Multa, Morane tibi, si bonus esse velis,
Dediscendo bonus discendove quomodo fias;
Difficile ætati cum sit utrumque tuæ.

157

Ad D. T.

Dupliciter miser es, quia felix ante fuisti;
Dupliciter felix, qui fuit ante miser.

158

Omnes querunt, quæ sua sunt.

Non quærit Christum Laicus; sua commoda quaerit.

Nec tu τὸν Χριστὸν Clere τὸ Χριστὸν amas.

159

In Brunonium.

Cui pestes testis divinæ creditur iræ,
Tam bene, Brunoni, qua ratione vales?
In promptu ratio est, qua non capitalior ulla
Esse potest, patriæ pestis es ipse tuæ.

160

Respice finem.

Respice principium potius, sed prospice finem,
Cælum suspiciens, despiciensque solum.

161 *Sensus, Ratio, Fides, Caritas, Deus.*

NIl sensus ratione carens; ratio fidei expertus;
Nil sine amore fides, nil amor absque Deo.

162 *De Prudentia. Ad amicum suum, D.
Thomam Bridges.*

UTilis in rebus prudentia semper agendis.
Una est virtutum ludimagistra trium.
Nempe bonum in vita quid sit, Prudentia monstrat:
Ut logice, verum quid sit in arte, docet.

163 *Ad Parentes.*

Sum tua, care pater, tua sum caro, mater in una
Carne mea duo vos, estis & una caro.

164 *Prudentia & Fortitudo.*

PRudentis cavisse viri est mala, ferreque fortis,
Ut mala non metuat iste, nec ille ferat.

165 *In sudore vultus tui.*

Mandere qui panem jubet in sudore diurnum,
Non dabit æternas absque labore dapes.

166 *De Fide & Caritate. Ad cognatum suum
Audoënum Gwyn, Theolog.*

ARbor uti plantanda prius quam fructus habendus;

Inter virtutes prima docenda fides.

Vita fide paritur, tamen haud sine amore; ut egenus
Spe vivit, sed non absque labore tamen.

Prima Fides igitur, princeps Amor est; quia magna
est,

Credere, sed virtus major amare Deum.

167 (a) *Si oculus tuus dexter, &c.*

(a) Matth. 5, 29.

SI quoties peccant dextri effodiantur ocelli,
Mundus in exiguo tempore luscus erit.

168 *Adverbia Christiana. Ad amicum suum*
Jo. Tovey.

Adjectiva parum profunt, Adverbia multum;
Non bona tam pensat quam bene facta Deus.

169 *Vitæ brevitatis.*

Infanti nondum nato per omne futurum
Judico, defuncto præteritumque seni.
Tollito præteritum de vita, tolle futurum,
Quantillum vitæ, quod tibi restat, erit?

Lex talionis.

170 *In Aulum.*

Majorum nunquam, Aule, legis monumenta tuorum:

Mirum est, posteritas si tua scripta legat.

171 *Tempus.*

Tempus edax rerum: nos & terit omnia tempus!
Nos terimus tempus: jam sumus ergo pares.

172 *Abundans cautela. Ad Michaellem Heyden*
amicum suum.

Nil temere facias, timide nihil, omnia caute:
Cuncta cito, fero nil, subitoque nihil,
Natura es timidus? fortem prudentia reddet;
Nemo cavenda timet, qui metuenda cavet.

173 *Joannes ad appositum.*

Concurrat veterum licet in te turba, potes tu
Hac omnes una vincere voce; nego.

174 *Justificatio.*

Justificat hominem sua facta fidesne fidelem?
Justificat solus facta fidemque Deus.

175 *Dies Judicii.*

Quo respondebunt homines, sed ad omnia, &
omnes,
Judicio tanto num satis una dies?

176

Ad Marianum.

Oderunt peccare boni virtutis amore:
Sunt igitur pauci nunc, Mariane, boni.
Improbitas tanti, probitas tam denique parvi
Penditur; ut probrum pene sit, esse probrum.

177

M. Magdalene fletus.

Surgunt ex uno fontes duo monte perennes,
Unde duplex falix labitur amnis aquæ.

178

De Anima.

Coelitus orta mihi mens, non ex traduce; nam si
Corpore cum reliquo mens oritur, moritur.

179

In Marcum.

In lecto tua vota facis, resupinus adoras;
Quid mirum, ignavas, Marce, perire preces?
Orantis quasi non orantis inania verba:
Sic audit, quasi non audiat illa Deus.

180

Infernum.

Ut niger in niveum nulla redit arte colorem,
Spectat ab inferno sic via nulla retro.

181

Ad Amicum pauperem.

Est male nunc: utinam in pejus fors omnia vertat;
Succedunt summis optima sæpe malis.

182

Partes mundi.

Dividitur totus partes in quatuor orbis;
Orbis quot partes, sunt tot in orbe (b) Fides.
(b) Judaica, Christiana, Mahometana, Pagana.

183

Discordiarum causa.

Sensus quemque suus, Ratio sua quemque guber-
nat;

Velle suum cuique est, & sua cuique Fides;
Velle suum cuique est; fratrum hinc discordia: ut
inter

Eratres conveniat, nil nisi velle deest.

184

Liberalis.

Vir justus dat cuique suum, sed te dare oportet
Divitibusque suum, pauperibusque tuum.

185

Sapiens.

Qui rerum novit causas, ac tempora servat,
Temporat affectus, ordinat acta, sapit.

186

Sapiens.

Fata regunt fatuos; sapiens dominabitur astris:
Non fatum, at (c) fato se regit ipse suo.
(c) id est, sapientia.

187

Infans anonymus ante baptismum mortuus.

Mortuus heu! nec lotus aqua, nec nomine notus,
Non habui nomen, quod tibi, Christe, darem.
In libro vitæ tu me sine nomine scribes:
Spes est in solo nomine nostra tuo.

188

Adulator & Invidus.

Zoilus & Gnato non re sed nomine distant:
Virtutem ille bonis invidet, iste malis.

188

Amor. Amicitia.

Nodus amicitiae rumpendus propter amorem:
Propter amicitiam non violandus amor.

190

Petrus & Paulus.

Imperium gladio, sed opes sub clave tenentur:
Ditior est Paulo scilicet inde Petrus?
Esse inopem Divum, sua dicit epistola, Paulum:
Hoc sanctus de se nullibi Petrus ait.

191

Socrates.

Nill scis, unum hoc scis, aliquid scis & nihil ergo:
Hoc aliquid nihil est: hoc nihil est aliquid.

192

Homo.

Plorabas, cum natus eras; fuit ergo voluptas
Nulla tibi nasci; cur dolet ergo mori?
The Windingsheete.

193 *Ad Paulum sepultum.*

EX utero matris venisti nudus in orbem:
In terram tectus sindone, Paule, redis.
Plus aufers igitur tecum quam, Paule, tulisti,
Plus reddis matri quam dedit illa tibi.

194 *Ad Lectorem aulicum.*

Si sapiant hic multa scholam, perpauca sed aulam:
Scito quod hæc aulæ scripsimus, illa scholæ.

195 *Prudens Simplicitas. Ad amicum amicissimum,
Joan. Clapham:*

UT nulli nocuisse velis, imitare columbam:
Serpentem, ut possit nemo nocere tibi.

196 *Oculi Reipublicæ.*

Lex & Relligio junxerunt fœdera, pravas
Hæc hominum mentes comprimit, illa manus.

197 *Ad Joan. Gifford, Medicinæ Doctorem
peritissimum.*

Artis Apollineæ quod sis, Gifforde peritus,
Haud mirum; nosti corpus & ipse tuum.
Si non Galenus jubet hoc, at doctus Apollo
Jussit: Apollineum γῶδι σεαυτὸς erat.

198 *Cornicula, Anser.*

Cornicula.

Altera me in terris non est facundior ales:
Anser.

Tu me plus loqueris: plus ego scribo tamen.

199 *Miseria Jobi.*

Divitias Jobo, sobolemque, ipsamque salutem
Abstulit (hoc Domino non prohibente) Sa-
tan.

Omnibus ablatis misero, tamen una superstes,
Quæ magis afflictum redderet, uxor erat.

200

(d) Pauls and Westmunster.

(d) *Templum Divi Pauli; & Monasterium Sancti Petri.*

Fiscus ad Occiduum stat Regius & Fora Petrum,
ALBA nec a Petro principis Aula procul.

Ad divum Verbi præco mysteria Paulum

Explicat, & merces Bibliopola sacras;

Omnia conveniunt, sit Paulus ut hic, Petrus illis;
Ditior hic Paulo, doctior ille Petro.

301 *In Conjuratores, qui 5. Novembris, die Martis,
1605. subjecto pyrio pulvere Curiam West-
monasteriensem diffilare instituerant.*

EX ima celsum tellure laceffere cœlum;

Equè loco superos inferiore Deos;

Quid si non hoc est imponere Pelion Ossæ,

Et turrim in terris ædificare Babel?

Atque iterum in cineres Trojanam vettere gentem,
Inque tenebrosam volvere cuncta Chaos?

202

In eosdem.

ERgo novam in cineres voluistis vertere Trojam
Perjuri fato quo periere phryges?

Non fuit infando lux Martis idonea fato:

Mercurii Cinorum nam solet esse dies.

203

Rex ad Britanniam.

FAma meæ mortis nuper tibi nuncia venit,
Nolito famæ credere: crede mihi.

204

Anglium, de Unione Britannica.

INterna æterna Britones jam pacè fruemur?

Ternus enim populos qui fuit, unus erit.

Wallia cui vallum contingit, Scotique scutum,

Anglia, securam jam licet esse tibi.

205 *Ad Thom. Neville, D. Henrici & D. Mariae
Neville maximæ spei & optimæ
indolis filium.*

Orte Nevillorum puer alto a sanguine, dulci
Pingitur in vultu cujus uterque parens;
Exprimis & mores, non corpora sola parentum;
Matris virtutes, ingeniumque Patris.

206 *In obitum Nobiliss. D. Caroli Blunt, Comi-
tis Devonix, 1606.*

Carole, laudandus dubito magis; anne dolendus,
Elegio dignus sis, Elegone magis.
Mortuus es; de te multi jam multa loquuntur:
Optima quæque boni, pessima quæque mali.

207 *Ad Lectorem.*

Quæ legis hic, sunt curta Epigrammata, sunt quo-
que pauca:
Nam si multa forent curtula, longa forent,
Quæ legis hic, sunt pauca Epigrammata, sunt quo-
que curtæ,
Nam si longa forent, paucula multa forent.

208 *De viva voce, & Scriptis.*

Sit verbum vox viva licet, vox mortua scriptum;
Scripta diu vivunt, non ita verba diu.

Tertii Libri Epigrammatum.

FINIS

EPIGRAMMATUM JOANNIS OVVENI.

Cambro - Britanni.

Ad Excellentissimam & doctissimam Heroinam,
D. ARBELLAM STUART.
Liber Singularis.

Ad D. Joan. Audoönum.

FAstidita meæ fuerant Epigrammata Musæ;
Jamque satur Carmen pene perosus eram:
At tua jucundum referunt mihi scripta saporem;
Provenit ex versu nausea nulla tuo.

Joan. Harington, Eques.

Ad D. Joann. Audoënum.

Multi scripserunt Epigrammata, nuper & olim,
Quorum vix equidem nomina nota reor:
At tua (ne dubites) vivent Epigrammata: vivent,
Dum facer in pretio sermo Latinus erit.
Laus tua cum terra stabit, cœloque manebit;
Nec, nisi cum mundus concidet ipse, cader.

D. Du. Tr. Med.

Idem, de eodem.

Sive jocos lepidus, seu seria tractat Oënus;
Autorem hunc aliud nil agitasse putes.
Sive paludatus Lector sit, sive togatus,
Applicat hic genium Scriptor utrique suum.

IOAN-

JOANNIS AVDOENI
EPIGRAMMATUM
LIBER UNUS.

1 *Ad Nobilissimam & Doctissimam Heroinam
Dominam Arbellam Stuartam.*

Regia progenies, genere illustrissima Virgo,
Nec minus ingenio nobilitante genus;
Ingenii fructus tibi fert offertque secundos,
Primitias Dominæ qui dedit ante suæ.
Seque tibi tanquam bella Virtutis in ara
Consecrat, ingenium sacrificatque suum.

2 *Ad eandem.*

At teneris idem tenor, & constantia vitæ,
Arguit ingenii vim geniumque tui.
Te non adversæ timidam tumidamve secundæ
Res Faciunt, eadem frons tibi mensque manet,
Fecit & in Populo tua spectatissima virtus,
Ne quis adulari me tibi posse putet.

3 *Ad Librum.*

In numero dicanda tibi sub iudice causa est;
Arbitrium de Te non duo tresve dabunt;
Forfan & illectus temere damnabitur Autor?
Rarior & lector quam reprehensor erit.

Unio.

4 *Ad Britannos.*

Qvis nisi mentis inops oblatum respuat aurum
Offertur nobis (e) Unio: respuitur.
(e) Quod vulgo perlam dicimus, Latini unionem
vocant.

Vacuum.

5 **E**thicus, o, inquit, quantum est in rebus inane?
Esse tamen Physicus monstrat inane nihil.

6 *In Zoilum.*

ZOilus æterno laceratus carmine; quanquam
Ante duo annorum millia mortuus est.
Anne quod hæredes post se tot in orbè reliquit,
Pro tota pœnam posteritate luit?

7 *A centro ad Circumferentiam.*

A Centro ad circum non unica linea ducit:
A terra ad Cœlum fert tamen una via.
Gallicinium.

8 *Ad H. Principem.*

Angelorum sensit virtutem Gallia; solus
At Galli cantum non fugit iste Leo.
Bellum Grammaticale.

9 *In Quintum.*

Est nummos Nomen, Verbum promittere: Quintus
A quo sperabam Nomina, Verba dedit.
Tres dimensiones.

10 *In A. Battologum.*

Vox tua mensuris desiderat e tribus unam:
Lata fatis, nimium Longa, Profunda parum.

11 *Ad Lectorem de tribus prioribus Epi-
gramm. Libellis.*

Sicut post varios quinquagenaria partus
Jam reliquos soboli transit inepta dies:
Sic, tribus emissis vena meliore libellis;
Aridus ingenii jam sterilefcit ager.

12 *Ad Simonem Waterfon, Bibliopolam.*

Waterfõne, mei susceptor prime libelli,
Dum fueris gratus, Bibliopola Simon;
Sint quamvis contra sacras monopolia leges,
Ingenii fies tu monopolia mei.

13 *Salum.*

Salsa sitim pariunt: nihil æquore salsius. Ergo,
Quid mirum dulces quod bibat æquor aquas?

Solstitium.

14 *In Ponticum Atheum.*

Solstitium vitæ, Mors est ; Sol stare videtur,
Non stat : homoque mori, Pontice, non moritur,

15 *Ad Librum.*

Parve Liber, patriis monitis munitus in Aula,
Discito fortunam fortis utramque pati,
Illic invenies aliquem tibi forsan amicum ;
Atque aliquis contra qui male dicat, erit.
Si quis erit nimium rigidus, nimiumve molestus,
Non me, sed dominum, die, reprehende meum.

Aulicifmus.

16 *Ad Amicum Aulicum.*

Arrisit tibi Rex? ridebit & affecla magni
Regis, ut ad motum corporis umbra movet.
Petricuit frontem Rex? Aulicus illico vultum
Contrahit, ut, cum sol occidit, umbra fugit.

17 *In Corbulonem.*

Quæritur, in capitis frondosi vertice quare
Non habeat crinem corbulo? crimen habet.

18 *Ad Pontilianum.*

In jus Christophorus te, Pontiliane, vocavit:
Non te, sed nummos, Pontiliane, tuos.

19 *Ad D. Edw. Herebertum, ordinis Bathon
equitem doctissimum.*

Te versus laudare meos mihi fama susurrat ;
O par si possem laudibus esse tuis,
Qui tennes tanto Musas dignaris honore,
Dignus es a Musa tu meliore cani.

In-

Invidiæ Genealogia.

20 *Ad D. Joannem Haringtonum Equitem, D. Baronis Haringtoni heredem, maximæ spei adolescentem.*

Invidiam virtus peperit, partamque tuetur:
Ex virtute unum nascitur hoc vitium,
Hoc Epigramma tibi quæris cur dedico? dicam:
Sperare invidiam nam tibi jure licet.

21 *De virtute, Paradoxon.*

In Medio virtus vitiorum quæque duorum est:
Præstaret, vitii si foret iste locus,
Septem planetæ.

22 *Ad Paulam.*

Errantes inter stellas bene, Paula, notasti
Quinque mares, generis foemineique duas.

23 *In Marcum.*

Plus tibi pollicitis præstandum: non minus: unde
Una data est homini lingua, manusque duæ.
At tu nil præstas; promittis plurima: tanquam,
Marce, duæ linguæ sint tibi, nulla manus.

24 *Sacerdos Romanus.*

Vis sit adulterium non dignum morte, sacerdos;
Haud mirum; conjux est tibi nulla: sapis.

25 *Minister Genevensis.*

Vis adulterium plectatur morte, Minister?
Haud mirum; conjux est tibi bella: sapis.

26 *Philautus Poëta.*

Proxima quod nostris sit maxima Luna videtur
Sensibus; ex septem sit minima illa licet.
Sic Vatum videor, quia sum mihi proximus ipse,
Sim quamvis minimus, maximus esse mihi.

27 *In tenacem Clientem.*

Miraris clausæ quod sint tibi judicis aures,
Cum tua judicibus non sit aperta manus?

28 *In quendam Asinum.*
CUr Asinum voco te, potius quam nomino; quæ-
 ris?

Non asinis dantur nomina, dantur equis.

Imago in speculo.

29 *Ad Pontiam.*
SUbridet, quasi te ridentem cernat imago:
 Irrigat & mœstas, te lacrymante, genas:

Cum dormis, oculos claudit, tecumque movetur;
 At tu dum loqueris, dicit imago nihil.

30 *Permutatio Glauci.*
ESuriens fratri omne suum jus vendidit Esau,
 Jacobus fratri jus dedit omne suum.

31 *Ad quendam somniatorem.*
IN somnis ignota prius mysteria discis,
 Multaque, te vigilem quæ latuere, doces:
 Quanto plus igitur scires, si mortuus esses,
 Tam bene quem docuit mortis imago loqui?

Wallia & Cantia, alias Cantium.

32 *Ad D. Robertum Cotton, Equitem Doctissimum.*

ANtiquam retinet gentem non Wallia nomen:
 Non gentem, at priscum Cantia nomen habet.

Heautontimorumenos.

33 *Ad cognatum suum, D. Theodorum Price, Theologum.*

Angelus est nimium felix, quia corporis expers:
 Bruta nec infelix bellua, mente carens.

Solus homo miser est, ita mente & corpore constat,
 Sentiat ut fragilem se, miserumque sciat.

Scilicet omnis homo (Menedemi nam fumus omnes)
 Se ratione angit, non ratione regit.

34

In Linum.

TE mihi devinxi; credebam cum tibi nummos,
Me tibi devinetum vis? mihi redde meum.

Cœlibatus.

35

*Ad amicum suum, D. Robertum Boweyer,
cœlibem.*

SI cœlum meritis adscribitur, & benefactis,
Cœlebs tu, cœlum quo merearis, habes.

Væ soli.

36

*Ad amicum suum, Joan. Suckling.
conjugatum.*

PRincipio cœlum, terramque hominemq; creavit,
Cur, nisi quod solus noluit esse Deus?

37

In Marcum.

ESse potest dives promissis quilibet, inquis?
Pollicitis dives non ero, Marce, tuis.

38

In Aulam Atheum.

DË Cœlo tecum fieret cum sermo Deoque,
Tecum, qui Numen nomen inane putas;
Vere dixisti: Quæ supra nos, nihil ad nos,
Ortus enim ad vestrum pertinet, Aule, gregem.

39

Homo Histrion.

SPes Argumentum vitæ (nam Fabula, vita est)
Mundus Scœna, fides Prologus, Actor Amor.

40

Ad Lectorem.

CUr ego tam studeam brevitati, forte requiris:
Hoc factum est causa, Lector amice, tua.
Sicut iter longum facienti, onerosius auro est
Argentum; longum sic Epigramma brevi.

41

Stylo novo.

URbs veterum cultrix, rerumque inimica nova-
rum,
Imposuit Fastos cur sibi Roma novos?

Ad Marinum, de amica sua.

42 **M**obilitas cœli laus est; Constantia terræ
Gloria, quæ stabilem servat in orbe statum;
Unde Marine, tibi cœlestis tota videtur,
In se terrenum nil tua Phyllis habet,

The Weackervessell,

Eve Lapsus.

43 **E**clipsin raro patitur sol, luna frequenter:
Est magis ad lapsum fœmina prona viro,
Nec in hoc seculo, nec in futuro.

In Damianum.

44 **S**eu res præsentés considero, sive futuras,
Nemo hominum magis est te, Camiane, miser,
Improbus es: nil te seclum juvat ergo futurum,
Stultus es; hoc seclum te juvat ergo nihil,
Carendo magis, quam fruendo.

In Ponticum.

45 **I**ngenium scis quid valeat, quid, Pontice, virtus,
Si rerum scitur verus egero valor.

Homicidium.

46 **U**nus homo per se ipse potest occidere mille,
Unum hominem possunt vix generare duo.
Amicitia,

Ad Amicum suum, D. Thom. Bridges,

47 **C**ur similis similem sibi quærit? amicus amicos?
Una nemo potest in pede stare diu,

48 *Ad D. Joannem Haringtonum Equitem, D. Baro-
nis Haringtoni filium, bonarum litterarum
virtutisque studiosissimum ado-
lescentem.*

Si vultu Virtus incognita proditur, exstant
In vultu virtus ingeniumque tuo,
Est in hoc spectata tui prudentia patris,
Toveus ingenii quod tibi cultor adest;

Quan-

Quandoquidem similes dat nostra Britannia paucos,
Doctores illi, discipulosve tibi.

49

In Polydorum Virgilium.

Virgilii duo sunt: alter Maro, tu Polydore
Alter tu mendax, ille Poëta fuit.

50

*In quendam Momum, priorum Epigrammatum
Censorem iniquissimum.*

Inter tot sceleratorum centena, tulisses
Si justos tantum quinque Gomorrha viros;
Staret adhuc. —————
Tu propter paucos, leviuscula carmina, lusus,
Vis propter totum, levide lector, opus.

15

In eundem.

Incendit Triviæ sacra templa, ut nomen haberet,
Quidnam nescio quis: nec puto nomen haber.
Si tu dente nigro carpis mea carmina: speras
Forfan in hoc quarto nomen habere libro.
Usque licet per me rodas mea carmina, carpas
Usque licet, fallam spes ego (Mome) tuas.

52

In quendam domesticum obrectatorem.

TU quoque ni frater fratrem carissime carpis,
Illæsum lingua nec finis ire tua?
Cur fratri invidias, meruit si carmine laudem?
Si pœnam, fratri parcere, fratris erat.

53

Cornutus.

Conjugis ob furtiya negotia cur ego plector?
Corniger a populo prætereunte vocor?
Et digitis monstror? Nam quæ non fecimus ipsi;
(At vos nescio qui) vix ea nostra voco.

54

In Pbilautum.

Dilige vicinum veluti te diligis ipsum,
Sic, inquis, facio; Proximus ipse mihi.

Audaces Fortuna juvat.

55 **F**oemina Fortunæ similis formosa videtur;
Non amat ignavos illa, nec ista, viros,

Amor cæcus.

56 **T**ardior in longos Amor est durabilis annos:
Lenta magis durant quam violenta diu,
Ut paritura canis cupidus festinat Amator:
Unde fit, ut catulus sit quasi cæcus, Amor.

Amor non cæcus.

Ad Firmicum.

57 **N**on amor ut fovea est; in amorem pronus es,
Arge,

Tu magis: in fossam, tu, Polypheme, magis.

Gignitur ex visu: non ergo, Firmice, cæcus
Nascitur; ex oculo cum generetur Amor.

Ad Quintum, Aulicum.

58 **E**st oculus tibi, Quinte, unus? metuendus Ulysses
Centum oculi vigiles sunt tibi? Mercurius.

Epitaphium Justitia.

59 **E**x quo Cœlestum terras Astræa reliquit
Ultima, signifero legit in orbe locum:
Templum justitiæ, legumque evertimus aras,
Scitque fere solus Jus dare cuique coquus.

Awrit of Latitat.

In Marcum Epicureum.

60 **P**rudenter latitas, si te latuisse lateret;
Marce: sed hoc ipsum, te latitare patet.

61 *Collegium Jesu & Collegium Christi Oxonia, sola nondum perfecta.*

Imperfecta ubi domus una sacratur Jesu;
Ex non perfectis altera, Christe, tibi.
Inter honoratos Sanctos Sanctasque tot, hæc sunt
Paupertatis adhuc signa notanda tuæ.

62 *Fides*

62

Fides mercatoria.

Solvit inops diti Cræso quod debuit Irus,
Pauperis est major, divitis anæ fides ?

Tristes ante omnia Musæ,

63

Ad D. Eliseum Win, cognatum suum.

Olim intensus erat, sed nunc tondetur Apollo;
Vix in toto anno ridet Apollo semel.
Fallitur o quicumque Camœnas dixit amœnas:

Phœbi delira est nunc lyra; manca manus,

64

Incredulitas.

Credulitas error potius quam culpa videtur,
Est error nimium credere, culpa parum,

65

Credulitas.

Qui cuivis credit, fodé male creditur illi:
Qui credis mihi plus, hoc tibi credo minus,

Obsequium Fidei,

66

Ad quendam juvenem.

Septennis taciturna fides qua prima docetur,
Disciplina mihi Pythagorea placet.

Vis tibi inexperti credant? tu crede peritis:

Visne tibi gnatum credere? crede patri.

67

Prestat dare quam accipere.

Accipere humanum est; inopi donare Deorum,
Nunquam tam paucos credo fuisse Deos;

68

In Ponticum clientem.

Pontice, Causidico nil porrigis; ista ehiragra est,
Ille pedem pro te non movit; hæc podagra est.

69

Thom. Wolfei, Cardinalis, Ego & Rex meus.

Dicere Grammatices ratio permittit, Ego & Rex,
Ethica te jubet ars dicere, Rex & Ego.
Hæc est nimirum vivendi ars, illa loquendi:
Principis hæc Aulæ, serviat, illa Scholæ,

Ad Gallum.

70 **Q**uisque suo bibit in vitro: mos utilis hic est:
Ex quo contentus conjuge nemo sua est.

Philautus Philaristo.

Calend. Januar. 1607.

71 **E**xspectas, Philariste, tibi dum munera mittam?
Nil habeo, quod dem me tibi præter, ego.

72 *Philaristus Philauto.*

Quod mihi misisti, nihil est: nihil ergo remitto:
Te mihi donasti; Te tibi reddo Vale.

73 *Ad D. Henricum Fanshaw, Equitem, Litterarum
fautorem.*

Augusti imperium tibi si fortuna dedisset,
Aut Mæcenatis suppeditasset opes:
Vidissent multos hæc secula nostra Marones:
Nullus Mæcenas, nullus in orbe Maro.

74 *Ad D. Henricum Goodyer Equitem, optima
conjugem orbatum. 1606.*

Imperiare viros, parere & parere maritas
Vult Natura: Uxor fecit utrumque tua.
Paruit & peperit dulces, pia pignora, natos;
Sustentant magnas quæ duo fulcra domos.
O ter felicem, quater o Goodyere beatum,
Si bona tam sequitur, quam bona prima fuit.

75 *Ulysses & Penelope.*

Mors nobis, velut Uxori surrepsit Ulysses:
Vivimus, ut telam texuit ille suam.

76 *In Mancinum, inertem Magiarum.*

Qui totum sine fine diem per compita curris,
Ut tamen in studiis per-videate-vigil.

Accensa de nocte soles dormire lucerna:

Vis, Mancine, oleum perdere, non operam.

77

In Gelliam.

Dissimiles licet inter se tibi sint duo nati,
Est similis patri natus uterque suo,
Sagittarius cœlestis.

73

*Ad cognatum suum, Guiliel. Ravenscroft,
Jurisconsultum.*

Certa Sagitta Fides, Nervus tibi Spes, amor Arcus,
Sitque tibi Cœlum Meta, Scopusque Deus.
Omne grave tendit deorsum.

79

*Ad amicum suum, D. Carolum Rives,
Theol. Doctorem.*

IN mundo, quo non animal sublimius ullum.
Infima cur homini terra terenda datur?

Est elementorum rerumque gravissima Tellus;
Peccato gravius nec reperitur onus.

Quid mirum est hominum ferri genus ergo deorsum?
Præter peccatum nil prope cum sit homo.

80

In litigiosum debitorem.

Quæ tua nequitia est, quod debes, non mihi solvis,
Soluis Causidico: quæ tua stultitia est.

81

In eundem.

Sollicitum te cura tenet, non quomodo solvas;
Quomodo non solvas: maxima cura tua est.
Ecclesiæ derivativæ.

82

Ad Amicum suum R. F.

Sic licet una fides, licet una Ecclesia vera,
Fontibus e vivis orta perennis aquæ:

A primitiva quæ non se Ecclesia solam
Derivat? fontem dissimulatque suum?

81

Quatuor maria.

Trinacriæ similis, Britonumque triangula tellus
Quatuor annumeras æquora, Regna tria?

84

Ad amicum divitem.

Siquantum valeat res quæque carendo sciatur;
Quid valeant nummi divitiæque, scio.

95 *Generatio unius est corruptio duorum.*
UT generent unam confuso semine prolem:
 Corpora corrumpunt vir mulierque duo.

86 *Annulus nuptialis*
Annulus ut sponsæ spondente ab amante daretur
 Moris erat, vetus hoc pignus amoris erat?
 Annulus a sponsa potius pro pignore sponso
 Donetur; digitum porrigat ille suum.

87 *De Mundis Democriti.*
SI, quot Democritus mundos ait esse, tot essent:
 Innumerabilium pessimus iste foret.
 De Epigrammatis.

88 *Ad Lectorem fastidiosum.*
Est tanquam mulier formosa, epigramma jocus-
 que,
 Quæ communis eo fit, quia pulchra fuit.
 Communis jam facta semel, formosa videri
 Desinit, & mœchis tædja mille parit.
 Terra.

89 *Ad cognatum suum, D. Audoënum Gwyn, Th.*
Usque licet cœlum moveatur, constat: eodem
 Semper enim motu se sine fine movet.
 Terra stet usque licet, nihil inconstantius illa est;
 Terrarum errores angulus omnis habet.

90 *Luna.*
TE maris appellant undosi, Cynthia, stellam:
 Nunc terram potius, quam mare, Luna regit.
 Avara liberalitas.
 In Acerram.

91
Donat, ut accipiat: non accipit, ut det Acerra.
 Accipere, est illi meta; sagitta, dare.

92 *In Paulam Pseudo-Catholicam.*
Paula, tua si quis de religione requirat,
 Nil nisi Apostolicum Catholicumque crepat.

Catholicum in cuncto, fateor, profiteris amorem:
In te Catholicam, Paula, requiro fidem.

93

Prodigium.

PEnelopea fides inter proverbia quondam,
Nunc in prodigiis possit habere locum.

94

In Annetam, Francam.

Natura est paucis contenta, Annetæ: sed hoc de
Natura dictum non reor esse tua.

95

Ad Marcum, militem Iuscum & Iippum.

EX oculis superest unus tibi, Marce, duobus,
Perpetuo faciem qui tibi rore rigat,
Cur tibi qui superest moestus lachrymatur ocellus?
In bello fratrem perdidit ille suum.

Pax in Europa.

96

Ad Theologos.

Reges belligerant: faciunt & foedera reges:
Est aliquid, sera denique pace frui.

Presbyteri certant atque immortalia neſtunt
Jurgia: litigiis non poſuere modum.

Unde venenatæ levis inclementia linguæ,
Et quam fit calamus ſævioreſe, patet.

97

Ad Carolinam.

IN ſpeculo vultum quoties oculosque tueris,
Si forte elatam te tua forma facit.

Splendida ſed fragilis, pulchra at peritura, memento,
Quam ſpeculo ſimilis, ſis, Carolina, tuo.

Floralia.

98 *Ad amicum ſuum, D. Joan Tovey, Theol.*

UT Cato in obſcœnam ſcenam, ſed ut exeat, in-
trat:

Ingreditur mundum ſic, abiturus homo:
Nec rediturus in hunc, bene ſeu male ceſſerit, orbem;
Fertur ut in ſcenam non rediſſe Cato

Epitaphium hominis.

99
Quis jacet hic? nemo; vacuum sine nomine corpus
 Hic jacet: ex solo corpore non fit Homo.

Horizon Animæ.

100 *Ad amicum suum, D. Benjamin Heyden,
 Decanum Wellensem.*

Summa elementa duo non cernimus, Aëra & Ignem:
 Terram Undamque oculo cernimus, ima duo.

Sic, quid sint homines, quid bruta animantia, scimus,
 Nescimus, quid sint Angelus atque Deus.

101 *Eclipsis animæ.*

Ut solem Tellus Lunamque stat inter opacam,
 Stat peccatum inter meque Deumque meum.

102 *Mercatores.*

Exstat apud lepidum Mercator Fabula Plautum,
 Pseudolus huic aptum proxima nomen habet.

103 *Imagium cultores.*

Magnates quicunque colunt, idolon adorant:
 Cum sit imago Dei vir; mulierque viri.

104 *Erasmi Desiderium.*

Nunc Desiderium desiderat orbis Erasmus;
 Cui soli licuit scribere, quod libuit.

105 *Neuter.*

Pompejanus ero, si vicerit omnia Magnas;
 Omnia si Cæsar, Cæsarianus ero.

Scandalum Magnatum.

106 *Ad verbos verborum.*

Hec dicit Dominus: Servum volo quemque fide-
 lem

Esse meum semper: quomodo? dando nihil,
 Sta, vigila, ito, venito: fideliter omnia postquam
 Præstiteris Domino, Servus inutilis es,

107 *Mars & Venus.*

Se Venus & Mavors communicat omnibus æque,
 Hostis communis Mars & amica Venus.

108

Februarius.

ES similis matri tu, de tot fratribus unus;
Sunt tibi viginti scilicet octo dies.

109

Ad D. Edwardum Jones, amicum suum.

TE tua (virtutis pictura) modestia laudat;
Laudarem ingenium, si paterere tuum.
Ipsa, Edoarde, tui laudanda modestia vultus
Te facit ut laudem, quam mereare, minus.

Quadratura Circuli.

110

Ad Josephum Scaligerum.

Quadratura quid est Circi?, divisio mundi
Quatuor in partes, qui prius unus erat.
An Unitas Arithmetica respondeat Puncto
Geometrico?

111

Ad D. Josiam Bodley, Equitem.

PLUS Deus immensus Puncto est, non plus tamen
Uno:

A Puncto quantum differat, ecce Monos.

112

From the Wombe, to the Tombe.

Nascitur in certam miserandus homuncio mortem;
Et macer in campo bos, ut edatur, edit.

113

Ad Jacobum Regem.

O Quanta exempli generoso in Principe vis est?
Tu vitando veras, tu faciendo jubes.

Princeps principium motus: Rex regula vitæ:
Circumfert coelum sidera; Rex populum.

Caput & Corpus.

114

Ad eundem.

IN capite est ratio & rationis quinque ministri:
Divinum in reliquo corpore pene nihil.

Rumor de morte Regis Francorum.

115

Ad Regem Francorum. 1606.

Quod Reges audire timent, ac dicere servi,
Ipsa tibi dicit fama: memento mori.

116

Lux.

Sic Corpus quamvis, oculo non cernitur Aër:
Lux Corpus non est, cernitur illa tamen.

117

Unus Deus, multi amici.

Quanquam nemo potest dominis servire duobus:
Patronas uni quid vetat esse duas;
Quærere non prohibet multos Deus unus, amicos:
Ut multas ædes non vetat una fides.

118

Donna, Danno.

Amisit costam, causa mulieris, Adamus
Uxoris causa, perdidit ipsam animam.

119

Womeus Tire.

Hoc magis est instar recti, quam tegminis, hoc non
Ornare est, hoc est ædificare caput.

120

Omnia nihil.

Omnia de nihilo qui fecit, id omnia solus:
Quod Deus ex nihilo fecit, id omne nihil.
Ecclesiæ Orient. & Occident.

121

*Ad D. Georgium Rives, Theol. Doctorem do-
ctiss. prudentissimum virum.*

Floret dextra fides in mundi parte sinistra:
In mundi dextra parte sinistra fides.

Ira. Patientia.

122

Ad amicum suum I. Thorium.

Excitat ira hebetem, motam patientia mentem
Sedat, ut unda ignem temperat, ignis aquam.

123

Ruina Cæli & Terræ.

Hac nihil inferius cum sit, nihil altius illo;
Tellus, quo cælum non habet, unde cadat.

124

*Ad D. Hen. Howard, Comitem Northa-
mioniæ.*

Filius es Comitæ, Comitum patruusque duorum:
Unus erat tibi Dux frater, avique duo.

Tu Comes es: tibi nemo datos miretur honores,
Cui fortuna comes, dux fuit ingenium.

125

Ad Pontiam.

TE fugio vitoque tuos, mea vulnere, vultus,
Pontia, non quia te non amo, sed quod Amo?

126

Ad Polycarpum, Equitem errantem.

UNus erat vetitus Paradisi fructus Adamo:
Lex illum reliquos tangere nulla vetat.

Cui tot præterea fuerat data copia, ab uno
Miror eum cupidus non tenuisse manus.

Tu contra, excepta, prohiberis ab omnibus, una
Arbore; te reliquas tangere jura vetant.

Mirandus minus ergo tuus, quam lapsus Adami,
Cui data libertas, quam tibi, major erat.

127

Ad Lectorem.

OMnia falsa sitim pariunt poteribus: o si
Lectori patiant carmina nostra sitim?

128

Ad amicum conjugatum.

IMpares ipsa nihil, quidvis tamen impetret uxor:
Utere nec serva conjuge, nec domina.

129

In Ponticam.

Pontice, Comædus vivis? moriere Tragædus;
Dissimilis vitæ mors erit illa tuæ.

130

In quendam sacerdotem maritum.

Levita patre natus eras, Levitaque factus;
Deque Tribu conjux est tibi sumpta Levi?

131

In Anabaptistas & hujusmodi farinae fratres.

OMnia diruitis, nihil ædificatis in orbe.
Zelus hic, at scelus est? fervor hic, an furor
est?

Spiritus at vestris etiam prætenditur ausis:

Qualis at hic vester Spiritus est? (f) Abadon?

(f) Apoc, c, 9. v. 11.

In Cottam.

132 **C**ondidit ex nihilo Deus unicus omnia: contra
Tu facis ex toto, Cotta Chymista, nihil.

133 *D. Thom. Egerton, Cancellarius Angliæ, &
Franciscus Leigh ejusdem gener.*

Si quis virtuti vere favet, & fovet artes:
Certatim hoc faciunt hic gener, ille focer:
Egertonus amat Musas, amat & Leus illas;
Noluit a focero degener esse gener.

Consubstantiatio.

134 *Ad eundem D. Franciscum Leigh & D. Ma-
riam ejus uxorem, amatissimos
Conjuges.*

Non eadem est vobis anima, at mens una duobus:
Unum non estis corpus, at una caro.
Nomine diversi vir & uxor, re tamen unum:
Diversi sexus estis, at unus homo.

135 *Funebres Conciones.*

Lædimus infontes vivos, laudamus eosdem
Defunctos; o mors candida, vita nigra!

136 *Paules Crosse, and the (g) Crosse in Cheape.
(g) E regione Templi D. Petri.*

Aurea cur Petro posita est crux, plumbea Paulo
Paulinum decorant Aurea verba crucem.

137 *Amoris chronicon.*

Temporis ut minimi momentum crescit in horam,
Et brevis in longam ducitur hora diem,
Multiplicata dies in mensem, mensis in annum:
Sic crescente meus tempore crescit Amor.

138 *Gemini.*

Dissimile in nobis nihil est, paria omnia; solo
Differimus numero; nos duo namque sumus.
E s Amici.

Amici.

NOs vix distamus numero, duo nos sumus unum;
Vos estis Gemini corpore, nos animo.

De Arte amandi.

139

Ad amicum suum. Job.

NAsonis quamvis teneram perlegerit Artem,
Nescit inexpertus dicere, quid sit Amor.
Natura non arte docetur; scilicet, in cor
Ex oculis, non ex auribus intrat amor.

140

Seneca Philosophus.

PEne tuæ dici possunt Epigrammata Gnomæ.
Præterquam numeris quod tua dicta carent.

141 *Ad D. Henr. Neville, Domini de Aberge-*
venny filium Heredem.

FAllor? an in mensa memini te dicere nuper,
Sit tua quod sapido lingua inimica sali?
Manducare salem tibi nil opus, Henrice; quare?
Omne fere, loquitur quod tua lingua, fal est.

Vita Philippi Sidney.

142 *Ad ejusdem fratrem, D. Robertum Sidney,*
vice Comitem de Lule.

QVi dignos ipsi vita scripsere libellos,
Illorum vitam scribere non opus est.
Sidneji in tumulo est corpus, non vita, Philippi;
Producit vitam gloria longa brevem.

143 *Corpus discedentem Animam alloquitur.*

Tellurem, te propter ego, matremque reliqui:
Anima.

Stulta, Deum Patrem te quoque propter ego.
Ad Patrem redeo ergo meum, qui me vocat ad se
In cœlum, matri teque relinquo tuæ.
Donec (in instanti cum conveniemus in unum)
Terra mihi reddat te; tibi meque Deus.

Regnum divisum.

144 *Ad D. Georgium Rives, Theolog. Doctorem doctissimum & prudentissimum virum.*

ORci & Cælorum regna indivisa, malignus
Nemo habitat cælum, Tartara nemo bonus;
Proh pudor! in sola regnat divisio terra,
Terra, ubi multimodis sunt bona mixta malis.
Ergo dies veniet, cum Terra jacebit inanis:
At cælum plenum, plenus & Orcus erit.

145 *Aquæ calidæ,*

EXpressæ tacitum lacrymæ testantur amorem;
Gignit amor lacrymas: quis putet? ignis aquas.
De ingenio & memoria.

146 *In Ponticum.*

QUæritur ingenium quare dicatur acumen?
Interius penetrat quicquid acumen habet,
Officium Mnemes non est penetrare, tenere est;
Hinc fieri vulgo vasa rotunda vides.
Unde vel ingenium tibi suspicor esse rotundum
Pontice, vel (h) Mneme quod sit acuta tibi.
(h) Memoria.

Solatium Pauperum.

147 *Ad unicum divitem.*

INconstans fortuna breves mutatur in horas:
Nascitur inde mihi spes, metus unde tibi.

148 *De Titio & Gellia.*

Objectum est Titio, sua quod gravidata fuisset
Uxor apud patrem Gellia Sempronium.
Cui Titius: peperit cum Gellia nostra, quid ad me?
Filia Sempronii non mea nupta fuit.

149 *Cor.*

CUr non in dextra potius quam parte sinistra
Ponitur humanum cor; quia lava sapi.

Caro & Spiritus.

150 *Ad amicum suum, D. Rob. Newman, D. Th.*

COrpus primo, animam facta jam carne creavit;
Cætera fecisset cum facienda Deus.

Fallor? an hinc parere animabus inertia nolunt
Corpora, sint animis quod seniores suis?

151 *Proto-Martyres innocentes.*

PRO Christo puero sunt passi extrema, priusquam
Christus pro pueris ultima passus erat.

152 *Ad amicum suum, D. Joan. Hosckins Juriscons.*

CLAudit amicitiam numerus plerumque Dualis:
Vix in pluralem multiplicatur amor.

153 *Ad amicum senescentem.*

TU nuper juvenis fueras, ego dum puer essem;
Quæ me nunc juvenem, te videt hora senem,
Expectat mors ergo brevi te, meque senectus;
Sors incerta licet si mea, certa tua est.

154 *In A. G.*

NOMEN habes hominis faciemque, animalis acumen;

In Specie stultus, doctus at in Genere.

Harmonia.

155 *Ad Theologos.*

HARMONIA variis scripsere Evangeliorum;
Harmoniarum quis? non minor iste labor?

156 *Dissonantia.*

TANTA per humanas repit contentio mentes,
Ut quid pax animæ sit, prope nemo sciat.
Ille nimis Bassum premit, hic nimis elevat Altum;
Ut vix auditus sit Tenor, aut Medius.

157 *Ad Pontilianum.*

ZELOTYPUS conjux es, Pontiliane? sapisti.
Zelotypus non es, Pontiliane? lapis,

Frustra observatur conjux, ea sola maritum,
Quæ (quamvis possit) fallere nolit, amat.

158 *In Porciam.*

Filia sis dubito Tenebrarum, an filia Lucis;
Nam genita es noctu, Porcia, nata diu.

Epitome Historiarum sui temporis.

159 *Ad Marianum.*

Pejores patribus sumus, ut majoribus illi:
In vitium faciles nam, Mariane, sumus.

Natio si nobis fuerit quoque postera peior:

Pejus erit nostra posteritate nihil.

Londinum.

160 *Ad cognatum suum, D. Joan. Williams,
Aurificem Londinensem.*

Imbibit ut fontes Tamesis fluviosque minores;
Oppida Londinum pauperiora vorat.

Perpetuo quanquam Tamesis perit æquora fluxu,
Londini constans urbis amicus hic est.

Debitor & Creditor.

161 *Ad amicum suum, D. Guil. Cawly, Mercato-
rem Londinensem.*

Sint nostro licet in libro tua nomina: tu scis
Me nullum in libris nomen habere tuis.

Nil equidem tibi præter amorem debeo: semper
Debitor atque idem Creditor hujus ero.

162 *Moriones & Navi.*

NOs, quanquam vitio sumus haud virtute notati,
Magnatum lusus deliciæque sumus.

163 *Ad Pontilianum.*

Semper sollicitus fuit, Irus: cur, quia pauper,
Nec tu Cræse minus: cur? quia dives eras.

Uxorem quod non habeat, cruciatur Alanus:

Uxorem quod habes, Fontiliene, doles.

Unio.

164

Ad Britannos conjuges.

Servat ab interitu Deus unus, & unio mundum :
Conjugium in terris unio prima fuit.

165

Bellum Elementare.

Condiderit quamvis hominum Deus omnia causa,
Bella tamen contra nos Elementa gerunt.
Quam multas aër animas demisit in orcum
Pestifer, ac letho res hominesque dedit?
Quam prope Trojanum Londini sensimus ignem?
Incipit & fructus terra negare parens.
Fit melior nemo, cœlum noctesque diesque
Cum fleat, ac tellus crimina nostra luat :
Terra licet madidis mollescat ab imbribus, haud fit
Mollius Anglorum, quam fuit ante, genus.

Epithalamium.

166

Ad Tulliam.

Objectum nostri, dum lux est, Tullia, visus :
Subjectum, cum nox venit, Amoris eris.

166

In Sextum Academicum.

Ut tibi sternendi possis meminisse sepulcri,
Te lectum perhibent sternere, Sexte, tuum,
Ut possis etiam memorare novissima mortis,
Cur non in somnum sæpius ergo ruis?

168

Ad Amatam.

TE mihi notam amo nunc, ignotam nuper ama-
bam :
Fama prius cepit me tua; forma capit.
Jam scio quid sit amor; amo quamvis non amer; imo
Jam scio quid sit amo, nescio quid sit amor.

169

Un Cadet. A younger brother.

Sum pauper; non culpa mea est, sed culpa paren-
tum :
Qui me fratre meo non genuere prius.

Firma-

Firmamentum.

170 *Ad amicum, D. Michaëlem Heyden.*
Terra stat; in tellure animatia stante moventur;
 Astra sed in cœlo fixa movente manent.

171 *B. Virgo.*

Virgo Beata licet communi voce voceris,
 In mulieribus es tu benedicta magis.
 Nil mihi prodesse, si tantum Virgo fuisses;
 Quantum at profueras, o, quia Mater eras!

172 *Spes & Fides.*

Nulla foret, nisi certa Fides foret, unaque semper,
 Ac si certa foret Spes mea, nulla foret.

Novatius.

Nevv. factionis and fashions.

173 *Ad amicum suum, D. Guil. Prythercium
 I. V. Doctorem & Theol.*

Multa renascentur, quæ jam cecidere, cadentque
 Dogmata, quæ summo nunc in honore vigent.
 Quæ nova sunt; hodieque placent, non usque pla-
 cebunt:

Cur ita, quæ nova sunt, non nova semper erunt.

174 *Speculum Marci.*

Semper adest quare tibi morio, Marce? tuam isto
 Stultitiam in fatuo cernis, ut in speculo.

175 *Ad Uxorium.*

Sepe quiescit ager, non semper arandus: at uxor
 Est ager, assiduo vult tamen illa coli.

176 *Ad amicum suum, I. O. B.*

Præteritis, plusquam, perfectis quatuor annis
 In te radices acrius egit amor.

Frustra igitur transferre tuum conaris amorem;
 Arbor adulta amor est, non nova planta, tuus.

177 *In Porphyrium.*

Flesse bis, at nunquam legitur risisse Redemptor,
 Cur hominis proprium risibile ergo vocas?

178

Ad Pontilianum.

UT Cœcus, puero duce, vel muliere per urbem
 Ducitur, ignoras itque reditque vias,
 Ducit amatorem sinuosa per avia cœcum
 Te Venus aut Veneris, Pontiliane, puer.
 Amor omni exceptione major.

179

Ad amicum quendam.

CAusa recens veterem licet interpellet amorem,
 Simque licet dicta non nisi lege, Tuus:
 In te nulla meo est exceptio major amore,
 Excepto, si me non, ut ameris, amas.

180

In ponticum sexagenarium.

QVi, dum vixisti, nulli benefeceris unquam,
 Incipies fieri, Pontice, quando pius?
 Omnia pauperibus, dicis, post fata relinquam:
 Qui post fata sapit, Pontice, sero sapit.

181

In N gellam Candidatam.

RAra avis in terris, alboque simillima cygno es:
 Est tibi vestis enim candida, nigra caro,

182

Le Carneval de la vie.

MENS immortalis mortem cur corporis horret?
 An cum carne timet se moriente mori?
 An sibi jam restare nihil post funera, præter
 Supplicium longum iudiciumque breve?
 Suspicio facit hæc mentes in morte trementes,
 Nec mortuum carni dicere posse Vale.

183

Quintina lans.

SI te laudarem, Quintina, superbior esses!
 Te laudare equidem nolo, superba fat es.

184

Filius Terræ.

COelum ad nos spectat, cœlum spectemus oportet,
 Nam Deus astra dedit cœlo, oculosque tibi.
 Vix tibi pars teretis terræ millena videtur:
 Cœlum dimidia cernere parte licet.

Cur igitur cœlo terram, & cultissime, præfers?
Ut mos est, matrem plus patre forsam amas.

185 *Species infima.*

SI licet humanum genus inter cœtera summum;
Jure tamen species infima dictus homo.
In cœlo minima est hominum pars, maxima in Orco;
Humanum infelix quis neget ergo genus?

186 *De invidia, paradoxon.*

SI plus virtutis foret, invidiæ minus esset:
Quo virtutis enim plus, vitii minus est.
Jacobus (i) Sextus Scotiæ, (i) Primus Britanniæ
Rex; Bonum omen.

187 *Ad Britanniam.*

SÆpe quod optatum, speratum vix fuit olim,
Accidit hoc inter spemque metumque tibi.
Lucrosus cecidit tibi Senio (k) Unio jactus:
Fausaque fortunæ est alea jacta tuæ.

(k) *Sicce Ace*, the best chauce of the Dice
Cor unum, via una.

188 *Ad Jacobum Primum, Regem Britanniae
Magna, &c.*

BIs manibus duo sceptræ geris; linguasq; loquun-
Quatuor imperii sub ditione tui. (tur
Lingua Britannorum quamvis non una, cor unum est.
Unio Regnorum fit modo facta trium.

Primus in orbe hominum divisit pectora Dæmon,
Divisit linguas primus in orbe Deus.

189 *Reges & Propheta.*

Rex extra patriam, vel maximus, haud habet ullum
Imperium: in patria nemo Propheta fidem.
Virtus.

190 *Ad Illustriss. D. Henr. Davers, Baronum Dantesay.*

Virtutem Genii duo semper in orbe sequuntur;
Hic Bonus, ille malus; Gloria & invidia.

191

Invidia.

Livor edax hominum vivorum encomia carpit:
Ut defunctorum corpora vermibus edit,

192

In Battum.

Pauca tibi semper respondeo multa roganti:
Non quia multa rogas, sed quia stulta rogas.

193

Somnus, Mors.

In somnis quanquam simulo pro tempore mortem,
Non est pars vitæ dulcior ulla meæ.
Permirus est in morte igitur quid tam sit amarum,
Tam dulcis cum sit mortis imago, sopor.

194

Curia facultatum.

Jurisconsultum dignantur adire Clientes;
Cur, nisi divitias quod bona summa putant?
Accersit Medicum, cum lecto affigitur, æger:
Corporis est hominum cura secunda salus.
Theiologus, quam primum accersere debuit, ægro.
Ultimus, & quamquam nemo vocavit, adest.

195

Patientia amatoria.

Vis voto potiaris amans? patiaris: oportet,
Si vis in dulci vivere pace, pati.

196

In quendam Grammaticastrum.

Grammaticus bonus es, nil præter grammata nosti:
Scis præter literas nil, literatus homo es.

197

Ad quendam gloriosam.

UXori similis Menelai sis, vel Ulyssis,
Si cupis a sera posteritate coli,
Vivit enim vitium post funera, non modo virtus:
Vivit adhuc Helene, non modo Penelope,

198

In Aulum.

Veriloqui fatui dicenda tacenda loquuntur:
At quia prudentes plura tacenda vident:

Servorum ingeniis nihil audens credere, semper
Circum se fatuos quatuor Aulus habet.

Aurum ex stercore.

199 *Ad amicum suum, D. Dom. Tr. Medicum.*

Aurum Virgilius de stercore colligit Enni:
Fecit Virgilius, quod facit & Medicus.

200 *Secretum amoris.*

Rarus amatur amans: ut ameris, amabilis esto
Omnibus: a nulla vis ut ameris, ama:

Mon tout.

201 *Ad Marciam Franco-Gallam.*

Orne tuum me sæpe vocas? at Marcia, falso:
Omne tuum non sum; sum tuus omnis ego.

202 *De Quinto & Oro.*

Papistam Quintus nuper se reddidit; & se
Denique, Papistam jam profitetur Orus,

At quam diversis viæti rationibus? illi

Hæc ætate fides; huic novitate placet.

203 *Filium Ariadnes.*

Rexit ut errantis Thesei vestigia filum
Virginis; humanum sit genus una fides.

De Testamentis & Votis.

204 *Ad D. Henricum Martin. Doct. U. I. Pru-
dentissimum.*

In Testamentis semper postrema voluntas

Obtinet: in votis si bona, prima valent.

Omnipotens, uno cum fecerit omnia voto,

Testamenta Deus concedit ipse duo.

205 *Ad Amicum avarum.*

Solus habet, quod avarus habet, nil donat amico,
Nil sibi dat; solus non habet hoc, quod habet.

206 *Ad Ponticum I. C.*

Uxori partem vivis, partemque clienti
Ætatis; vives, Pontice, quando tibi:

De

De prædicatoribus & Histrionibus.

207 *Ad D. Ed. Hobby, Equitem doctiss.*

PRæco Heracliti partes agit, omnia flentis;
Ridentis partes Histrionem Democriti.

Huic videor stultissimus esse, miserrimus illi:

Huic numerat culpas, ponderat ille meas.

208 *Christmæsse and Midsummer.*

Venit Joannes æstivo tempore; Christus
Brumali; hic ignem prædicat, alter aquam.

Quam bene convenient contraria (1) flumina flam-
Ignis peccatum purgat, & unda lavat. (mis)

(1) Duo Baptismi, Johannis & Christi.

209 *Nemo læditur, nisi a seipso.*

CRiminis est nemo, nemo discriminis expers;
Nos in discrimen criminis nempe voeant.

In quendam maledicum.

210

Aballing Assè.

Non ego te quemvis alinum voco, Mome; sed il-
lum,

Cujus erat fessor Pseudo-Propheta Balam;

Non illum, Solymam Dominum qui vexit in urbem
Matus hic & mitis nam fuit; ille loquax.

211 *De suis hæredibus. Ad Jurisconsultos.*

Nemo sua certus de conjugè præter Adamum;
Deque suo nemo conjugè, præter Evam.

Conjugibus, misero præsertim (in amore) marito,
Solatii superest quid, nisi sola fides?

212

A hollow tooth.

Injectum flammis, me non absumeret ignis;
Sæpe cadentis aquæ parvula gutta cavat.

Virtutis laus.

213 *Ad D. Thomam Puckering, summæ spei
adolefcentem.*

Solis ut, in solo motu, constantia constat;
Constans virtutis vis in agendo sita est.

214 *Æsopi lingua.*

Humano membrum non est in corpore lingua
Nobiliusve bona mobiliusve mala.

215 *Ad pueros collegii Wintoniensis Wichamici.*

Non sum, quod fueram: festivus eram puer olim;
Festorum valde nam studiosus eram.

Sapientia duce, comite Fortuna.

216 *In Ancura.*

Quod male consultum, cecidit feliciter: Ancus
Arguitur sapiens, qui modo stultus erat.
Quod prudenter erat provisum, si male vertat,
Ipse Cato (populo iudice) stultus erit.

217 *Dolor.*

Sola dolenda reor presentia damna: dolemus
Præterita heu nimium sero, futura cito.

218 *Vicissitudo.*

Gaudia post luctus veniunt, post gaudia luctus:
Semper in ambiguo (speve metuve) sumus.

219 *Ad Germanicum.*

Auxit amicorum numerum tibi Porcia conjux,
Fertilitas hæc est conjugis una tuæ.
Hæc est conjugii, Germanice, maxima virtus:
Gignit amicitias uxor amica novas.

Nequitia armata.

220 *In Linum.*

Ut bona vina bonum faciunt (ut fertur) acetum;
Ingeniosior es quo, Line pejor eo es.

221 *Opiniafter.*

Heu quantum in terra dominatur opinio? verum
Me nescire putas, & dubitare vetas.
Qui dubitat, non errat; adhuc in utrumque paratus,
Error opinando non dubitando venit.

222 *Alma mater Academia Oxoniæ.*

TU nostri mater, mater Natura, cerebri:
Dura sed illa fuit; tu Pia mater eras.

223 *Poëta.*

Mæcenas non verba dabat, sed premia doctis.
Magnas.

Quid dare mi, præter verba Poëta potest?

224 *Homo homini Deus.*

Est homo, qui locuples inopi nil donat amico;
Qui rapit, hic lupus est; qui dabit, ille Deus.

225 *Homerus.*

SI vera est, de te quæ fertur fabula, nunquam
Vidisti lucem, sed tua scripta vident.

226 *Theighostly fathers.*

Integra Gausidico narranda est causa perito,
Et Medico morbus, crimina Theiologo,
Qui vis fortunas animam corpusque tueri,
His tribus in vita dissimulato nihil.

227 *Ad D. C. G.*

TE podagra & podagræ pestis contraria vexant,
Currere te conjux, stare podagra facit.

228 *Ubiquitarii.*

TOta patet tellus inopi quacunque vagatur:
Pauper in exilio est nullibi; ubique domi.

229 *Amantes.*

Est amor in nobis, in lignis ut latet ignis;
Ignis uti lignum, nos levis urit amor:
Ligna sed in cineres vanescunt, ignis in auras:
Nos cinis, & noster, quid nisi fumus, Amor?

230 *Sermo.*

Sermo voluptati similis, similisque dolori est;
Longus enim levis est sermo gravisque brevis.

131 *In mulierosum senem.*

ÆTas commendat Bacchum, Veneremquæ juven-
ventus;

Hæc igitur juveni convenit; ille seni.

232 *In Harpalum, avarum juvenem.*

Mundus amica tua est, misere quem diligis unum
Harpale; sis juvenis tu licet, ille senex.

233 *Ad lectorem.*

Qui scribit, laudatur ab his, culpatur ab illis:
Lectoris vultu statque cadique sui.

Semper agit causam, nec tempore transiget ullo:

Semper enim sub te iudice, Lector erit.

234 *De speculo amatori a sponsa donato.*

In quo me videam, speculum mihi, Paula, dedisti:
In quo te possim cernere, malo dares.

135 *In Quintiam Hypocritam.*

Docta, docens, juvenis, formosâ pudica, benigna,
Quintia: si non sis ambitiosa, bona es.

136 *Problema.*

Moribus adversum sibi prodigus odit avarum:
Cur igitur largos parcus avarus amat?

237 *Somnus, Venus.*

Vos consanguineas lethi dicamne sorores,
Somne quies hominum, deliciæque Venus?

Indulgere juvat Veneri somnoque jacentes:

Sternitur & dulci lectus utrique malo.

Odit somnus iners, odit Venus improba, lucem;

Est animi somnus mors animæque Venus.

238 *Passè-time.*

Longa dies ignavo homini, nox longa videtur,
Et longi menses, longior annus abir,

Tempus inutiliter terminus; dum longa videntur

Tempora: cur viam dicimus ergo brevem?

239

Fiscus.

UT visco capiuntur aves: (Fiscus quasi Viscus
Dicitur) a fisco sic capiuntur opes.

240

In Ponticum Philaucum.

Non cernit se mens oculus se non videt; ergo
Pontice, te quod amas, qua ratione facis?

241

Scrutinium.

O Utinam quod discipulos tu Christe rogasti,
Presbyter & Princeps, plebsque rogaret idem,

(n) Quid de me dicunt homines, si sæpe rogaret
Quisque, malum sciret se, meliorque foret.

(n) Marc. c. 9. v. 18.

Lumen Gratia.

242

Ad Amicum suam D. Ioan. Tovey.

Luna suam complet solari lumine sphæram;
Mens ut ab æterno Numine lumen habet.

243

Fama, Error.

Rumor rumores, errores parturit error:
Ut nivis exiguus crescit eundo globus.

Traditio historica de rege Bruto.

244

Ad amicum suum D. Guil. Camdenum.

Comburi possunt libri, monumenta perire;
Nostra mori possunt, & tua scripta mori:

Insita sed genti, dum gens erit ipsa superstes,
Traditio vivæ vim quasi vocis habet.

245

Ad D. Rogerum Owen, I. C. Equitem literatissimum.

Antiquas Britonum leges nova juraque calles:
Quicquid & in tota discitur Historia.

Sermonem instituas de re quacunque videtur

Viva, Rogere, tuum Bibliotheca caput.

246

In Avarum.

Quo miser annorum victum tibi mille parasti?
Annorum centum nec tibi vita datur.

Im-

Immososque tibi nummorum cogis acervos,

Quæris & in vita gaudia longa brevi?

Olim dives ero parce si vixero, dicis:

Et cur non, olim mortuus, inquis, ero?

²⁴⁷ *Pes in sepulcro.*

PEndentes agimus vitas in littore mortis;

Tam prope mors vitæ est, quam prope margo
mari:

Una fere res est homini mors vitæque, sicut

Efficiunt unum Terraque & Unda globum.

²⁴⁸ *Mercurius Britannicus.*

Optima descripsit Morus, in pessima mundi:

Tu nobis narras vera; sed ille bona.

²⁴⁹ *De seipso.*

Sunt quidam, qui me dicunt non esse Poëtam,

Et verum dicunt; Cur? quia vera loquor.

²⁵⁰ *Ad D. Guiliel. Butler. Cantabrigiensem,*

nostræ ætatis Æsculapium.

Posthabita quærant alii sua lucra salute:

Spernis dulce lucrum tu; tua cura, Salus.

Te medico amissam desperat nemo salutem:

Inventum tanquam si Medicina tuum.

De te vera loquor; non, ut solet æger, adolor:

Non tibi ab infano laus, Guilielme, venit.

Ill-husbandrie.

²⁵¹ *Ad Paulum Jurisconsultum.*

Cur viduam Jus, Paule, vocas Commune relictam,

Vox hodie nuptis convenit illa magis.

Nil opus uxori mortem expectare mariti,

Cubat ut in tristi semi-supina toro.

²⁵² *Ultimum divortium.*

Si forte in cælum vir sumitur, uxor in orcum,

Aut contra; non sunt amplius Una Caro.

253

Te worlds dungeon.

Carceris est instar Tellus, quasi mœnia cœlum,
Custos peccatum; Vincula quæ? Mulier.

254

Legum nullitas.

Condidimus leges quam multas? quam prope
nullas?

Nam si servatur nulla, quid ulla valet?

Ut leges serventur, adhuc lex unica fiat:

Hæc cito facta foret lex; cito fracta foret.

255

De statu hominum.

Deprimitur nisi pes alter, non tollitur alter:
Sic casu alterius tollitur alter homo.

256

Ad quendam.

Doctor es incipiens; nunc incipe Doctior esse.
Præter mulieres & pueros.

257

Ad D. Joan. Haringtonum, Equitem literatissimum.

Perlege divinæ sinuosa volumina Legis,
(n) In nullo numero sunt Puer & Mulier.
(n) Matth. cap. 14. v. 21.

Civili Puer & Mulier prohibentur ab omni

Munere; non Mulier, non gerit arma Puer.

Utuntur longa tunica Mulierque Puerque:

Imberbes pariter sunt Puer & Mulier.

Fertur & in teneros Puer & cito Fœmina fletus;

Blanditiis Mulier decipiturque Puer.

Cogitis in quantos hominum genus omne furores,

Tu Venus, o Mulier, tuque Cupido Puer.

Cereus Nasus.

258

Ad cognatum suum, D. Rich. Meredith. Theol.

Promittit nobis aliquid sacra pagina? nostrum
Protinus hoc certa credimus esse fide.

Exigit a nobis aliquid sacra littera? durus

Sub nostram sermo non cadit iste fidem.

Scala Cæli.

Vide ep. 1.

S

ad Cor.

cap. 13.

A

v. 8. 13.

S

T

E

I

S

D

R

E

I

A

P

F

C

S

IN cœlum gradibus virtutum maxima septem,
 Quatuor ascendit Spes bona, quinque Fides.
 Spes lunam, solemque Fides contingit: Amoris
 Scala vel ad summum pertinet usque polum.

In Battum.

UTatur mens lingua interprete; Cor prius ergo
 Desinat, incipiat quam tua lingua loqui.
 Nempe interpretis est locus in sermone secundus;
 Raraque Legato verba loquente facit.
 Laus Asini,

261 *Nolite fieri sicut equus & mulus, quibus non
 est intellectus.*

CUr Asinum non junxit equo muloque Propheta?
 Vecturus natum Dividis ille fuit.

262 *Aulicorum par impar.*

NOn bene conveniunt, at in una sede morantur,
 Momus vituperans omnia, Gnatho nihil.
 Quatuor hominis causæ.

263 *Ad nobiliss. & maxima spei adolescentem D. Ric.
 Sackeville, Com. Dorcestriæ ex filio nepotem.*

Forma quid est hominis, nisi mens mala, vana vo-
 luntas:

Principium quodnam Materiale? nihil,
 Materiam cum forma igitur ne suspice; solus
 Finis & Efficiens respiciendus erit.

264

Ultima linea.

ULtimus est vitæ mors actus amara jocose:
Cujus vita fuit seria, mors jocus est.

265 *In obitum reverend. R. Vaghan, Episc. Londinensis.*

QVite viventem laudavi nuper abunde,
Te ratus eximis laudibus esse parem;
Heu cur defunctum te prædico parcius? auxit
Lætitia ingenium; diminuitque dolor:
Dum plures pro te lacrymas quam carmina fundo
Confundunt lacrymis se mea verba: Vale.

266

De Vita & Morte.

UNa via est vitæ, moriendi mille figuræ:
Est bene: nam mors est res bona, vita mala.

267

In Paulum decrepitum edificatorem.

IN quibus haud vivas, moriaris, at in quibus ædes
Paule struis, : tumulum nescius anne domum.

268

In Sextum, prædonem prodigum.

MUnificum largitorem te, Sexte, fatemur;
Qui, tua ne tantum des, aliena rapis.

269

In Zoilum.

Defuncto parees; viventem, Zoile, carpes:
Non ego propterea mortuus esse velim.

270

A Paire of Royal friends.

Ad

Cambro-Anglo-	Britannos.
Anglo-Scoto-	
Scoto-Cambro-	

HOc in Amicitia mihi par Regale videtur,
Tres inter quoties extitit unus amor:
Scilicet, ut gemino sit par in amore tuorum
Unusquisque trium bis numerandus erit.

271

Regnum divisum.

IN mundo nihil usque potest consistere: Mundus
Non semper stabit: cur? quia dividitur.

Annu-

Annulus Concordiæ.

Ad Britannos. 1607.

272
Scotia fert Gemmam; gens Anglica conferat Au-
 rum,
 Annulus hinc fiat, Rexque fit ipse faber.
 Excitet Europæ nova nos concordia: ne, dum
 Cuditur a fabris Annulus, Annus eat.

Britannia.

273
Sicut eras in principio, sic nunc es, & esto
 Usque in seclorum secula semper, Amen.

Steganographia.

Ad Lectorem curiosum.

274
Cur sint obscuro sensu mea carmina, quæris,
 Utiliter nequeant quæ sine clave legi?
 Est Epigrammatici non esse Polygraphon: ergo
 Conveniens illi est, esse Steganographum.

Unus Deus.

275
Unus cunctorum pater indubitatus Adamus;
 Nec possunt plures Patribus esse Dii.

276 *Ad nobilissimam ac Illustrissimam Dominam
 Arbellam Stuart.*

Si foret in nudis virtus aut gloria verbis,
 In laudes facerem, carmina mille tuas.
 Nobilitare potest nostram tua gloria Musam;
 At tibi Musa potest addere nostra nihil.

FINIS

MONASTICHA

quædam

ETHICA ET POLITICA

veterum Sapientum.

Ad Lectorem.

Disticha nostra legant pueri, castæque puellæ:
 Continet obscænos fabula nulla jocos.

1 Quod Christianos non deceat esse leves.

Cur gravibus textam quæris mea disticha verbis?
 Cultores Christi non decet esse leves.

2 In tribulatione virtus, ut aurum in igne, perficitur.

Quod fornax auro facit, hoc tribulatio iustis:
 Rebus in adversis certa probanda fides.

3 Veri amoris nullus est finis.

Nunquam vera fuit charitas, quæ desit esse:
 Nam nullus veri finis amoris erit.

4 Obscæna fabula a pueris vitanda.

Inficit obscæni puerorum carminis aures
 Fabula: dum vatium quæritur ipse nitor.

5 Mala durant, quæ teneris mentibus discuntur.

Heu mala diluitur, teneris quod mentibus hæsit;
 Præsertim durant quæ didicere mala.

6 Omnes sunt felices, ubi omnes amici.

Quam felix, & quanta foret respública, cives,
 Si cunctos unus conciliaffet amor.

7 Nil sine spe præmii fit.

Est labor ingratus, quem debita præmia fallunt:
 Quid grave non fiet spe sine, si leve sit?

8 Animam dantis Deus, non domum considerat.

Non quantum dederis, sed quanta mente dedisti,
 Pensandum est: placat victima parva Deum.

9 Recta conscientia dat verum gaudium.

Gaudia vera dabit mens omnis criminis expers;
 Heu mihi quam pauci gaudia vera ferent!

10

Sola virtus beatos efficit.

OMnia cum pereant, est virtus sola perennis;
Hæc immortales reddere sola potest.

11

Nemo confidat in divitiis suis.

Quid tibi, si gemmas omnes cumulabis & aurum;
Si tua tartareis mens cruciatur aquis?

12

Utendum est florida ætate.

S mora nulla datur vitæ labentibus horis,
Cur ita cum longo turba sopore jacet?

13

Mors est inevitabilis.

Qui subito palles, audito nomine mortis,
An tibi res nova mors? unde repente metus?

14

Quando mors sit optima.

Optima tunc mors est, cum vita est criminis ex-
pers:

Mors felix, vita est cum tibi cara magis.

15

Post gaudium vita venit luctus mortis.

Quid lætare miser? nescis post gaudia vitæ
Perpetuos luctus mortis adesse tibi?

16

Non Deus est autor culpæ, sed pœna.

Non Deus est autor culpæ, sed criminis ultor;
Pro meritis justis præmia justa dabit.

17

Omnia divitibus licent.

Quam reus est dives prætorem nactus avarum,
Quid non sperabit posse licere tibi?

18

Forma caduca mali per sepe causa.

Quid fidis formæ, populat quam morbus & ætas?
Multis causa mali candida forma fuit.

19

Uxor bona & non pulchra habenda.

Sic formosa aliis uxor, tibi sit bona: nescis
Quam noceat castæ forma pudicitæ.

20

Difficile est custodire formosas.

Egre formosam poteris servare puellam,
Nunc prece, nunc auro forma petita ruit.

De infelici patria.

²¹ **I**Nfelix patria est, pueros ubi purpura vestit,
Atque ubi præcedit dives honore bonos.

²² *Ille patria est felix, ubi juvenus assuescit modicis cibis.*

Illa domus felix, ubi parvo assveta juvenus,
Inque foco coctum luxuriatur olus.

²³ *De falsis gaudiis.*

Quæ durare putas mortalis gaudia vitæ,
Sunt brevia, & finis tristis amoris erit.

²⁴ *De veris gaudiis.*

Una salus servire Deo est: hæc gaudia sola
Vera putes: quorum gloria finis erit.

²⁵ *Judex & censor omni careat peccato.*

Aspiciat lucem, qui vult damnare tenebras,
Qui carpit mores, sit sine labe prius.

Cor Deus injusti nebulis obnubilat atris,
Exiit & formam fitque repente fera.

²⁶ *Aliena magis quam nostra vitia cernimus.*

Cur aliena magis quam crimina nostra videmus?
An quia nostra procul sunt, aliena prope?

²⁷ *De avaro.*

Nusquam fraude caret, semper mentitur avarus,
Erga inopes surdus ferrea corda gerit.

²⁸ *De gloria.*

Gloria si dulcis, studeat virtute parare:
Quo labor est major, gloria major erit.

²⁹ *Nec cito nec temere judicandum.*

Judicium præceps insani judicis index,
Omnia nec longis discutienda moris.

³⁰ *Ad magna præmia magno labore venit.*

Si te delectant æternæ præmia vitæ
Magna quidem, nec te terreat ergo labor.

31 *Qui bene vixit, non timet mortem.*

QVI bene præteritos sine labe peregerit annos,
Non horret mortis vulnera dira pati.

32 *Erudiendi pueri in tenera ætate.*

DUM tenera est ætas generosos imbue mores,
Tunc facile est cunctis artibus ingenium.

33 *Mors malorum pessima, bonorum felix.*

FORMIDANDA malis sequitur quam pœna perennis;
At contra felix mors solet esse bonis.

34 *Modicis cibus natura contenta.*

ESSE cupis frugi? facile est, nam panis & unda
Prædives dapibus quilibet esse potest.

35 *Omnia pro vita æterna sunt hic toleranda.*

SI quanta æternæ sunt vitæ præmia volvis,
Omnia pro Christo perpetiere libens.

36 *Quæ sint veræ divitiæ.*

DIVITIÆ non sunt argenti pondus & aurum,
Virtutes veras accipe divitiæ.

Virtus post funera vivit:

Victrix fortunæ sapientia.

37 **S**I fueris sapiens, Cræsi superaveris aurum:
Nam sapiens nullo tempore vixit inops.

38 *Ad Petrum.*

TE miserum dicis, fateor, sine crimine quenquam
Non vidi miserum: tu miser ergo, Petre, es.

39 *Omnia patienter ferenda, ut ex voluntate
Dei procedentia.*

QUOD tibi contigerit, patienter ferre memento:
Nam certum, fieri numine cuncta Dei.

40 *Mens bona nunquam timet, ut mala semper.*

CONSCIA mens recti nullo commota pavore est:
Ut mala mens semper sollicitata pavet.

41 *De Veneratione Parentum.*

QVI cupis esse senex, caros venerare Parentes:
Quæ patri facies, filius illa tibi.

42 *Contra mercatores rerum terrenarum Epigramma.*

PER mare, per terras mercator quæritat aurum;
Sic Cœli æternæ, stulte, relinquis opes.

43 *In Parasitos.*

QVI socios mensæ est, verum ne reris amicum:
Tolle epulas, nosces quam tibi fidus erat.

44 *Contra tardantes bene operari.*

CRAS, inquis, faciam, concessaque labitur hora:
Fac hodie; fugit hæc non reditura dies.

45 *Qui meminit mortis & inferni, facile a vi-
riis abstinebit.*

IS facile exstinguet Veneris flagrantia tela,
Qui timeret infernum, qui Phlegethontis aquas.

46 *Ad Simonem Canusianum.*

TE dare promittis, nec das mihi munera Simon:
Nil tibi debebo, si mihi tarda dabis.

47 *Bis dat, qui cito dat.*

MUNERA des lætus, corrumpunt tædia donum;
In quo censendum est, quid nisi dantis amor?

48 *Qui cito & temere promittit, nusquam
seruat fidem.*

QVI cito, qui temere spondet, se multa daturum,
Quæ male promissit, turpius illa negat.

49 *Negare in principio, est dare beneficium, si
bene negetur.*

QVI cito vel belle negat, is tribuisse videtur
Munera; nam semper est odiosa mora.

50 *Cui plus Deus dederit, plura requiret.*

CUI bona multa Deus concessit, plura requiret,
Ni dispensabit quas bene cepit opes.

51 *Iustitia & Charitas sunt armatura Principum.*

JUSTITIA & Charitas, dilecti Principis artes:
Hæc sunt arma, quibus nulli nocere queunt.

52 *Qui dat inopi sua, nunquam erit pauper.*

Qui bene divitias inopi donabit amico,
Hic omni felix tempore dives erit.

53 *Pueri & juvenes non debent maledicere senibus.*

Ne sava in canos juvenis convitia fundas,
Sed subito assurgas prætereunte sene.

54 *A prima ætate sunt docendi pueri.*

Vera tuis ut, si vis, sit sapientia canis,
Cum primo hanc sitiens ebibe lacte prius.

55 *Unde Senatus dictus.*

Asenibus prisca sumtum dixere Senatam:
Est robor juvenum, consiliumque senum.

56 *De senum prudentia.*

Asene consilium quæras: prudentia rerum
Est illis, sine qua curia quæque perit.

57 *Signum ruinae, gubernatio juvenum.*

Urbes, regna, domos, juvenum quas rexerit ardor,
Sint quanquam fortes, certa ruina manet.

58 *Qui cito credit, cito perit, nec non levis est corde.*

Qui cito crediderit, fallitur sæpe, levisque
Est cordis; raro fallitur ipse senex.

59 *Quid sit lex & justitia.*

Vis legis prohibere malum est, permittere honestum:

Justitia est, semper jus dare cuique suum.

60 *Injustitia ruina urbium.*

Nihil injustitia miseræ est infestius urbi:
Funditus hæc muros perdit, & illa domus.

61 *In cælo vera amicitia.*

S nihil in terra casto perhibetur amore
Dulcius, in cælis qualis amicitia?

62 *Senectus bonis jucunda est, malis vero morosa.*

Quæ caruit vitiiis, dulcis solet esse senectus:
Contra morosa est, quæ vitiosa fuit.

63 *Utilius est unum ac sæpe librum legere, quam multos accumulare.*

EGregios cumulare libros præclara supellex;
Ast unum utilius volvere sæpe librum.

64 *Nil sine amicis jucundum.*

QVid tibi jucundum submotis esset amicus,
Cuncta tibi quanquam sint cumulata bona.
Alter ego est verus multumque probatus amicis,
Quo nobis debet carius esse nihil.

65 *Amici prius eligendi, electi semper retinendi.*

Non temere admittas, nisi fidum noris, amicum;
Sed semel admissus semper habendus erit.

66 *Scire mori est honos mortis.*

Mortis honos est scire mori, vitæque beatæ
Exitus est testis: qui sine labe fuit.

67 *Quid sit dives.*

Non est, crede mihi, multos qui possidet agros,
Dives: sed dives, cui satis unus ager.

68 *Liberalis.*

QVas inopi & dulci lætus donabis amico,
Temporibus nullis eripientur opes.

69 *Ægroti non curantur a pluribus.*

Nunquam, crede mihi, a morbo curabitur æger,
Si multis Medicis creditur una febris.

70 *Quomodo dives & felix fias.*

Vis fieri dives? Christi mandata sequaris;
Diminuasque animi gaudia nota tui.

71 *Amici divitum sunt falsi amici.*

QVem tibi divitiæ peperere, est falsus amicus:
Argentum, non te, diligit ille tuum.

72 *Quales principes, tales populi.*

Si studia & mores populi cognoscere curas,
Res facilis: vitam Principis inspicias.

- 73 *In Adulatores.*
Blandus adulator Regum certissima pestis:
 Hæc gaudet sanctos perdere sæpe viros.
- 74 *Quales esse debemus.*
Nulli sis blandus, sed verus & omnibus æquus;
 Vox clamore vacet, sit sine lite sonus.
- 75 *De risu.*
Imodicus risus non est sapientis, at index
 Stulciæ; lepidi sint sine dente joci.
- 76 *Ne simus loquaces.*
Vis sapiens dici, raro, & meditata loquere:
 Sæpe loquax verbis proditur ipse suis.
- 77 *Vera laus bonorum.*
Omne genus laudis turpi vilescit in ore;
 Vera boni & docti laus solet esse viri.
- 78 *Nec nostra laudare; nec aliena reprehendere debemus.*
Nec tua laudabis, nec facta aliena reprendes:
 Non satis est, alter si sua facta canit.
- 79 *De muneribus.*
Quid non argento, quid non corrumpitur auro?
 Qui majora dabit munera, victor erit.
- 80 *Paupertas cum bona sit ab omnibus evitatur.*
Sobria paupertas multorum causa bonorum est;
 Hanc tamen ut præstem plurima turba fugit.
- 81 *Natura paucis contenta.*
Quidnam deesse potest, modicus si panis & unda,
 Prandia, vel cænas si tibi præbet olus?
- 82 *Mors vitari non potest; itaque nec timenda, nec fugienda.*
Quod nequeas vitare fugis? mors omnibus instat;
 Nec formidanda est nec fugienda tibi.
- 83 *Gloria sæpe spreta cumulator redit.*
Narrent de te alii: proprio sordescit in ore
 Gloria, si taceas, plus tibi laudis erit.

84

Laus liberalitatis.

Ille Deo similis, qui dat bene munera lætus:
Qui repetit fœnus, fœnoris officio est.

85 *Nulla major usura & sanctior, quam pascere
pauperes.*

Nullum unquam majus lucrum, quam pascere egenos:

Fœnore nam grandi centupla dona feres.

86 *Qui pauperibus largitur, in cœlo thesaurizat.*

Quas Christi causa miseris donabis egenis,
In cœlo æternas conciliabis opes.

87 *Nullum magis lucrum neque certum, quam
credere Christo opes.*

Munera si gratis dederis, si lætus amicis,
Tollet divitias has tibi nulla dies.

88 *Dat gratis nemo.*

Munera qui mittit, sperat majora remitti;
Nemo suas vellet perdere gratis opes.

89 *Ad amicum.*

Accipe parva mei lætus munuscula census;
Nec quæ sint, sed qua, fuspice, mente data.

90 *De Charitate.*

Est charitas perfectus amor, perfecta que virtus,
Qua sine perfectum nil reperire potes.

1 *Qui vult esse altus, sit humilis.*

Esto humilis quisquis fieri cupis incola cœli:
Fastus tartareis excrucietur aquis.

2 *Tardi & considerati ad loquendum debemus esse.*

Qui cito præcipitat velox sine pondere verbum,
Errat; demissum non revocare potest,

3 *Quod dices faciesve aliis, tibi fiet & dicetur.*

Quæ dices aliis tibi mox responsa remitti
Exspectes: cupies, qualia dona dabis.

4 *De iracundo semper excedente justitiam.*

Qui temere & præceps rabidas exarsit in iras,
Excedet semper limina justitiæ.

5 *Quæ virginitati obstant.*

Qui vult virgineum cælebs servare pudorem,
Otia devitet, fœmineosque choros.
Sæpe pudicitiam mulier formosa propinqua
Eripuit castis, multaque damna dedit.

6 *Tutior est sibilus basilisci, quam cantus puellæ.*

Tutius in silvis basiliscum audire frementem,
Quam molles cantus fœmineumque melos.

7 *Tria mulieris petulantiam cobibent.*

Fœmina molle genus, turpes proclivis ad actus,
Ni vir sit custos, ni pudor atque metus.

8 *Laus virginitatis.*

Virginitas animi murus, victoria carnis:
Pectus honestatis sancta pudicitia est.

9 *Luxus ingenium & mores perdit.*

Nil lethale magis, quam luxu perdere mores;
Hæc pestis juvenum est sævior ingeniiis.

10 *Non decet virum muliebri cultu incedere.*

O quam turpe viro muliebri incedere cultu,
Molliæque evulsis reddere crura pilis,

11 *Conscientia bona nil timer.*

Qui recte vivit, contemnit jura superba:
Conscia mens recti nil timuisse potest.

12 *Amicus verus in re incerta cernitur.*

Invenies multos, si res tibi floret, amicos;
Si fueris pauper, nullus amicus erit.

Rebus in adversis patientia vera probatur,
Rebus in adversis vera probanda fides.

13 *Duplex pœna peccanti Principi imponenda.*

Si proceres peccant, si peccavere parentes,
Exemplo & scelere pœna paranda duplex.

Sape patris mores imitatur filius infans:

Qualis erat mater, filia talis erit.

Castâ refert castæ genitricis filia mores,

Lascivæ nunquam filia casta fuit.

Et verbo & facto parvis sit regula natis,

Optima fitque omni tempore norma pater.

Altera natura est habitus; quam junior artem,

Perdisces, tollet nulla senectâ tibi.

14 *Sola virtus beatos efficit.*

Sola potest homines felices reddere virtus:

Hinc soli e cunctis non Libitina nocet.

15 *Eloquentiæ vires.*

Nil tam difficile est, quod non persuadeat, & non

Efficiat docti lingua diserta senis.

16 *De eloquentia.*

Ancipiti eloquium longe penetrantius ense:

Hoc rabiem notam sedat, & arma virum.

17 *Qui verum audire non vult, perit.*

Desperanda salus, qui verum audire recusat,

Inque suum præceps labitur exitium.

18 *Conscientia bona iudicem non timet.*

Accusent te mille licet, mens conscientia recti

Stat tamen, & nunquam iudicis ora timet.

19 *Ad Vaniloquium.*

Omnibus in triviis recitans tua carmina laudas:

Si vis ut laudem, disce tacere prius.

20 *Qui senex laudandus.*

Ut laudanda senis probitas; ita foeda senectus

Culpanda est, turpi quæ maculata probro.

21 *Poëtæ multa lectione opus.*

Instar apes debet variis excerpere libris,

Mellisfluo ut manet dulcis ab ore liquor.

22 *Se quisque metiatur, & aliis erit æquus iudex.*

TE perpende prius, nec det ibi purpura fastum,
Ut tibi, sic aliis arbiter æquus eris.

23 *Virtutis principium asperum, finis vero
amœnus.*

ESt opus incepto, finis virtutis amœnus,
Principiis quamvis aspera prima via est.

24 *Voluptas pestis juvenum & senum est.*

Vis fieri felix: est debellanda voluptas;
Hæc juvenum exitium est, pestis & illa senum.

25 *Factantia est omnibus invisa.*

Omnibus invisa est stolidæ jactantia mentis:
Dum de te loqueris, gloria nulla tua est.

26 *Quæ carent effectu, non sunt tentanda.*

Quæ fieri nequeunt, prorsus tentare recuses;
Ingenii debes pontus habere tui.

27 *Sapiens nihil invitus facit.*

Nil facit invitus sapiens: exire recusas,
Quod vitare nequis? velle necesse tibi est.

28 *Quos bene vestitos, eosdem quoque egregios vul-
gus putat.*

Si modo me spernis, mutata veste redibo,
Quod mihi non dederis, vestibus ipse dabis.

29 *Non est credendum blando adulatori.*

Qui te plus solito demulcet carmine blande,
Te capere insidiis nititur ille suis.

30 *Quæ scimus, docere; quæ nescimus, discere
debemus.*

Quæ nosti, impertire libens, facilisque roganti
Esto; quæ nescis, discere non pudeat.

31 *Qui alios reprehendit, se primum castiget.*

Cum fueris censor, primum te crimine purga,
Nec tua te damnent facta nefanda reum.

Ne tua contemnas, aliena negotia curans;
An tibi te quisquam junctior esse potest?

32 *Amico fac profis, ut tibi non obsis.*

ESto memot caro semper prodesse sodali,
Ut tibi non noceat præstita amicitia.

Sic utare, tuis egeas ne rebus, amicis;
Sarcina namque humeris sola ferenda tuis.

33 *Amici paucissimi.*

MIllibus ex multis unus vix fidus amicus,
Hic albo corvo rarior esse solet.

34 *Festinatio & ira sunt inimica consilio.*

Consilium præceps sequitur plerumque ruina,
Ira quoque est valde noxia consilio.

35 *De victu modesto.*

Sit facilis victus nullo irritante sapore,
Sed stomachum & gustum mordeat ipsa fames.

36 *Laus sit, modesta, vituperatio modica.*

Si quem laudaris, parce laudare memento:
Crimina culpato parcius ipsa tamen.

37 *Authoritas dicentis non est attenda,
sed quid dicat.*

Nec te dicentis moveat reverentia, sed quid
Dixerit, attendas, qua ratione probet.

38 *Ausonius in Epigrammate.*

Non est dives opum, dives; nec pauper inopsque
Infelix: alio nec magis alter eget.

Dives eget gemmis; Cereali munere pauper:
Sed cum egeant ambo, pauper egeas minus es.

L.

Omnia dispercut; mundo quæ pulchra videntur,

Divitias subito fors inimica rapit.
Perpetuo durant virtus doctrinaque rerum,
Inque illam fors nil, quod dominetur, habet.

Hæc

- Hæc tibi sola potest laudemque decusque parare,
 Te facit hæc veris deliciisque frui,
 Hanc studiose puer vigili tibi quære labore,
 Hæc tibi præ cunctis sit potiore loco.
- II. Clarius haud natus sequitur laus ulla, parentes
 Quam si dilectos debito honore colant,
 Hos cœlestis enim sequitur benedictio patris,
 Hisque datur fato prosperiore frui.
- Cum sibi jam mortem sentiret adesse Tobias,
 Hæc charo nato tum documenta dedit.
 Hoc, fili, cures, ut toto tempore vitæ
 Afficias matrem gratus ubique tuam.
- Hinc Salomon folio surrexit protinus alto,
 Ad se cum matrem cerneret ire suam.
 Omnibus in rebus naturæ hoc lexque requirit,
 Omnia disponens hæc jubet atque Deus.
- III. Qui vitam turpem & sceleratam vivere gaudet,
 Et nunquam timuit foeda patrare mala,
 Vulnere lethifero tam faucius est miser ille,
 Ut nunquam plane convaluisse queat.
- IV. Passibus ambiguis fortuna volubilis errat,
 Et manet in nullo certa tenaxque loco;
 Sed modo læta manet, vultus modo sumit acerbos,
 Et tantum constans in levitate sua est.

Anagramma nominis Auctoris, a D. Dn. Tr. inventum.

Joannes Audoënus.

Ad annos Noë vives.

De eodem Distichon.

Nominis hoc Anagramma tui de te puto falsum;
 Verum de libris auguror esse tuis.

D. Dn. Tr. Med.

De eodem.

DE te deque libro verum est Anagramma, quid ob-
 Tuque facis librum vivere, teq; liber. (stet?)

Johannes Rosse I. C.

EPI.

EPIGRAM-
MATUM

JOANNIS OWEN,

Oxonienſis, Cambro-Britanni,

LIBRI TRES.

Ad

HENRICUM, Prin-
cipem Cambriæ,

Duo.

Ad

CAROLUM Eborac-
cenſem,

Unus.

AUTHOR
AD LECTOREM.

IN laudam Autoris, solenni, at more recenti,
Miraris, quare, carmina nulla legas?
Nostra patrocinium non possunt carmina; quare?
Si bona sunt, bona sunt; si mala sunt, mala sunt.

Idem, ad eundem.

Non sunt quod lites Epigrammata nostra, nec au-
tor
Quod sub caudico vociferante cliens.
Nemo potest versus (nec tanta potentia regum)
Vel servare malos, vel jugulare bonos.

EPIGRAMMATUM

JOANNIS AUDOENI,

Cambro - Britanni,

Ad

HENRICVM PRINCIPEM

WALLIÆ.

Liber Primus.

Ad H. Principem Augustum.

1 **I**N libris pro more novis & amore dicandis,
A summo fumo Principe principium.

Ad Mæcenatem.

2 **N**on ego patronum desidero versibus ullum;
Mæcenate liber non eget: Autor eget.

Ad Marcellum, I. C.

3 **P**aulini nuper patiens: Marcelle, fuisti,
Esse pares vultis? sit tuus ille Cliens.

Ad Henr. Walliæ Principem, Opt. Max.

4 **P**ectus & affectus, cerebrum, ratio, caput, & cor,
In te funguntur munere quodque suo.

Pectus enim cerebro, sensum ratione gubernas;
Cor, capitis jussu, non nisi iusta cupit.

Cambria tres inuicta tulit cognomine (o) Magnos.

Tu magnus, Princeps Optime, quartus eris.

(o) Tres Principes Walliæ cognomento Magni.

Mercurius Gallo-Belgicus.

5 **M**ercurius non fit de qualibet arbore; fingit
Mercurium ex ligno quolibet ille faber.

Orpheus.

6 **O**rpheus uxorem rapetam repetivit ab orco,
Duxit ab inferno foemina nulla virum.

7 Vestes

7 *Vestes Academicæ. Ad Oxonienses & Cantabrigienses.*

CUr, quicumque studet generosis artibus, ater
Cernitur, & nostra Clerus in urbe niger?
Defunctum nostræ lugent ob Apollina musæ?

An Mæcenatis funera flenda dolent?

Hæredes habet iste tamen; concedo; bonorum
Scilicet hæredes, non bonitatis habet.

8 *An Petrus fuerit Romæ.*

AN Petrus fuerit Romæ, sub iudice lis est;
Simonem Romæ nemo fuisse negat.

9 *Εἶναι καὶ ἔχειν.*

Esse & Habere, bonum est: dixit quis nescio Grajus;
Addidit Almannus nescio quis: Bibere.

10 *Ad Ligurinum.*

UXorem, Ligurine, tuam colit Artius: alter
Sementem facit; sed tua messis erit.

11 *Non occides; non furaberis.*

Furtum non facies; Juristæ scribitur hæc lex.
Hæc, non occides, pertinet ad Medicum.

12 *In Alanum Decoctorem Chymistam.*

CHymicus ex auro non aurum fecit Alanus;
Aurum ex non auro non potuit facere.

13 *Ad Henr. Principem.*

Primum est, esse suum tamen hoc cui fata nega-
runt,

Alterius non fit, qui Tuus esse potest.

14 *Ad Ricardum, Comitem Dorcestriæ ex Gal-
liis reducem, 1617.*

MUtavit, quod raro solet, mutatio Coeli
In melius mores ingeniumque tuum.
Doctior & melior, tibi gratulor ambo, redisti,
Magne Comes; redeas tu licet, unde redis.

15

Novem. { Musæ
 { Mutæ.

Moestæ cum sileant Musæ, quid referat, utrum
Musas an Mutas dixeris esse novem?

Ut γλάσσα a γλάττω differt idiomate tantum,
Discrepat a Muta nunc mea Musa parum.

16

Honoris { Etymo-
 { logia.
 { Genea-

Divitias & opes Hon lingua Ebræa vocavit:
Gallica gens aurum Or, indeque venit Honor.

17 *Ad Cornutum.*

Littera Pythagoræ discrimine secta bicorni
Dicitur; est tua frons littera Pythagoræ.

18 *Ad Dindymum.*

Mandere te modios mecum salis, inquis, oportet,
Cœptus ut ad summum progrediatur Amor.
Manducare salem meminit te, Dindyme nunquam:
Dic igitur, quando noster amicus eris?

19 *Mulier Canonica.*

Est mulier, tanquam generalis regula quare?
In multis fallit regula; sic mulier.

20 *Votum Salomonis.*

Cur regis sapientis erat Sapientia votum?
Optasset Salomon, si sapiisset, opes;
Non optavit opes Salomon; sapientius optat;
Nam sapere optavit; cur? quia non sapuit.

21 *Quid novi.*

Nil ait esse novum Salomon sub sole: Columbus
In veteri mundum repperit orbe novum.

G

22 Bri,

22 *Britannicarum mulierum trinitas, unde nata
est Britanniarum unitas.*

Conservere Rosas (p) Henrici mater & uxor;
Uniuert Henrici (q) filia Regna duo.

Filius o felix! felix Henrice maritus
Septime! terfelix in (r) Trinepote pater.

(p) Septimi (q) Margareta Margarita Jacobi 4. R.
Scotorum uxor, Unionis mater. (r) Jacobo I.
Britanniæ Monarcha.

23 *Δῶρον βασιλικόν.*

Est optata tibi, Salomon, Sapientia; *Doron*
Optasti, Regum maxime, *Basilicon*.

24 *Beati* $\left\{ \begin{array}{l} \text{Muni-} \\ \text{Paci-} \end{array} \right\}$ *fici.*

Jacobus laceras Britonum res munit & unit,
Munificus Rex est noster & Unificus.

25 *In Gaurum Ecclesie Canonicum.*

Apocryphas inter legitur Sapientia chartas:
Tu, licet insipiens, Guare Canonicus es!

26 *Limax Emblematicum.*

Limaces, male convenientes sunt vir & uxor;
Non habitant unam foemina masque domum.

27 *Christ. Columbus.*

Cedere diluuium, camposque patere liquentes,
Nuncia de caelo prima columba venit;

Aequora sic ultra nostris incognita primus
Nunciat immensos esse columbus agros.

Aurum arham secum tulit alter, ut altera olivam;
Alter divitias, altera delicias.

SI (s) manus offendat de dextra, abscindito dextram:

Offendat si (t) pes, abjice; Christus ait.
 Corpus in errorem dexter si ducat (u) ocellus,
 Ipse oculus peccans effodiendus erit.
 Quælibet abscindi pars corporis ægra jubetur;
 Excipiunt Medici Theologice caput.

(s) Marc. c. 9. v. 43. (t) v. 45. (u) 47.

29 *Ad Georg. Archiepisc. Cantauriensem gratulatio 1611.*

OXonium cito de Rectorem, Venta decanum,
 Pontificemque (x) urbes obtinere duæ.
 Venisti Londinensem cito Præsul in urbem;
 Factus es Anglorum Metropolitano cito.
 Lectus es in triplicem cito, Rege vocante, Senatam:
 Quid super est optem quod tibi? Sero mori.
 (x) Litchfeldia & Conventria.

30 *Ad judicem Decianum.*

NOn volo te surdum, non mutum: te volo ca-
 cum:
 Non claudum: mancum te, Deciane, volo.

31 *Cæsaris Cæsari; Dei Deo.*

OMnis principium finemque habet æqua pote-
 stas,
 Fine caret solus principioque Deus.
 Indefinita est, non infinita potestas
 Cæsaris; in terris omnia nemo potest.

32 *Tria Sabbatha.*

Saturnus, Sol atque Venus tria Sabbatha signant,
 Turcarum, Nostrum, Judæicumque vetus,
 Pallida Judæo est facies, & frontis imago
 Plumbea; Saturno dixeris esse satum.

Uxorū vir multarum, quo Sabbathā seruet,
Elegit Veneris non male Turca diem.

Quo sol iustitiæ, Christus, mea vita revixit,
Solis apud nos est sola in honore dies.

33. *Ad Davidem Murray, equitem, H. Pr. ab
interiore thalamo.*

CUi faver, hunc princeps incautus honoribus auget,
Huic sapiens, dignus qui sit honore, faver:
Principis hæc nostri est virtus insignis; amore
Dignatur dignos: te, similesque tui.

34. *Possū, Volo, Nolo; Anomala.*

Quod volo, non possū; quod possū, nolo vi-
cissim:

Tota hominis vita est nil nisi, Nolo, Volo.

35. *Patientia.*

Vincit, qui patitur; petitur, potiturque petitis:
Vincitur, at semper fœmina, quæ patitur.

36. *De genuflexione problema.*

Cum deferetur honos demisso poplite, quare
Unum vir, mulier torquet utrumque genu?
Vir semel, at mulier bis serva creata videtur,
Paret enim patri virgo, marita viro.

37. *Ad Guilielmum, Comitem Pembrochiæ Re-
gia Consiliis.*

Nondum ætate senex, juvenis nec moribus; ecce
Te jubet esse suum Rex patriæque patrem;
Quod te Rex tanto fuerit dignatus honore,
Gratuler? an quod sis dignus? utrumque licet.

38. *Ad Johannem electum Episc. Londiensem, 1611.*

Destinat æternæ te Rex doctissimus urbi;
Te sibi pastorem urbs ambitiosa petit;
Sede vacante alii veniunt, de more petitem
Artis & ingenii præmia sacra sui;

Te Rex ipse vocat, vocat Archiepiscopus, ipsa
Te vocat Urbs, huc tu sede vacante venis.

39 *De ortu & occasu.*

SOle oriente, tui reditus a morte memento:
Sis memor occasus, Sole cadente, tui.

40 *Ad Petrum Junium, Scoto-Britannum, olim
Jacobi Regis praeceptorem.*

Nascitur indigne, per quem non nascitur alter;
Tu nasci, nosci tu, Petre, dignus eras.

Nempe tuo geniti tibi sunt de sanguine septem
Corporis effigies ingenique tui.

Doctorem tu tot pater es, doctissime Juni,
Prudentum quot erat Græcia docta parens.

41 *In Gaurum.*

STultus es & sapiens, quis credat, Gaure? Secun-
dum

Quid sapiens; Stultus quomodo? Simpliciter.

42 *ST.*

ST, quanquam taciturna silentia principis, edes
Tu sine vocali syllaba sola sonum.

43 *Dictum Henr. Comitis Northamptoniæ.*

UNIET UNIVOCE.

UNIVOCE Britones servire docemur, ET UNI
Jacobus, qui nos UNIET UNIVOCE.

44 *Quintum somniatorem.*

AUdivi te sæpe querentem & mane dolentem,
Quinte, quod in somno nil ita cernis, ut est.

Quid mirum, qui sola diu mendacia dicis,
Si nunquam noctu somnia vera vides?

45 *Ad Robertum Carum, regi a Consiliis, &c.*

PLebs huic raro favet quem carum rex habet, illi
Raro favent reges, quem leve vulgus amat:

Ardua res, Carum esse simul Regique gregique.

Te vehit aura duplex; Rex, populique favor.

46

In quendam Hypocritam.

Nescit, ais, mea læva manus quid dextera donet,
Credo, quod omnino dat tua dextera nihil.

47

I. Lipsii obitus 1606.

Secula post sex atque decem sexque insuper annos,
Clauisti criticum, Juste dolende, diem.

Viderunt hoc lucem anno mea carmina, quo tu
Mortuus es Lipsi; Nox tua nostra Dies.

48

*Thoma Overbury, Equitis poema ingeniosum,
de uxore perfecta.*

Uxorem Angelico describis carmine talem,
Qualem oratorem Tullius, ore potens.
Qualem describis, quamvis tibi nuberet uxor,
Æqualis tali non foret illa viro.

49

Locatio Beneficii.

Quod bene fit puero, perit; obliuiscitur ille;
Decrepto quod fit, non perit, ipse perit.

50

In Ambiguum.

Legista & Medicus sunt juris uterque periti;
Hic ægros, alter jure tuetur agros,
Jus dare cuique suum didicit Legista clienti;
Ægroto Medicus jus dare cuique suum.

Juris Legistarum quid differat à Medicorum
Jure rogas? Siccum est illud, at hoc liquidum

51

*Ad Henric. Principem 19. Febr. natum**Anno (y) 1594.**(y) Omen Aureum 1611. 19. Jun.*

Jam decimo nonoque ætas tua currit in anno:
Qui numerus, felix, (z) Aureus, omen habet.

Hic tibi nam, si me non fallunt omnia, secum
Aureus (a) ingentes offeret annus (b) opes.

(z) Figuræ numeri 1594. per additionem Arithmeti-
cam reducuntur ad numerum aureum, id est: 19.

V. G. 1. 5. 9. & 4. si addantur efficiunt 19. (a) 19.

(b) Aureus versus;

52 *Ad*

52 *Ad Regem.*
IN decimo nono Jubileo ætatis obivit,
 Qui post diluvium vixit & ante, Noë.
 Si mea vota valent, jubileos quot Noë vidit
 Secula tot vives; Tu (c) Noë noster eris.
 (c) Rex ante & post unionem Britannia

53 *In quendam parcum.*
TE laudo laudatorem, non laudo datorem;
 Scit laudare magis nemo, minusve dare.

54 *De Thoma Moro, Angliæ olim Cancellario.*
Ad Thomam Baronem de Ellesmer,
Angliæ Cancellarium.

Integritas morum Morum commendat, & ardor
 Ingenii, & docto dulcis in ore decor.
 Te quoque cor sapiens, gravitas, & gratia vultus
 Eximit è populo, conspicuumque facit:
 Totius integritas vitæ sine labe peractæ
 Te Moro æqualem moribus esse probat.
 Excipias Mori casus, & flebile fatum,
 Et causam mortis; cætera Morus eris.

55 *Natura brevium. Ad Lectorem.*
Commendent alii polixa polyssticha; curtum
 Distichon, ut munus, me brevitæ juvat:
 Omnibus in rebus, non solum epigrammate. Lector.
 Quodcunque est bellum dulce, bonumve, breve est.

59 *Duces uxorem, & alius dormiet cum ea,*
Deuter. c. 29.

Impleta in nostris hæc est scriptura diebus.

57 *Britannicæ unionis patria.*
 (d) **A**utorem Monadis tulit insula (e) Mona Bri-
 tannæ,

Fortunata Monas filia, Mona parens.
 (d) Audouenum Theodorum Henrici septimi avum;
 (e) Anglicè, *Angle sey*, Britannicè, *Mon*,

58 *Ad Jacobum Regem doctissimum.*

Esse bonum res est, me iudice, rara, Poëtam.
Esse virum, res, me iudice, rara, bonum.
Esse bonum, res, iudice me, rarissima, regem.

Tu tamen es vates, vir quoque, Rexque Bonus,

59 *In Cottam.*

Præceptum observat Paulinum in conjugè Cotta;
Cotta habet uxorem sic quasi non habeat.

60 *Tam Marti, quam Mercurio.*

Neptunus Baccho, Marti jungatur Apollo,
Mitescit studio Mars, ut Iacchus aqua.

61 *Ad Joannem Harington, Equitem, Joannis
Harington, Baronis de Exton
unigenitum.*

Exercent inter se te certamen honoris?
Nobilitas, virtus, ingeniumque tuum.

Hæc tria cum specto, verear cur dicere verum?

Jane tibi juvenem vix alit Aula parem.

62 *Sortilegium. The Lottery. Galli (f) la blan-
que appellant.*

(f) Omnis res dominanda est a majore parte.

Huc quicumque venit, flet in Albo, ridet in Atro;
Lugendi potius convenit iste color.

Candida cur damnum fert chartula, nigra lucellum?

An quia divitias Dis dat? At hic niger est.

63 *Ad Cælibem.*

Est bona res Uxor, melior Bona, ac optima Nulla:
Contingat nobis Optima, Nulla tibi.

64 *In Cottam nugonem.*

Seria dum tractas obiter tu, serio nugas;
Serio stultescis, Cotta, obiterque sapis.

65 *In Patum.*

Cornua Pæte gerit; fuerit quis, quæritur, autor:
Ex dono auctoris, scribito, quisquis erat.

Ex dono autorum; lunatæ inscribito fronti,
Autores semper res habet ista duos.

66 ΔΕΛΤΩΤΟΝ.

Humanæ vitæ scopulos ante omnia Deltas
Tres fuge: Divitias Dæmona, Delicias.

67 *Furca, ad P. L.*

Latronum finis funis, mors ultima merces;
Furca capit fures, hinc puta nomen habet.

At multi evasere; dabit Deus his quoque funem:
Rarus funesto fur sine fune perit.

68 *De ingenio muliebri, problema.*

Cur minor uxorum est, marum prudentia major?
Eva fuit costæ filia, non capitis.

69 *Minerva Eva.*

Ora Jovis cerebro nulli Sapientia nupsit;
Nupsit at e costâ conjugis orta sui.

70 *In Helium.*

Jurisconsultos multos injuria ditat;
Helius im mensis jure paravit opes.

71 *Unionis Britannicæ Status.*

Ad Regem.

Infula lana fuit sub Elitâ principe, sub Te
Neta, sub Henrico denique pannus erit.

72 *An Bacchus sit Deus.*

Ad Germanum.

Nonne vides, ut, cum vos dulcis inebriat humor,
Summa quatit capitem Bacchus & ima pe-
dum?

Exaltando pedes humiles, de sede superbum
Dejiciendo capur, se probat esse Deum.

73 *Ad Thomam Chalonorum equitem, H. Princi-
pis Camerarium.*

Artibus a teneris imbuere fideliter annis,
Principis evexit quem, Chalonere, favor:

Te, (tu nam tenues non aspernaris amicos,)
Non quia sis tantus, sed quia talis, amo.

74 *Amo, vocis Passivæ, Amor Activæ.*

Quisquis amat, servit; dominatur, quisquis ama-
tur:

Quisquis amat, patitur; quisquis amatur, agit.

75 *In Julium pseudomachum.*

Julius in mundo non est: ac mundus in illo est.

76 *Sacerdos & populus.*

Presbyteri labiis orant, Laicique laborant,
Plebs, dum pro populo Presbyter orat, arat.

77 *In Julium. 11.*

Ecce duo gladii! Christo Petrus ensifer inquit:
Ecce duæ claves, ô Petre! Christus ait.

Deposuit Petrus gladium, clavesque recepit:

Deponis claves Tu, gladiumque rapis.

78 *Similis similem.*

Foemina quæque matrem repetis, foetidissima quam-
vis:

Sit quamvis nebulo Davus, habet Dominum.

79 *Nosce teipsum.*

Ethica jungatur Physicæ, te noscere si vis;
Hæc docet imperium corporis, illa animæ.

80 *Æquitas Mortis.*

Flumina fluminibus distant. Sic nos quoque nobis,
Dum sumus in vita nos, fluviique via.

Ingressis pelagum sapor omnibus omnibus idem,
Mors omnes homines æquat, ut æquor aquas.

81 *Ad Thomam Button. 1612.*

Apenitus toto divisis orbe Britannis,
Missus ac occiduum, quod bene vertat, iter,

Quærito & invenies pelagi mysteria magni,
Principis Henrici Fata viam invenient.

In Gelliam fucatam.

82
Dissimilis pictura tibi est tua, Gellia? constat
 Picturæ similem te tamen esse tuæ

Certamina Majorum.

83
Parmensis magico magus in certamine nuper
 Ant' ivit cunctos, Dæmonis arte, magos.
 Scortus enim pactum Parmensis Dæmone fecit,
 Cumque sciente magis, cumque potente magis.
 Haud secus in magnis regnum qui militat aulis,
 Sub Domino servus mira potente potest.

In Ruffum Hypocritam.

84
Devotos, inquis facit, ignorantia; primum
 Inter devotos do tibi, Ruffe, locum.

Ad Anglos problema.

85
Gallo-Hispano, Italo parvi cur penditur uxor?
 Gentibus his mulier nulla videtur (g) Homo.
 (g) Hommes, Femmes: Hombres, Mue-
 res: Huomini, Donne.

In Cinnam Medicum.

86
Tollere scis morbos, at quomodo? tollis & ægros;
 Quodque facis, (Iudas ut) cito, Cinna, facis.
 Qui tuus est Patiens, ô terque quaterque beatum!
 Ægrotare illum non patiere diu.

Habemus unum Advocatum in Cælis.

87
Causidicum in cælis unum (inquit Paulus) habe-
 mus:
 Præter eum num qui sunt tibi Causidici?

Ad ætate juvenem, moribus senem.

88
Cur podagra inlequitur juvenem te Martis alum-
 num
 Musarumque, senum quæ solet esse comes?
 Error hic est morbi, morum gravitate senilem
 Te simulac vidit, credidit esse senem.

89

Ira brevis furor.

Sit brevis ira licet, non expedit esse furorem:
At quoniam furor est, expedit esse brevem.

90 *Ad Henricum Goodyeere, equitem Kal.**Jan. 1610.*

Quid tibi pro strena mittam Goodyeere? precabar,
Ut possis nomen multiplicare tuum.

91

Amor activus & passivus, ad Pontiam.

Scire cupis, quid amare ab amari distet? Amari
Pontia me tantum credo: at amare scio.

92

Ad Principem.

Mens mea nil præter generosum somniat aurum:
Felix sum tota nocte, dieque miser.

Auxiliatricem Princeps mihi porrige dextram,
Sic ego, non sola nocte beatus ero.

93

Divisio Arithmetica, ad I. S. mercatorem, 1607.

Divide nil, dum vivis, egentes inter amicos,
Mortuus invenies in Quotiente nihil.

94

Pediculus aulicus.

Blandus adulator per totam cursitat aulam,
Principis inprimis nobiliumque fores;
A pedibus sic nomen habens mala bestia totum
Infestat corpus, præcipueque caput.

95

Æsculapius trifrons.

Intrantis Medici facies tres esse videntur
Ægrotanti; Hominis, Dæmonis atque Dei.

Quam primum accessit medicus, dixitque salutem;
En Deus, aut Custos Angelus, æger ait.

Cum morbum medicina fugaverit, Ecce homo, cla-
mat;

Cum poscit Medicus Præmia; Vade Satan.

96

In Galateam.

Cervus, uti perhibent, mutat ramosa quotannis
Cornua: quotidie vir, Galatea, tuus.

97 *Aquæ & Terræ epithalamium.*

Nulla nisi in terris generatio fit vel in undis:
 Uniit ergo sagax hæc elementa Deus.
 Ut nihil humano generi generabile desit,
 Terra superfusæ subjacet uxor aquæ.
 Uxor Aquæ Tellus, Aqua Terraque sunt globus unus.
 Res bene conveniunt vocibus, Humor, Humus.

98 *De iisdem.*

Cur fluit ex terra, terram circumfluit Humor
 Ne quam terra sitim sentiat, unda famem.

99 *Mors in olla. Ad Criticos palatinos.*

UT verbum vetus inquit, in olla est mors: an in
 (h) aula?

Nam Veteres, Plauto teste, loquuntur, ita.
 (h) Veteribus latinis, olla & aula idem sunt.

100 *De diluvio, duplex problema.*

Cur pisci assimilant sanum proverbium? meritis
 Gentibus, hæc tantum natio salva natat.
 Cætera submersa; cur piscibus unda pepercit?
 Ne sobolem mater perderet ipsa suam.

* So foundas a fish.

101 *Carbo ligneus.*

Natus in igne fui, periturus igne vicissim:
 Sylvas absumpsit dignus in igne mori.

102 *In Gelliam.*

ATeneris Papista fuisti Gallia: pejor
 Papista nunc es, quomodo? Catholica es.

103 *In Aulum.*

Seu gravior lecto morbus te affixerit, Aule,
 Sive cavus doleat dens, stupidumve caput.
 Outinam in cælis essem? tibi dicere mos est;
 Dicunt hæredes non minus, Outinam!

158

LIBER PRIMUS.

104

Mulier quale animal.

Sensu intacta caret virgo; cum nupta maritum
Sensit habet sensum, sed ratione caret.

105

Ratio & Oratio.

Rhetorica est palmæ similis, Dialectica pugno;
Hæc pugnant, palmam sed tamen illa refert.

106

Testes.

An quia testamur sexum, sic dicimur? an quod
Nequitæ testes adsumus ambo tuæ?

107

In obitum Henr. Cuf. 1600.

Doctus eras Græce, felixque tibi fuit Alpha;
At fuit infelix Omega, Cuffe, tuum.

108

In Festum.

Uxorem jam Feste senex vis ducere? doctam
Angligenæ Lili consule Grammaticam;
Illic invenies indeclinabile Cornu;
Hunc scopulum pauci præteriere senes.

109

Thomas Morus.

Quid de se fieret, meditans in carcere Morus,
Inspicit urinam: nil ibi triste videt.
Urinam Regis potius Iustrasset: in illa
Vidisset mortis turbida signa suæ.

110

In Cornelium.

Cornutum te, Corneli, scis esse, tacesque:
Non Cornelius es tu modo, sed Tacitus.

111

Triplex mendacium { *Dictum.*
 { *Fictum.*
 { *Pictum.*
in Tullum.

Sculptorum est mendacia fingere; pingere manus
Pictorum; cujus dicere, Tulle? tuum.

FINIS LIBRI PRIMI.

EPI.

EPIGRAMMATUM JOANNIS AUDOENI,

Cambro - Britanni,

Ad

HENRICUM PRINCIPEM.

Liber Secundus.

1 *Ad Henr. Principem Walliæ, Opt. Max.*

Optima det tibi velle Deus, verissima scire:
Hæc cuiunque dedit (i) maxima posse dabit.
(i) Magnum esse bonum est, Doctum, melius: Bonum, optimum.

2 *Ad Jacobum Magnæ Britanniæ, Franciæ Hiberniæ, &c. Regem Opt. Max.*

Omnia formidant, formidanturque tyranni:
Semper habet comitem vis metuenda metum.

Cur metuas causæ nihil est, Rex maxime regum.

Optime Rex, causæ est, cur metuare, nihil.

3 *Hysteron, Proteron.*

Hysteron est Proteron præpostera forma loquendi:
Exempli causa. Cant' Brigia Oxonium.

4 *In decrepitem tertiam uxoris virum.*

Prima tibi Clotho, Lachesis fuit altera conjux:
Atropos est vitæ tertiæ nupta tuæ.

5 *Amor.*

Libertas, carcer, pax, pugna, dolenda voluptas:
Spes metuens, mel, fel, seria ludus, Amor.

6 *Minos.*

Qui pro justitia poscit, sibi munera Minos,
Est similis pisci, quando capit, capitur.

7 *Dubitantiis.*
SUspicor alterutrum, scio neutrum, utrumque pa-
 ratus

Crederet; Phœbus erit, qui mihi dicet, utrum.

8 *Ad Adam. Neuton, H. Principi a Secretis.*
MOres mutat honos hominum plerumque priores,
 Moris id est; non est mos tamen ille tuus.
 Mutatus non mutaris; mirabile; tradunt
 Se Fortunæ alii, traditur illa tibi.

9 *Ad Thom. Puckering, Equitem & Baronetum.*
CARE, tuum, Thoma, si fas tam prisca referre,
 Ingenium colui nobile primus ego.
 Doct̄or ego, Pukringe, fui tuus, optime, primus;
 Non sum, quod fueram, sum tamen usque Tuus.

10 *Tres haustus.*
PRæteritam primus, præsentem proximus haustus,
 Venturam exstingvat tertius iste sicim.

11 *Ænigma duplex.*
DIC mihi quæ fuerit, matri quæ (k) filia nupsit?
 Cujus erat (l) mater mascula, Nemo (m) pater?
 (k) Eva, (l) Adamus, (m) Deus.

12 *De fide Anagramma quintuplex.*
RECTA Fides CERTA est, ARCET
 mala schismata, non est
 Sicut CRETA fides fictilis; arte CARET.

13 *Ad Edoardum Coke, equitem, jurispruden-
 tissimum Judicem, &c.*

NATURÆ norum tibi jus, naturaque juris;
 Lis, & uterque tuo pendet ab ore cliens.
 Descripto responsa Britannus Apollo dedisti,
 Clara magis, quam quæ Delphicus ore dedit.
 Præsentis dirimis lites, tollisque futura
 Jurgia, præsentis voce, futura manu.

14 *Instrumentum Mathematicum, vulgo dictum*
A Jacobs Staffe. *Ad Mathematicum.*

Jacobi baculum tibi sumito; da mihi (n) scalam,
Monstrabit baculo plus mea scala tuo.

(n) Jacobi Scala Gen. c. 28. v. 12.

15 *Situs Terra.*

Terra stat æternum, Salomoni credere si fas:

Si fas Nasoni credere, Terra sedet.

Fessa vacillaret tandem, si Terra federet?

Si staret, caderet, quid facit ergo? jacet.

16 *Ad prudentem & fortem virum, Henr. Davers, Baronem de Dantesay.*

IN te fortunam virtus, prudentia casum,

Servilem superat spes generosa metum.

Te sequitur Fortuna comes, prudentia ducit;

Nulla (nisi excipiam Numinis) arma times.

Pergito tu, quocunque vocat Rex: Te duce victor

Miles erit: Dux te milite victor erit.

17 *Epitaphium mortis. Ad mortis mortem.*

IN cruce mors obiit: nunquam de morte resurget:

Mortis erat stimulus mors tua; crux, tumulus.

18 *De Papa & Lutero.*

Papa pater multas indulgentissimus unus

Expurgativo liberat igne animas.

Martinus Papis pater indulgentior unus

Omnibus est; omnes eximit inde Luter.

19 *De Deo & Homine.*

IN se Deus verbum est; fecit Deus omnia verbo:

Verba homines facimus, nos quoque verba sumus.

20 *Ad Georgium Carevum Equitem prefectum curie pupillorum, 1612. Jun. 13.*

DUM pupillorum commendat Rex tibi curam,

Se meriti curam monstrat habere tui.

21

De jejuniis.

PApa suo cur tot jejunia servat in anno?
 Ut successorem se probet esse (o) Petri.
 (o) Piscatoris.

22

Metamorphosis nova.

Efficiunt hominem vir & uxor amabilis unum;
 Sic homo fit quadrupes, qui fuit ante bipes.

23

In non-nullam.

Nervum inflammasti Fabiano; jam Fabianus
 Dicere jure potest; Uxor amore tui.

24

Aurum ex stercore.

Conductor foricarum ex stercore colligit aurum;
 Et duo præterea, Rusticus & Medicus.

25

Fronti nulla fides.

Uxoris crimen scriptum est in fronte mariti;
 Vir tamen est calamus, foemina charta viri.

26

Ad Guil. Ravenscroft, I. C. Calibem.

Coelestem vita degens in cælibe vitam,
 Quod possunt pauci, tu potes esse tuus.
 Cognati natorum instar tibi sint, & amici;
 Dum tibi cognatus sim vel amicus ego.

27

Historia hujus temporis.

Lex fuit historiæ vetus hæc, ne dicere falsum
 Audeat, & verum dicere ne metuat.
 Hæc est historiæ nova lex: ne dicere verum
 Audeat; & falsum dicere ne metuat.

28

Dos formosæ.

Formosam nudam volo; nudam non volo formam;
 Quæris, cum forma quid volo? materiam

29

Virgo Gallica.

Gallica virginitas parvarum est propria virtus:
 Virginis hic titulum sola (p) Pusilla gerit.
 (p) Pucolle Galli virginem vocant.

Virgo

Virgo Anglica.

NE quid vicinis concesserit Anglia Gallis :
Anglica quæque fere virgo Platonis homo est,
30 *In Nobilem novum.*

MAter erat netrix, pater in mare retia jecit :
Inde tuum decorat linea longa genus.
31 *Ænigma Penelopes ad proccam.*

ESt (q) quiddam, quod pene nefas mihi dicere versu
Hoc tibi vis totum, Pontiliane, dari :
Syllaba prima meo debetur tota marito :
Sume tibi reliquas, non ero dura, duas.
(q) Osculum.

32 *Bias,*
OMnia qui dixit mea mecum porto, videtur
Uxorem sapiens non habuisse, Bias.
33 *Chrysof. Græcus, ab Henr. Savello, Equite,
doctiss. correctissime editus Ætone. Ad
Henr. Savellum.*

Vitam in carne pius primam Chrysofomus egit ;
Nunc vitam exutus corpore, mentis agit.
Vivit & in scriptis. Naturæ debita matri
Prima, secunda Deo, tertia vita tibi.
34 *Philosophi Uxor.*

Vulcani formosâ Venus, Jovis inclita Juno
Uxor erat, nulli nupta Minerva viro.
Cur ira? Pallas enim cum sit Sapientia, nulli
Nubere vult homini: cur? quia nemo sapit.

35 *(r) Propria quarto modo.*
MEntitur, quisquis Communem Thaida dixit ;
Thaida semper habet solus & omnis homo.
(r) Omni homini, soli & semper.

36 *Stultorum par.*
CLaudius est (s) multo similis, Gorgonius (t) hinno;
Quod sit iners, matri debet hic: ille patri.
(s) Ex

(s) Ex equa & asino fit mulus, (t) ex equo & asina hinnus. Var. de re Rust. l. 2.

37 *Ad Edoardum Sackeville, ex Galliis reducem.
Comitis Dorcestriae unicum fratrem.*

Ingenium Natura domi tibi provida mater,
Consilium peregre resque locusque dedit.
Sirenium fugiens cantus & pocula Circes,
Unde redis senior, sanior inde redis.

38 *De Zelotypia Anglico-Gallico Italica.*

Cur Itali longe gravius quam Gallus & Anglus
Uxoribus lusus, oscula, furta ferunt?
Bestia peior ave est, cui nupsit adultera conjux:
Italus est (u) quadrupes, Gallus & Anglus (x) aves.
Gallus & Anglus aves, quadrupes est Italus? ergo
Ex tribus his solus cornua fert Italus.
(u) Becco cornuto, hircus. (x) Un Cocu, Gal.
Angl. *A Cuckold, Cuculus.*

39 *Sapientia Socratica.*

Omnia me, dum junior essem, scire putabam:
Quo scio plus, hoc me nunc scio scire minus.

40 *Mensa rotunda Regis Arthuri.*

Inscribi septem Sapientum nomina jussit
In tereti sapiens Delphicus orbe Deus.
Sit Arthure sagax, eques unusquisque tuorum
In tereti mensa primus & imus erat.

41 *Subsidium.*

Regem anima & nummis Ecclesia, corpore vulgus,
Nobilitas opibus corporibusque juva.

42 *Novus orbis.*

Nescio quot Cabalistarum schola mystica mundos
Asserit: innumeros esse, Epicurus ait.
At bene si numeres, duo sunt: rerum ille vetustus,
Verborum, in quo nunc vivimus orbe, novus.

Janus bifrons.

43 **I**ngenii virtus reminiscendique facultas,
Ista quod a tergo est, illa quod ante, videt.

44 *Corpus Terra.*

Telluris sunt ossa metallaque nervi,
Pellis crusta, p li gramini; sanguis aqua.

45 *Ad Pannicum de Mauro.*

Inter te dominamque tuam sua, Pannice, Maurus
Dividit: uxori res, tibi verba dedit.

46 *In Paulam Anglicam fucatissimam faminam.*

Fucata facie, fucosis fallere verbis
Mos tuus, in fucos fanda nefanda facis.

Ignavum fucos pecus a præsepibus arces,
Paula, tamen tuus est quid, nisi fucus, amor?

47 *Medicus & I. C.*

Dat Galenus opes, dat Justinianus honores,
Dum ne sit Patiens iste, nec ille Cliens.

48 *Ad Edoardum Wotton, Baronem Regia
Consiliis, &c.*

Mortuus est, cessitque loco cultissimus Heros,
Qui fuit arbitrio Palladis, ante tuus,
Non erit hoc, Edoarde, loco te dignior alter;
Te, Wottone, locus dignior alter erit.

49 *Anagramma: Galenus, Angelus.*

Angelus es: bonus anne malus, Galene? salutis
Humanæ custos? Angelus ergo bonus.

50 *Amor cæcus male audit.*

Non videt uxoris delicta maritus amator:
Nullus amat vere vir, nisi cæcus amat.
Nil oculo contra dominam, nil creditor auri;
Est igitur surdus, non modo cæcus, Amor.

51 *In Dyndimum mercatorem.*

Ar is Arithmeticæ didicisti, Dyndyme, partes
Tres primas, quartam disce, beatus eris.

52

Anagramma uxoris.

Insaturabile par sunt (y) orcus & uxor : ait Rex,
Unius experiens , alteriusque sciens.

Insaturabile p̄v. c. 30. v. 15.

Quilibet in uxorem cecidit, descendit in orcum ;
Rite inuersa sonant *Uesur* & *Orcus* idem.

53

Responsio.

Nuncupor *uesor* ego, non sim quasi conjugis *orcus* ?
Sed quia per totam sedulo *curso* domum :
In Muliere vir est, ut in orco Belzebub : ergo
Infernus si sit foemina, vir Satan est.

54

Religiosus.

Quod bene fit, male fit, nimium si fiat aperte :
Politicus.

Occulte dum fit, quod male fit, bene fit.

55

Tres Divæ.

Juno casta, Venus meretrix ; Virgo optima Pallas.
Est inter Divas rara Minerva duas.

56

Proteus Anglicus.

Utilia hæc ætas in amictu & honesta reliquit.
Nos jucunda juvant sola ; diuque nihil.

57

*Duo protegit unus, dictum H. IV. Regis
Francorum.*

Gallorum Rex regna, inquis, duo protegit unus ;
Protexere tuum nec duo regna caput.

58

Ortus & situs Solis.

Sol inter septem quartus mediusque Planetas :
In quarto & medio Sol situs ut (z) latus est.
(z) Quarto die creatus Sol.

59

Cæsaris, Pompeji & Crassi sepulcræ.

Africa Pompeji *celus*, Asiatica Crassi,
Tertia pars mundi Cæsaris urna fuit.

60 *Ædes urbanae urbanissimæ. Henr. Com-
Northamptoniæ.*

Arguit affectus domitos, mentemque polite
Compositam domini, compositura domus:
Infanas quicunque struunt ex tempore moles,
Exemplo discant ædificare tuo.

61 *Ad Oranum.*

Connubio jungam stabili propriamque dicabo,
Sæpe tibi dives dixit, Orane, focer:
Connubio nimium stabili tibi jungitur uxor,
Instabilis cum sit, quem profitetur, amor.

62 *In Felicem.*

Per totam Felix holosericus ambulat urbem,
Qui vix toto urbes vidit in orbe duas.
Qui mores hominum multorum vidit & urbes,
Mendicat panem pauper, in urbe sua.

63 *Fr. Drake.*

Ambitio *Draki* nullo reticebitur ævo:
Ambivit Terras, per mare *Drakus* Anas.

64 *Homo.*

Nil fueras, sed nec potes hoc meminisse, prius quam
Natus eras; aliquid cum morieris, eris.

65 *De Phæbo & Neptuno.*

Sol celer est, at Sole tamen velocius æquor:
Itque reditque die Sol semel; at mare bis.

66 *Uxor vi(n)ctæ.*

Vincitur nisi lingua prius, non vincitur uxor:
Uxorem solus qui super it, superat.

67 *Nuda veritas. In Alethum.*

Si posset Virtus (inquit Plato) nuda videri:
Mirus in hanc hominem conciperetur amor.
Vidit apud Venetos (si credere fas sit) Alethus

(a) Virtutes nudas, & vitiavit eas.

(a) Quatuor meretriculas, virtutum nomi-
bus insignitas.

68

De Baccho & Byrriba.

Laudatur vinum simplex, cerevisia duplex.
Est bona duplicitas: optima simplicitas.

69

In Gelliam.

Gellia Materie res una simillima primæ:
Hæc omnes formas appetit, illa mares.

70

In Papilum canos evellentem,

Nil opus est capiti canos evellere crines,
Papile: Græcari pergito: sponte fluent.

71

Ne sitis multi magistri.

Discipulus dum vult nemo, quisque esse Magister:
Omnes discipuli, nemo magister erit.

72

Ad Henr. VIII. Fidei Defensorem.

Hunc titulum Regi Florum Regique Leonum
Florentinus homo dat tibi Papa (b) Leo.

(b) Leo X. natione Florentinus, anno 1521.

73

Ad L. P.

Cum titulo gladium Regi, Leo Papa dedisti:
Te negat hoc titulo Rex, gladioque necat.

74

Superbia vitæ.

EX humili licet ortus homo tellure, tumescit:
Sit licet ex nihilo nata, tumescit humus.

Sic homo, sicut humus, supra se tollitur ipsum,
Monte superbit humus; mente superbit homo.

75

Ad Gaurenum Taunsend. I. C.

Non tua se ad scenam componit lingua forenses,
Non tua vox querulo prostat avara reo.

Naturæ contemplaris mysteria matris:

Scripturam, leges, historiamque legis,

Tres Charites, septemque artes, ter tresque sorores

Te prohibent causas dicere: nosse docent.

76

Genesis & Evangelium S. Matthæi

Explicat hic Christi Genesis liber, alter Adami:
Incipit a Genesi Lex, & Evangelium.

77 *Quidam nemo.*
IN sacris, homines Animas Ebræa vetustas
 Appellat: tanquam nil nisi mens sit homo.
 Nemo Anglis *Nobody* est, & Quidam *Symbodi*, tan-
 quam
 Anglicus ex solo corpore constet homo.

78 *Amatorium.*
SI tu Zodiacus fieri, mea Lesbia, velles,
 Hac ego Sol fieri conditione velim.
 Zodiacum in toto percurrit Sol semel anno:
 Ast ego te quavis, Lesbia, nocte semel.

79 *Ad Librorum Castratores.*
Qui sapitis nolite meum castrare libellum,
 Gignat adhuc alios ut liber iste libros.

80 *In Gelliam Aulicam.*
Gellia dic sodes, multis cur prodiga præstas
 Uni promissam remque fidemque viro?
 Mos vetus est, & adhuc nostra servatur in aula,
 Pluribus ut pateat clavibus una fera.

81 *Eva & serpentis Conciliabulum.*
Peccatum peperit sermo serpentis & Evæ;
 Ille utinam mutus, surda vel ista foret.

82 *Ad Robertum Jonston, Scoto-Britannum.*

Ingeni Jonstone tui sum factus amator,
 (c) Historiæ legerem dum monumenta tuæ.
 Nil magis ingenium nihil ingeniosius exstat
 Tergeminæ Britonum gentis in historia.
 Excipias unum Morum de Rege Ricardo;
 Nemo Britannorum dignior invidia.
 (c) Nondum in vulgus editæ de rebus Britannicis &
 Hibernicis sui temporis.

83 *De seipso.*
Sum, fateor doleoque, minorum ex ordine fratrum,
 Frater, opes patriæ & bona, major habet.

84 *Vende omnia quæ habes; & da pauperibus.*
In Petum.

Consilii partem servasti, Pæte, priorem,
At pars neglecta est postera tota tibi.
Nam venum bona cuncta dedisti; eademque dedisti
Aut Veneri aut ventri; pauperibusque nihil.

85 *Nec* { *ex malis minimum.*
ex bonis maximum.

OPrima sit quamvis, uxorem nolo gigantem:
Uxorem nanam nolo, licet mala sit.

86 *Sirenium Cantus.*

Sirenium cupis incolumen servare salutem,
Sirenium cantus effuge; sanus eris.

87 *Epistola amatoria.*

Nullus amor sine spe, dubius qua vivit amator:
Nulla placet sine re spes mihi; res sine te.

88 *Amor cæcus.*

Ebrietas & amor similes; extinguit uterque:
Corporis ebrietas lumina, mentis, Amor.

89 *S. T. Divitis Testamentum.*

Omnia das, quia nil potes hinc auferre; dedisses,
Si tecum posses omnia ferre, nihil.

90 *Aër, Aqua, Terra, Infernus.*

Terra supernorum sordes immunda receptat:
Terræ immundities Orcus in ima trahit.

Quicquid in orbe mali est, aliquando feretur in orcum.
Fertur ut in centrum quicquid in orbe grave est.

91 *Zodiacus Christianus.*

Cœtus Apostolicus, cœlestia sidera bis sex;
Zodiacusque Fides; Sol mihi Christus erit.

92 *Erasmi encomium Moriae.*

Stultitiam non ut laudasti solus Erasme;
Te laudant multi, stultitiamque tuam.

93

In Gymnicum pastorem.

PAfcis oves verbis, te, Gymnice, grex alit herbis:
Scis decimare agrum, non medicare gregem.

94

In Dardanum.

PAllor in ore sedet, macies in corpore toto,
Dardane: nil in te est pingue, nisi ingenium.

95

*Placitum anno 1609. inter Rob. Calvin, Actorem,
& Joan. Bingley, & Ricard. Griffin, Reos.*

CUm postnatorum lis est agitata, Robertus
Jacobi vicit filius, omen habet.

Quod fuerit reus Anglicus alter, Wallicus alter,
Scotus utrumque actor vicerit, omen habet.

Omen amo; Britones jungent jam pectora palmis,
Non erit in partes Insula secta duas.

Post-nati natorum & qui nascentur ab illis,
Grex pastoris erunt unius unus, Amen.

96

In discordias nostri temporis.

Definit Logicus res, non modo dividit; At nos
Nil definimus, Omnia dividimus.

97

Ex malis moribus bonæ leges.

Conditor infanti legem præscripsit Adamo,
Moribus ergo malis lex fuit una prior.

98

4. Articuli Fidei, 1. 2. 3. 4.

UNum crede Deum, duo Biblia, symbola terna;
Quartam Conciliis quatuor adde fidem.

99

Ad Principem.

UT visum fugit urfa leonem magna minorem,
Maxima spes minima re veniente fugit:

Spes mea Te spectat, fortunatissimo Princeps:
Tu mihi spem misero tolle, beatus ero.

100

Ad H. Lectorem.

Exuo Narcissum, quoties Epigrammata scribo,
Exuat hunc, quisquis carmina nostra legi.

FINIS SECUNDI LIBRI.

EPIGRAMMATUM
JOANNIS AVDOENI,

Cambro-Britanni,

Ad

CAROLUM EBORACENSEM,
fratrem Principis, filium Regis.

Liber Tertius.

¹ *A Jove Principium.*

PRincipium Deus ipsum: In principio Deus ipso
Est post principium, principioque prius.
Principium sine principio est: A principio isto,
Principium capiunt omnia principia.

² *Ad Lectorem.*

CArmine vestitos præmisimus ante libellos:
Qui sequitur, nudus non venit, ecce, liber.
Si qua manent, meliora putas: Tu candide Lector
Quod speres, Autor quod vereatur, haber.

³ *Ad Carolum, Ducem Eboraci.*

ALtera spes regis, regni spes altera, solo
Principe Cambrorum, Carole, Magne, minor.
Consiliis Fullertoni doctique Moravi
Utere: consilio Dux duce semper eget.
Esto quod es; patri similis, fratrique secundus;
Nemo tibi similis, nemo secundus erit.

⁴ *Ars memoria.*

SEmonides olim memorandi repperit artem;
Nullus adhuc artem repperit ingenii.

⁵ *Res, nomen & verbum.*

OMnipotens omnes res condidit; indidit illis
Nomina vir; mulier denique verba dedit.

Redemptio & Regeneratio.

6 **N**Os Satan a muliere emit, Christusque redemit;
Christus nos lavit, quos maculavit Adam.

7 *Liberalitatis lass.*

QUod datur, æternum durat, sequiturque datorem:
Dantem & captantem, munus utrumque juvat.

8 *Bibliotheca nova Oxoniensis.*

Ad Lectores.

QUæritis Autores? coram quem quæritis adsum,
Quisque in classe sua classicus autor ait:
Tanti operis, quantum reliquo vix exstat in orbe,
Quæritis Autorem? Boldeus autor erat.

9 *Ad Academiam Oxoniensem.*

NULLa tuæ par Bibliothecæ est altera: nulla
Ingenior par est Bibliotheca tuo.

10 *Ad Annam Reginam.*

ES soror, & conjux, genitrix, & filia Regis:
Addere quid titulis possumus, Anna, tuis?

Quattuor his titulis virtutes quattuor addis:
Addere virtuti nil potes, Anna, tuæ.

11 *Ad Elizabetham, Regis filiam, &c.*

MULTorum, longa serie, de sanguine regum,
Regis digna toto, Cæsare digna viro;
Si, Te dum dignus ducat vir, virgo manebis.
Fas tibi, perpetua virginitate frui.

12 *Sermo & Scriptura.*

INterpres linguæ manus est, at multa loquentis,
Pectoris ut muti muncia lingua loquens.

13 *Novus homo.*

QUod superest, de pelle tua depelle vetustum,
De cute peccati decute triste iugum.

14 *Anagramma salutare.*

OPto tibi multam, nullam tibi Poto salutem,
Est potior pota sicca salute salus.

15

Fructus vetitus.

Nudus Adam vetita quod vult ab arbore, malum
Haud fuit, at malo pejus? Origo mali.

16

Kal. Januarii.

Tros inquit: timeo Danaos & dona ferentes.
Quis Danaus? pauper, Tros quis? avarus homo.

17

In Alconem.

Non habet Alco fidem; nummum vult credere
nulli,
Accredunt omnes illi; habet Alco fidem.

18

*Ad Robertum Garey, Equitem, Rectorem
juventutis Caroli Eboracensis.*

Elisabetha Regina tuo sobrina parenti,
Nominis & generis gloria quanta tui?
Creditus est Britonum Regis tibi filius: illa
Gentis, at hæc major gloria mentis erit.

19

Exemplar.

Exemplo virtus bene discitur atque docetur.
Qui dare mi suadet pauperibus, sua det.

20

Medium duplex.

In medio constat Tellus, tamen infima res est;
In medio virtus, res ea summa tamen.

21

N. O.

N præit, O sequitur; Nihil est antiquius Omni;
Scilicet, ex Nihilo condidit Omne Deus.

22

*Ad Jacobum Fullerton, Equitem, Rectorem
juventutis Caroli Eboracensis.*

Fullertone tuæ decus o doctissime gentis,
Est in tutela Regis imago tua;
Quæ sibi dissimilem ne sumat imago figuram,
Fullertone tuum est hoc onus, hic honor est.

23

Sanctitas, Sanitas.

Nemo diu, bene quisque potest, at vult bene nemo
Vivere; visne diu vivere? vive bene.

Oves & Caprae.

24 **A**scendunt rupes & promontoria caprae;
Gramine collino dum saturantur oves.
Sic nunc est: olim non ficerit, ad loca quando
Summa ferentur oves, inferiora caprae.

25 *Navis.*

Puppis cauda, carinaque venter, proraque rostrum:
Velaque sunt alae, totaque navis avis.

26 *Ad Thomam Moravium, Caroli Ducis Instit-*
utorem.

Si Jacobinum fas dicere Regis amicum,
In Jacobinis me profitebor ego.

Si Scoto quicumque favet Scotista vocetur,
Sum Scotista nec hoc inficiabor ego.

Tu me Thomistam totum, doctissime Thoma;
Tu me Scotistam, Scoto Britanne, facis.

27 *Sanguine, non virtute.*

Antiquum est, virtute decet, non sanguine niti
Non meritis tamen, at sanguine nitar ego.
Non, inquam, virtute decet, sed sanguine niti:
Non virtute mea: sanguine, Christe, tuo.

28 *Sol & Tempus.*

Sol celer est, at sole tamen velocior hora:
Hora stetit nunquam, Sol aliquando (d) stetit.
(d) Josua c. 10. v. 12.

29 *Sanguis.*

Sum crudus, vocor inde cruor: per corpora curo,
Volvor, & in venis sanguis ut anguis eo.

30 *In Pannicum divitem inertem.*

Quod fortuna favet fatuis, mihi credere non vis:
Si mihi non credis, Pannice, crede tibi.

31 *Brevitas. Anagramma triplex.*

Perspiciua brevitate nihil magis afficit aures,
In verbis, ubi res postulat, esto brevis.

32 *Tumulus I. Puckering, Custodis magni figi.*

Cernis in hoc tumulo tres fratres; quinque sorores,
E quibus unda deest; unus adhuc superest.

33 *Homerus.*

Mentiri cæcum cum nemo miretur Homerum.
Auritus testis, non oculatus erat.

34 *Erasmus.*

Quæritur unde tibi sit nomen Erasmus? Eras mus.
Resp.

Si sum Mus ego, te iudice, Summus ero.

35 *Parum, Nihil: Nimis, satis.*

Pauper in orbe parum, mendicus nil habet usquam;
Dives habet nimium; quis, nisi nemo, satis?

36 *Ad Henr. Wotton, Equitem, Regis Legatum, &c.*

In dubiis, Wottone, mei non immemor olim,
Serio sero licet, sum memor, ecce, tui.

Nuper apud Venetos legatum, jamque Sabaudos.

Fallor? an in patriam prospera vela vehunt?

Regis opus, pensare tuos, Henrice, labores;

Nescio (Secretum est) quando; aliquando, scio.

37 *Respice finem.*

Omega distinguit misero non Alpha beatum:

Ante obitum felix nemo, nec ante miser.

38 *Sabbatura polare. Ad polares.*

Una dies vestrum mox unaque terminat annum;
Septimus est annus septima vestra dies.

39 *Ad desiderantes legem Salicam.*

Francorum laudat legem nova secta virilem,

Ne regat imbellis Martia regna colus.

Lege regi regnum Salica vultisne Britanni?

Esto viri fortes, incipitote domi.

40 *Ad G. Gwin.*

In laudem, Gwaltere, tuam gratantia quare

Disticha non facio? Tu meliora facis.

Iri & Cræsi Epitaphium.

41 **D**ivitis exiguum est Cœli discrimen, & Iri
Pauperis; hic tumulum non habet, alter habet.

Mensis intercalaris, 1612.

42 **C**ur quarto solus creſcit Februarius anno?
Hic minimus Lunæ mensis ab orbe fluit.

In Felicem.

43 **D**ives eras, dum vivus eras, pauperrime Felix:
In Lazari malles mortuus eſſe loco.

Decem principia.

44 **U**na Categorias in ſe Subſtantia ter tres
Continet, ut Muſas unus Apollo novem.

Logica.

45 **N**aſcitur in tenebras animal, puer, inſcius, infans:
Conferat Oxonium ſe; cito fiet homo.

Ad Sam. Daniel.

46 **C**ur calamum tractas dextra, gladiumque ſiniſtra,
Eſt tibi Mars lævus, dexter Apollo tuus.

Novitas.

47 **D**iſplicet inſipiens novitas, delira vetuſtas
Non placet: eſt vero nil, mihi, Paule, prius:
Non ego ſum veterum, non aſſecta, Paule, novorum.
Seu vetus eſt, verum diligo, ſive novum.

Humilitas.

48 **U**beriora ferunt valles, brevioraque montes
Gramina: multum humilis mens ſapit, alta
parum.

Mens mons eſt, montisque cacumen mentis acumen:
Omne cacumen inops eſt, & cacumen iners.

Tres Philauti.

49 **P**roximus ipſe Egomet mihi ſum: tibi proximus
es Tu:

Quid prohibet quin ſit proximus Ille ſibi?

50 *Dies S. Marci. Ad Marianum Pastorem.*

CUr ovibus, non signa capris imponimus? olim
Servabuntur oves: non, Mariane, capræ.

51 *Ad Dindymum.*

TEmpore tempus edax edit omnia Dindyme: sed
tu,

Dum nugando teris tempora, tempus edis.

52 *Terra Anagrammata duo? de Cælo & Terra
paradoxon duplex.*

Mobile non errat Cœlum: stat Terra, sed errat
Funditus in varias undique fœta vias.

Errantum pedibus calcabor, humillima Tellus,

Vomere profcindar, dumque ero Terra, terar.

53 *Annus.*

VEr, Æstas, Autumnus, Hyems sunt integer annus,
Æstas Autumnno, Vere levatur Hyems.

54 *Cliens.*

PHarmaca si causæ vis applicet apta patronus,
Causidico clines callide crura Cliens.

55 *In Avarum.*

Non vis ut modico major pede calceus exstet;
Cur tibi quæris opum plus, tibi quam sit
opus?

56 *Patiens inversus, & Patientia divisa.*

Esse volo patiens, si nolo, cogor; At in spe
Hac ego fio potens entia cuncta pati.

57 *Serpens, Eva, Adam.*

Incautam serpens fallit, non fallitur, Evam;
Fallitur, haud fallit, conjuge captus Adam.

Activus muliebris erat passivus & error:

Fallitur & fallit fœmina; capta capit.

58 *Cygnus.*

Cum me fata vocant, ad amœni fluminis oram
Me moriens mœsto carmine solor olor.

59 *Ad Polydorum.*
Est Ablativo melior, Polydore, Dativus
 Dives; & accipiens munera dante minor.
 Heu nimium crebro nunc Ablativus in usu est;
 In pretio rursus quando Dativus erit?

60 *Ad Aldinum.*
Servus es infelix dominorum, Aldine, duorum:
 Alter enim tibi nil dat; nihil alter habet.

61 *Continentia triplex.*
Quicquid turpe vides aut audis; claude fenestras;
 Ne temere effundas frivola; claude fores.

62 *Saturni tres filii.*
Nummi potens unus fratrum, qui præsudet Orco;
 Amnipotens alter, Tertius Omnipotens.

63 *Senex juvenem alloquitur.*
Est mea vita brevis, nec tempore longa futura est,
 Est tua longa; brevi fiet & illa brevis.

64 *De libro.*
Oxoniæ salsus, (juvenis tum) more vetusto:
 Wintoniæque (puer tum) piperatus eram.
 Si quid inest nostrò piperisve salisve libello,
 Oxoniense sal est, Wintoniense piper.

65 *Ad Theodorum, Deo-datum Medicum.*
Nomine Tu Grajo Theodorus es atque Latino;
 Arte potens (e) Phœbi, ter Theodorus eris.
 (e) Medicum creavit Altissimus. Altissimus crea-
 vit de terre medicinam. Eccl. cap. 38, 14.

66 *In Quintum.*
Jurandi didicisti Adverbia quatuor olim,
 Tum puer: at nunc vir millia, Quinte, quater.

67 *Ad Iracundum.*
Ira cadat cum Sole, at non cum Sole resurgat:
 Semper cum Phœbo currat ad Antipodas.

68

De Pallio & Tunica.

CÆruleas olim tunicas menicasque gerebant
 Anglorum Davi, Desidiosa cohors.
 Pallia nunc gestant: cur pallia? veste sub ista
 Hic cyathum pulchre palliat, ille capum,

60

Mors.

Humanum in terris nihil est quod non sit humanum:
 Avolat hinc animus; cætera sorbet humus.

70

In Pontium Poëtam.

Claudicat & semper titubat pede Pontius uno;
 Hexametrum ingressu Pentametrumque refert.

71

In Fabianum.

TU vel quod dicis facito, vel dicitio saltem
 Quod facis; At neutrum tu, Fabiane, facis.

72

Edere libros.

Accidit hoc mihi sæpe volenti scribere versus,
 Ut libros edam plenus; inanis edem.

73

Hilarem Datorem, D. D.

Munera ne numerata, miseris quæcunque dedisti:
 In cœlis numerat, munerat illa Deus.

74

In Quintum Ramissam, tertium patris filium.

UNa duos tantum ramos quasi germinat arbor,
 Dividis in partes omnia rota duas.

Si rerum fieret divisio quæque bimembris,
 Est tua de patriis pars quota, Quinte, bonis?

75

Arma Cupidinis, arcus & calami.

Nudus Amor cur offensivis utitur armis,
 Non defensivis? Omnia vincit Amor.

76

De prosa & adstricta oratione problema.

CUr victus velocior est quam sermo solutus:
 Iste pedes sermo non habet; alter habet.

Cælum.

77 **N**uminis immensi sedes amplissima, cælum:
Omni-potens Dominus, Omni-patensque do-
mus.

78 **U**nde renascuntur mortales, unde vocatur:
A qua nascuntur cuncta, vocatur aqua.

Ἄριστον μὲν ὕδωρ.

79 **A** Chest of

{	<i>Suscipio.</i>	}
	<i>Scipio.</i>	
	<i>Pio.</i>	

Pyxidum Trias.

Pro patria patribusque mori, populoque Latino.
Corde animoque pio Scipio suscipio.

In Pontilianum.

80 **B**landus hero cauda canis irrequietus adulat:
Linguam pro cauda Pontilianus habet.

81 *Pulvis & umbra sumus.*
Horatius.

Desperet cælum natus de pulvere nemo.
Desperet cælum nemo quod umbra sumus.
Nostra caro est pulvis, sed eodem ex pulvere corpus
Fit Domini; Mens est umbra, sed umbra Dei.

Ænigma.

82 **D**ic mihi, quæ in cælis exstat vox (f) integra cujus
In terris tantum syllaba prima patet.
(f) Felicitas.

Dives.

83 **D**eterior fio, fieri dum ditior opto:
Major me fieri molior, haud melior.

Conversio.

84 **Q**ui modo *Salus* eras, in verso nomine, *Salvus*
Factus es: & *Παῦλος*, qui modo, *Φαῦλος* eras.

Recta ratio.

85 **T**empore quod nostro ratio fit recta, dolendum est;
Effet gaudendum, si foret illa regens.

86 *Ad Caroli Ducis Doctorem, Thomam Moraviam.*

TE novi, geniumque tuum, moresque, Moravi:
Scriptaque lecta mihi sunt tua digna legi.
Non Ductor Doctorve Duci fuit aptior alter:
Dogmata dum sequitur Dux tua, doctus erit.
Non trahere invitum, sed in optima sponte sequen-
tem,

Quanta tua est virtus, ducere posse Ducem?

87

Ad Ebraeos.

Religio Lex vestra; Fides at nostra vocatur:
Vos bene non vultis credere; nos, facere.

88

Irus.

Qui mensa excipitur, quique excipit, hospes uter-
que est;
Sum multorum hospes, nullius hospes ego,

89

Deus.

Dispersus toto licet infinitus in orbe
Sit Deus: in toto quæritur orbe Deus.

90

Aquila.

In sacris aquilæ portant mysteria templis:
Nunc est Jehovahæ, quæ Jovis ales erat.

91

Tobias Matthæus.

Ex veteri primum sortire, novoque secundum:
Ex Testamento nomen utroque trahis.
Hoc mirum est nomen Gentile Canonicon esse,
Hoc in fonte fides quod dedit, Apocryphum,

92

In Paraphrasin.

Ista paraphrasis est quasi circulus actus in orbem:
A centro ad circum linea, textus hic est.
Tangit enim extremas diametri circulus oras,
At centrum nulla tangere parte potest.

93

In Corbulonem.

Diruis, ædificas; quid Corbulo? diruis omnes
Divitias & opes, ædificasque nihil.

94 *In Gelliam Grammaticastram.*
Grammaticam veteres artem dixere loquendi:
 Gellia; Grammatica nil opus arte tibi.

95 *In quendam Grammaticastrum.*
ME flocci facis atque pili, nauci, atque terunci:
 Quanti te faciam scire cupis? nihili.

96 *Bellum.*
Solis militibus bellum res bella videtur;
 Militibus solis omnia bella bona.

97 *Divitie.*
Solus Dis deus est; Dites dii; Numina nummi:
 Cum plausu loquitur Pluto, tacetque Plato.

98 *Tria genera.*
Est dubii generis, castissima sit licet, uxor;
 Communis, meretrix; Fœminei, mulier.

99 *ST. ST. Silentii nota.*
Quid sibi Romanum vult ST? Sileto, Taceto;
 S monet, ut fileas. T jubet, ut taceas.

100 *Patria est, ubicunque est bene.*
 Where I do wel.
 There I dwel.

Illa mihi patria est, ubi pascor, non ubi nascor:
 Illa ubi sum notus, non ubi natus eram.
 Illa mihi patria est, mihi quæ patrimonia præbet:
 Hic, ubicunque habeo quod fatis est, habito.

101 *Conjux.*
Apta Duci non est uxor non aptaque Regi,
 Quæ duci non est apta, nec apta regi.

102 *Rhetorica & Dialectica.*
Rhetorice dicendi ars est, Logiceque docendi;
 Illa Sophistarum robor, at ista Sophon;
 Illa magis condita, recondita sed magis hæc est:
 Illa salax magis & salsa: sed ista sal est.

Rhetorice verum velat ; Logiceque revelat :

Hæc monet, illa movet : hæc docet, illa nocet.

103

Actæon.

CArmen edere canes Actæonis, ossa, cutemque ;
Cornua Londini conspicienda monent.

104

Multiplicatio & Divisio Arithmetica.

CUr dextram Divisio, Multiplicatio lævam
Respicit ? est virtus illa, sed hæc vitium.

Cur sursum Divisio, Multiplicatio deorsum
Adspicit ? hæc homini convenit, Illa Deo.

105

Arbor.

VEr viridem, flavamque æstas me fervida, canam
Autumnus, calvam frigida fecit hyemis.

106

Ad Theodorum Frise, Oxon. Theologum.

UNo non possum, quantum te diligo, versu
Dicere, si satis est distichon, ecce duos.

107

Unus Deus.

COelum Heterocliton est, ut noster Lilius inquit :
Plurali numero nam caret ipse Deus.

O quanta est veterum blasphemia Grammaticorum ?
Qui declinandum nos docuere Deum.

108

Dei genus.

NEurrius generis Deus est ; nec fœmina, nec mas ;
Hoc igitur Numen nec Dea, nec Deus est.

109

Gubernaculum corporis.

Insipiens linguam laxat, sapiensque refrenat ;
Quis minor aut major, quam tacuisse, labor ?

110

Ex malis minimum & maximum, Ad Maximum.

IN mensa semper minimum tibi sume malorum
Maxime ; malorum maxima, si bona sunt.

111

Unda.

Littera demta Undas udas facit, addita mundas ;
Littera transposita est, undaque nuda manet.

De somniis, paradoxon.

112 **Q**uæ mala sunt, bona sunt; mala, quæ bona somnia; quære;

(g) Gaudeo, si mala sunt; si bona sunt, doleo.

(g) Experrectus.

113 *Origo aquæ.*

Unda undæ; undarum tibi declinatio constat,

Derivatio non; unda sit unde rogas?

Annus ut in sese sine fine revoluitur annis;

Ad punctum redeunt annis & annus idem.

114 *Avaritia.*

Undique fluminibus currentibus in mare magnum,

Non ait, Unde venis? æquor, at; Unda veni.

115 *Adamas.*

Mittendi fidos Adamantes sunt ad amantes,

Solo adamante polit durum adamanta faber.

116 *Canis & Lepus.*

Sit quanquam levipes lepus & velocior hoste,

Hic sequitur magna spe, fugit ille levi.

117 *Vox & Scriptura.*

Lingua sagax aperit clausi mysteria cordis:

Scripturæ didicit vox sine voce loqui.

118 *Laurus.*

Arbor ego Phœbi viridis frondosaque semper,

Nescio calvitium canitiemve pati.

119 *Dicacitas & prudentia.*

Ingeniosus at imprudens, est absque cibo sal,

Doctus inurbanus quid? cibus absque sale.

120 *Aliquid ex nihilo.*

Ænigma Arith.

Addideris (h) unum nihilo, nihil inde creatur;

Adde (i) uni nihilum, nascitur inde Decas.

(h) 10. (i) 10.

*Ad Guil. Sutton, Oxoniensem,
Theologum.*

DEbeo plura tibi, quam verſu dicere fas eſt :
Debitor æternum, ſi mihi credis, ero.

Saturni & Opis filii tres, cohæredes.

Dites tres fratres : Neptunus, Jupiter, ac Dis,
Quid mirum? tribus his Ops bona mater
erat.

Eſſem Neptuno, Jove, Diteque ditior ipſe,
Sors mihi ſi matrem fauſta dediſſet Opem.

In quendam oratorem infinitum.

OMnia cum dixi, ſupereſt tibi dicere, Dixi :
Hæc mihi ſermonis vox placet una tui.

Ad Lectores.

Non cuivis Lectori, auditorive placebo :
Lector & auditor nec mihi quiſque placet.

LIBRI TERTII
FINIS

EPIGRAM-
MATUM

JOANNIS OWEN,

Oxonienſis, Cambro-Britanni,

Ad

Tres Mœcenates,

LIBRI TRES.

Ad

EDOARDUM NOEL,

Equitem & Baronetum,

Unus.

Ad

GUILIELMUM

SIDLEY,

Equitem & Baronetum,

Alter.

Ad

ROGERUM OWEN,

Equitem auratum,

Tertius.

EPI-

EPIGRAMMATUM
JOANNIS AVDOENI

Oxonienfis

Cambro - Britanni,

Ad

EDOARDUM NOEL,
Equitem & Baronetum,

Liber Primus.

1 *Ad Henricum, Augustum Principem Cambriae.*

Mæcenas Equitem primus cum Cæsare, Flacci
Foverunt gelidos Virgiliique lares.

Me quoque tres Equites, Tuque Augustissime Princeps,
Re simul & fati spe melioris alis.

Sunt Mæcenates mihi tres: quotcunque supersunt,
Si quis adhuc super est, Tu mihi Cæsar eris.

2 *Ad tres Mæcenates, Edoardum Noel, Guil.
Sidley, Equites & Baronetos, & Rogerum
Owen, Equitem auratum.*

ME cum desererent veteres, ut nunc fit, amici,
Vos insperatam Tres mihi fertis opem.
Vestra igitur summis junxi tria nomina, solus
Mæcenas dignus Cæsaris esse Comes.

3 *I. C. & Medicus.*

Ille vaser nisi sit, nisi sit temerarius alter,
Se mendicato pascat uterque cibo.

4 *Scala aulicorum.*

Nemo gradus nisi per plures ascendit in aula,
Ad descendendum plus fatis unus erit.

5 *Ad*

3 *Ad Edoardum Noel, Equitem &
Baronetum.*

Hæc tibi, Mæcenas, quamvis Epigrammata scribam,
Scripta legent alii, sint modo digna legi.
Quid plus ergo mihi debet lectore patronus?
Tu mecum lectus, non modo Lector eris.

6 *Ad Aulicum.*

Audacem fortuna omnis, cibus omnis edacem
Adjuvat; Esse aliquid si cupis, aude, & ede.
7 *Honoris & Divitiarum Comparatio.*

Donat opes homini Deus, & sibi poscit honorem
Ergo divitiis anteferendus honor.
8 *In Poëtas fabulosos.*

Fictum inter factumque parum distinguere curam,
Quodlibet ex quo vis Ente poëta facit.
Sortiri nomen sunt a faciendo poëtae:
A faciendo aliquid scilicet: imo nihil.

9 *In Tomasinum.*

Scripserunt Asini laudes hoc tempore multi;
Legimus & laudes, o Tomasine, tuas.

10 *In Fabianum.*

Extra calvescunt alii, tu calvus es intra:
Crinibus hi, cerebro tu, Fabiane, cares.
11 *Osculum.*

Una trisyllaba Vox inter celebratur amantes:
Quam sibi quisque sua vult ab amante dari:
Syllaba prima data est? reliquæ sine lite dabuntur;
Quæ dedit os, culum non minus illa dabit.

12 *Dalila.*

Samsonem rigidis spoliavit crinibus uxor;
Hoc nostro multæ tempore sunt Dalilæ.

13 *Conventiæ & Warvicum urbes Mediterraneæ.*

Non idem vobis Præsul, tamen Æacus idem:
Diversus vester spiritus, una caro est.

14

Natalis.

AD præsentia nascor, & ad ventura renascor:
Natalis prior est ille, sed hic potior.

15

De arte amandi.

JUdice me, rudis est, artem qui tradit amandi,
Naturæ scopus est, non opus artis, amor.

16

In Gelliam.

FUngitur officio rarus sine munere iudex:
Cur, nisi quod sanctum munere munus emit?

17

In Phyllidem.

SOLarem muliebris amor non durat in annum
Phyllidis: instabilem Phyllida Luna regit.
Menstrua mente solet Phyllis, non corpore tantum,
Quovis mense pati: menstruus hujus amor.

18

In Pætum problema.

NON pater es, non, Pæte, socer, non vitricus ho-
rum
Quos tua nupta tibi tot tulit: ergo quid es?

19

In Pontilianam.

NUPsisti undecimo cur, Pontiliana, Decembris?
Nulla magis nox est longa, diesque brevis.

20

Ad Frontonem I. Conf.

MULTA statuta noto pœnalia, Fronto, vocari;
Queis titulum dederint præmia, nulla lego.
Publica res olim fulcris innixa duobus:
Abrogat hæc ætas præmia: pœna manet.

21

Ad Edoardum Noel. Equitem & Baronetum.

INGenium tibi mire sagax natura creavit;
Addis naturæ viribus artis opem.
Virtuti fortuna tuæ comes utilis hæret:
Artis & ingenii dotibus addis opes.
Ut miseris fortuna dedit, succurrere posses:
Ut velles, virtus fecit: utrumque Deus.

22 *In Festum judicem injustum*
Quod Judas fecit, facito, judexve Pilatus:
 Suspendi non vis, Feste? lavato manus.

23 *Paronomasia.*
Judicat ex mento, non mente, puella maritum;
 Non mens, at sponsæ menta minuta placent.
 Pungi quam pingi mavult Venus improba: semper
 Peniculo penem prætulit alma Venus.

24 *Ad Martham de Quinto.*
Prodigus est & avarus amator Quintus amoris,
 Prodigus ipse sui, Martha, avidusque tui.

25 *Tergoris & Dorfi Erymologia.*
Posteriora vim vox neutra Latina notavit:
 Utraque fœmineis moribus apta fuit.

26 *In intestatum Colinum.*
Nil moriens, Coline, tuis das, omnia linquis.
 Parcus eras vivens: parcus eras moriens.

27 *De Virginitate & Conjugio.*
Virginitas angusta via est: via latior autem
 Conjugis; hinc plures ingrediuntur eam.

28 *In Pansam.*
Lis inter Pansam gravis Eunomiumque magistrum
 De sacris Cleri ritibus orta fuit.
 Exhibet Eunomius geminos, sua biblia, testes,
 Testamenta Dei non dubitanda duo.
 Quid cum Scripturis inquit mihi Pansa negoti est?
 Ecce Statutorum, Biblia nostra, librum.

29 *Ad D. T.*
Tu dominos sectare duos: mirabile dictu est,
 Si vel utrique places tu, vel uterque tibi.

30 *Fides mercatoria.*
Quo solet esse fides minor in debentibus aurum,
 In credente fides hoc solet esse minor.
 Diruit innumeros hoc tempore mercatores
 (Non tutum est hodie Credere) sola Fides.

31 *Gerundia & Supina.*

DI-Do Dum Æneas aberat, caruisse Gerundis
Dicitur; & nullum nosse Supina virum.

32 *Da mihi Angelum, & ego dabo tibi Spiritum.*

Spiritus huic sanctus promittitur; Angelus illi
Michaël; hic munus polluit, ille manus.

33 *Ad quendam Divitem.*

Magnus amor tuus est, si multum hoc tempore
dones;

Si multum credas, est tua magna fides.

34 *Ad duarum sororum parcissimarum servum.*

TRes Parcæ toto celebrantur in orbe sorores:
Expertus parcas es miser ipse duas.

35 *Pediculus.*

TU morsu me lædis; egoque tibi infero mortem:
Est tua culpa levis, non nego; pœna gravis.

36 *De malo in pejus.*

Incidit in Scyllam cupiens vitare Charybdim,
Qui morbum fugiens, incidit in medicum.

Stulti dum vitant vitia, in contraria currunt:

Qui litem fugiunt, causidicumque petunt.

37 *De prodigo & avaro.*

PRodigus omnis homo, miser est, miser omnis
avarus;

Istius miseri filius ille miser.

38 *In R. G. vindicta Divina.*

INviti sacras tenuisti præfulis ædes:
Te tenet invitum nunc aliena domus.

39 *In Damam.*

Promissum quoties quiddam te, Dama, rogavi,
Quod, quoniam præstas nil mihi, sæpe rogo?

Sæpe soles Faciam; Feci, mihi dicere nunquam:
Incipe jam Feci dicere, non Faciam.

In Linum infortunatum.

40 **Q**uid mirum, fortuna tibi contraria quod sit?
Crinita est illi frons; Line, calva tibi.

Amica ad Gaurum.

41 **A** Me nescio quæ manufcula in aure rogasti,
Si munus-culum vis tibi, Gaure, dabo.

Homo Pantophagus.

42 **N**on mare, non aër, non tellus, denique cuncta
Sufficiunt nostræ vix elementa gulæ.

Si quod edunt homines hominum substantia fiat,
Ut perhibent: Homines qualia monstra fumus?

Via lata.

43 **L**ata via est, & trita via est, quæ ducit ad orcum
Invenit hoc, etiam se duce, cæcus iter.

Ad, In, De.

44 **I**n libris tria verba meis celebrantur: Ad, In, De;
DE docet, AD dignos laudat, & IN lacerat.

In Quintum immisericordem.

45 **N**udus inopsve tuas si quis pulsaverit ædes:
Quinte, stipem misero qua ratione negas?
Mendicare stipem prohibet lex Anglica, dicis:
Esto, tamen miseris Lex dare nulla vetat.

Humanum est labi.

46 **T**erque quaterq; die iustus cadit, ut lego scriptum:
At quoties, scriptum non lego, iusta cadit.

In quendam ineptum scriptorem.

47 **O** Utinam vel tota foret tua nigra papyrus:
Tincta foret nullo vel tua charta nigro.

Fœneratoris apologia.

48 **Q**uo mihi divitiæ, si non conceditur uti?
Aëra nitent usu: me juvat usus opum.

In cornutura.

49 **S**i natura daret tibi cornua, tollere possis?
Quod tibi nupta dedit, tollere nemo potest.

50

Res iudicata.

Lex quamvis ratio Ciceroni summa vocetur,
Et bene laudetur Lex quæ ratione probatur :
Invenies inter legistas raro logistas :
Moris & exempli leges sunt, juraque Templi.

51

Mulier.

Formosæ sunt famosæ, juvenesque jocosæ ;
Ingeniosa, sagax foemina, falsa, falax.

52

Quatuor Termini forenses.

Terminus a sancto princeps Michaële vocatur ;
Legistam inprimis (k) Angelus iste juvat,
Terminus hunc Hilari sequitur, nec nomine vano ;
Causidicos hilares Terminus iste facit,
Causidicis instar (l) libri paschalis habendus
Tertius ; a sacro Paschate nomen habet,
Quartus habet Triadis titulum cur terminus ? omni
Est in lite (m) Trias callida, nulla Monas.

(k) Effigies Archangeli Michaëlis in nummo aureo
Anglicano. (l) *Easter booke.* (m) Cliens, Cau-
sidicus, Judex.

53

Crux in foro cauponario, ad Christum.

Restat imago Crucis ; Tua, de cruce tollitur : ecce
Christe, cruci major, quam tibi, constat honor.

54

*Duo I. Consultorum Collegia, Templum Me-
dium & Interius, idem esse.*

Ambo eadem domus estis ; idem jus ambo studetis :
Inter Jus Medium est Interiusque nihil.
Quæ media est, eadem magni res interna mundi :
Interius centro nam nihil esse potest.
Templum igitur Medium, medium licet usque vo-
cetur,

A Templo differt Interiore nihil.

De iisdem.

55 **P**arlamēta duo vobis, Chorus at facer unus :
 Atque focus vobis, ara sed una duplex.
 Ad cœnam vos sacro idem vocat ore Magister ;
 Non cornu vos ad prandia cogit idem.
 Vestra nec inspirat duo cornua Spiritus idem,
 Unica mens animat corpora vestra duo.

56 *Edoardus Noel, Liberalis.*

Liber-alis multos, Mæcenas optime, servos :
 Me quoque, Mæcenas optime, Liber-alis.

57 *Ad Faustinum.*

Essē bonum dixi nostrum, Faustine, libellum :
 Si bonus est, utinam sim meus ipse liber.

58 *O Tempora !*

Tempora mutantur, nos & mutamur in illis :
 Quomodo? sit semper tempore pejor homo.

59 *Traulifinus ad Balbinum.*

Sermonis quanquam vitio, Balbine, laboras ;
 Nemo potest nisi tu dicere ; Pa-pa-ter.

60 *Agna Oxon.*

Nupta senatori Benedicto non bene dicto,
 Credita quæ fueras Agna, reperta lupa es.

61 *Ad Aulum Medicum, gratulatio verna.*

Vere novo impuri renes & viscera purgant,
 Gratulor, Aule, tibi : ver, tua messis, adest.

62 *Poëta laureatus.*

Laurus in igne crepat ; vivunt in funere vates,
 Fallor ; an hinc vatium præmia laurus erat ;

63 *Ad Civem.*

Febre laborantem decedere Phœbus ab urbe
 Te juber, & cœlo commodiore frui.

In tua rura redis, urbanaque lucra relinquis ;
 Redditur in patrio pristina rure salus.

Sanus inopsque iterum Londinum, rure relicto,
Ire paras, iterum dives & æger eris.

P: istina Febris adest, dicat jam Phœbus, utrum sit
Utilior dives morbus, inopsne salus?

64 *In Labienum, Philautum.*

S: e solum Labienus amat, miratur, adorat:
Non modo se solum, se quoque solus amat.

65 *Vidua.*

U: xorem viduam qui ducit, idem facit ac si
In (n) longa vestem quærat ematque via,
Altera vestis uti magis est, minus altera trita;
Sic viduarum aliæ plus, aliæque minus.

(n) Long lane,

66 *Pyramus & Thisbe.*

I: n felix nostrum paries divellit amorem:
Quam longe distat, quam prope, noster Amor?

67 *Ad Pollum clientem.*

L: is pendet tibi Polle? semel tibi pendere præstat
Quam pendere diu, Solve, solutus eris.

78 *Frigus Calidum.*

E: st mare frigidior mulier; tamen urit amantem;
Sic calx, in gelidam jacta, calefcit, aquam.

69 *Par ma foy.*

P: er sanctam jurare fidem mos, non per amorem est;
Est tamen (o) ille Deus; non tamen illa Dea.

(o) Joh. in ep. I. c. 4. v. 16.

70 *Astro- }
 }logia.*

Physio- }

A: strorum in summo latet alta scientia cœlo:
In centro Physicæ vis veneranda latet.

Ut bonus Astrologus fiam, cœlum nimis altum
Impedit; ut Physicus, terra profunda nimis.

71 *Ad Edoardum Noël, de amantiſſima ejus uxore Elifabetba, Baptiſtæ Fiks, Equitis aurati filia.*

UT Juvenalis ait, dos eſt uxoria lites:
 Suspicor, affirmat quod Juvenalis, ego:
 Si lis, ut dixit vates, uxoria dos eſt;
 Duxiſti ditem tu, ſine dote tamen.

72 *In Ponticum.*

NIl mihi das: donabis, ais, poſt funera, quare
 Non moreris? bis dat, Pontice, qui cito dat.

73 *Impar Congreſſus.*

IN promptu ſemper ſtrictum Natho non habet enſem;
 In promptu parmam Pontia ſemper habet.

74 *De agris & nummis ad Pontilianum mercatorem.*

FOenus habet certos omniſque pecunia fines:
 At fundus fundo, Pontiliane, caret.

Fons plusquam cifterna valet, quam cifternae fundus;
 Sit cifterna licet maxima, fons minimus.

75 *In Famam.*

Virtutem parce laudat; vitiumque libenter
 Prædicat; hinc diſta eſt non male fama malum.

76 *In Gallam.*

Uſiſti me Galla videndo: tangere noli!
 Nam ſi uras oculis, quid facias oculo?

77 *In Linum decrepitem.*

Saturnum dictum memorant, quia ſit ſatur annis:
 Saturnum fieri te, Line, tempus erat.

78 *Tripudium.*

PEs loquitur, quem lingua tacet, cor dictat amorem,
 Laſciva argutum dum regis arte pedem.

79 *Joſ. Hal. Cantubrig. Vota & Meditationes.*

VOra vovenda noves, ſcribisque legenda: Beatus
 Qui tua vota legit, ſi tua vota facit.

80 *Anagramma. Ad Priscum senem.*

CUr non sunt, ut erant, crispī tibi, Prisce, capilli?
Priscus ego nunc sum, qui modo crispus eram.

81 *Nox Britannica.*

Dicuntur (p) minima contenti nocte Britanni,
Contenta est longa nocte Britannia frui,
(p) Juven. Sat. 2.

82 *Ad Næviam.*

SOl fugitur præsens, idemque requiritur absens;
Quam similis soli est, Nævīa, noster amor?

83 *In Festum mendacem.*

OMnis homo est mendax; puto, Feste, fateberis;
ergo
Mentiris dicit qui tibi dicit, Homo es.

84 *In Carpophorum.*

CUm ridente foris ridet simulator amica,
Carpophorus: flet cum conjuge flente domi.

85 *Mundus.*

IN mundo mundi duo sunt, mundissimus alter,
Immundissimus hic, Mundus uterque tamen.

86 *Ad G. I. mercatorem.*

Quo cui plus dederis, magis hoc tibi fiet amicus,
Quo plus credideris, hoc magis hostis eris.

87 *Satis-datio & Satis-factio.*

VOx in Cæsareo sit jure satis-dare quamvis
Crebra; in Pontificum Jure satis-facere;
Juristæ satis accipiunt, at raro satis-dant?
Multa satis dicunt, raro satis-faciunt.

88 *Wichamicus.*

Pompejanus ego non sum, non Cæsarianus,
Non sum Syllanus; sum Marianus, ego.

89 *Contra illud, quod vulgo dici solet, (q) Fratrem juniorem seniore generosiorum esse.*

Autor Adam generis, quo non generosior alter :
Nemo creaturi proximus ipse suo :

Ergo proximior quo quis numeratur Adamo,
Hoc generosior est, proximiorque Deo.

(q) The younger brother the ancients Centlemam.

90 *Deum nemo vidit.*

Insens mens Nomen non cernit, noctua lumen :
Non videt ista diem, non videt illa Deum.

91 *Senex non est homo.*

Risibile est animal juvenis ; mulierque puerque
Flebile : dediticic sicccus utrumque senex.

92 *In Saracenum, Aethiolum.*

Afficit insipidum quasi fabula te sinus Abræ ;
Malles in Saræ tu recubare sinu.

93 *Mos.*

Consuetudo & mos vim legis habere videntur :
Improbilas hodie vim quoque legis habet.

94 *In Albinum.*

Perdidit Albinus mercator remque fidemque ;
Nil ultra, quod jam perpere possit, haber.

Perdidit idem Albinus amator spemque fidemque ;
Quid superest quod jam perdere possit? amor.

95 *Anagramma.*

Vox eadem gerere & regere est : omenque notandum :

Ut regat uxorem vir, gerat illa virum.

96 *Amator desertus.*

Ignis ut Inferni, quamvis non luceat, ardet :

Sic tuus haud lucet, me tamen urit, Amor.

Igni elementari similis meus est amor in te?
Lucet enim, sed te non meus urit amor.

97 *De pœna Thaidis: problema.*

CUr, quæ peccavit non tergo, at pectore Thais,
Carnifici in pœnam tergora nuda dedit?
An quia culpa præit, sequitur sua pœna nocentem,
Judex in pœnam posteriora petit?

98 *Iri exsequiæ.*

Quartanæ par est pauper: campana peremti
Pauperis in tacito funere nulla sonat.

99 *Cræsi & Iri Epitaphium.*

Hic jacet, hic situs est Cræsus sub marmore; quæ-
sis:
Irus ubi jaceat pauper & ubique jacet.

100 *In Momum.*

Nuin te video quod amen, laudemve, probemve
Nil in te video, Mome, quod invideo.

101 *Unitatem non esse numorum.*

Scriptores inter peregrinos atque Britannos,
Nullius numeri sum, tamen unus, Ego.

FINIS
LIBRI PRIMI

EPIGRAMMATUM
JOANNIS AUDOENI,

Cambro - Britanni,

Ad

GULIELMUM SIDLEY,
Equitem & Baronetum,

Liber Secundus.

1 *Ad Criticum Aulicum.*

Nil distant labor atque labos, nihil arbor & arbor;
Idem honor est & honos: qui rapit ergo, sapit.

2 *Fides.*

Nos ratio docet esse Deum, cogitque fateri;
Hac ratione, Fides est rationis opus.

3 *Deus.*

Omnia cum videat, nulli Deus ipse videtur:
Solus ubique patet, solus ubique later.

4 *Ad Guil. Sidley, Equitem & Baronetum.*

TE linguæ variæ decorant & pagina legum;
Exornant artes & pietatis amor.

Consilio multis, opibus succurris egenti:

Hoc virtutis iter; Cætera mortis erunt.

Sic tibi, sit Christo, patriæ, patriæque parenti.

Vivito; post mortem Te meliora manent.

5 *Ad ejusdem unicum filium, Joan. Sidley.*

Janus es; at solo, juvenis jam, nomine; docti
Æmulus esto patris, re quoque Janus eris.

Vix erit, ut possis doctum superare parentem:
Æqualis patri filius esto; Sat est.

6 *Æquinoctium perpetuum.*
Ad cæcum.

Æ Qua fluit noctique dies tibi, noxque diei;
Non tamen æquatur linea quæque tibi.

7 *In Anabaptistam Ponticum.*

S I sanus vis esse, sacram servato diætam,
Pontice: cœnato sæpe, lavato semel.

8 *Dii Inconstantia.*

V Ertumnum celebrant Romani: Protea Graji;
Quæ non jam tellus Numen utrumque colit?

9 *Axungia.*

N E ficcus volvente rota crepet, ungitur axis:
Causidicum mos est ungere, ne taceat.

10 *In Harpalum, duorum filiorum (ut putatur) patrem.*

Q U i nomen gerit iste tuum, tuus, Harpale, non est:
Alterius nomen qui tulit, hic tuus est.

11 *Creatio Mulieris.*

P Aulus Evangelium populo dum prædicat omni,
Alloquitur (r) nostrum, non muliebri, genus.

Orate, o fratres (at non, Orate sorores.)

Presbyter in Missa dum sacra mussat, ait.

Temporibus divisa suis dum singula strictim
Explicat artificis Numine facta Dei.

Qui bonus est, frustra que nihil nec inutile fecit,
Vidit, ait Moses, hoc Deus esse bonum:

Additur hæc operi solemnibus clausula semper,
Excepto postquam foemina facta fuit.

(r) Viri, patres & fratres.

12 *In Papinianum & Ponticum.*

Posse errare negas te, Papiniane; sed erras:
Tu te errare negas, Pontice, posse putas.

13 *In Tustonum.*

Mortuus est Tustonus, opes de morte resurgunt,
In cumulo ut tumulo quæ jacuere diu.

14 *De pœna & culpa.*

Doctores peccata inter non-entia ponunt:
Cur non peccati pœna sit ergo nihil?

15 *In Mauros, qui Angelos nigros, Dæmones
albos pingunt.*

Innatum nigror non exiit arte colorem:
Albus in adversum vertitur arte color.

Posse negant sancti resipiscere dæmona patres:
Non est ergo Satai candidus; Hic niger est.

16 *P' Argeat fait teat.*

Unde fit, ut Francus post tot, post bella tot Anglus
Integer in solito regnet uterque solo?

Protexit generosa tuum te, Francia, (s) scutum:

(t) Angelus est custos, Anglia tuta, tuus.

(s) l'Escu. (t) P' Angelor.

17 *In quendam ebriosum.*

Garrulitate nihil sicca sitibundius; uxor
Te tua plus loquitur: cur bibit ergo minus?

18 *Verona, Placentia, & Beneventum.*

Ad Italum.

Verona Beneventanam raro itur ad urbem,
Esto Placentinus: tu (u) Bene-ventus eris.

(u) Ben venuto per tutro.

19 *Tempus, Veritas, Odium.*

Mater (x) Aletheia est odii. sed filia longi
Temporis: est odium Temporis ergo nepos.

(x) Veritas.

20

Temporis filia.

Dicta fui a priscis quæ filia Temporis : hujus
Temporis, a prisci filia dicar ego?
Temporis illius non filia, temporis hujus :
Temporis æternus Filia Christus erat.

21

Amor conjugalis.

Plurimus in cœlis amor est, connubia nulla :
Conjugia in terris plurima, nullus amor.

22

*Decalogus, Oratio dominica & Symbolum
Apostolicum.*

Unus amor, præcepta decem : spes unica vota
Sunt septem ; articuli sex bis, at una fides.

23

Ad Callistratum.

Splene laboranti male unum, Callistrate, dixi ?
Splen ridere facit, splen quoque flere facit.

24

Sol.

Tres infra totidem supra te cerno planetas :
In medio virtus maxima, Phœbe, tua est.

25

Metaphora.

Naturæ linguam corrupta scientia nescit,
Naturæ voces lexica nulla nutant,
Sensa figurato promit sermone colonus ;
Gestit & urbano rusticus ore loqui.
Vita quoque ornatur variis, ut lingua figuris :
Tota figurata est : Vivimus, ut loquimur.

26

Christus Theolog. Med. & I. Conf.

Theologi Medicique in terris munere functus :
Id cœlo peragit Judicis officium.

27

De jure Anglico-Wallico-Gallico.

Directum (y) Gallus (z) Cor-rectum Wallus, ac
Anglus
Nomine Jus (a) Rectum simpliciore vocat.

Diripit

Diripit errantes Lex lucida, corrigit omnes
 Errores; Juris Regula cuncta regit.

(y) Droit. Italice Diritto. (z) Cyfraath
 (a) Right.

28 *Castor & Pollux.*

Concordes duo sunt in cœlo sidera fratres,
 In terra unanimes vix reor esse duos.

29 *Quod differtur, non aufertur.*

Differt, non aufert mortem longissima vita:
 Quid differt igitur cras hodieve mori?

30 *Honoris venalis Apologia, Ad Baro-
 netos.*

Aurum arumque & honor Fortunæ sunt bona
 fortis:

Quicquid & humano pendet ab arbitrio.
 Forma, valetudo, vires, bona corporis almi,
 Non possunt pretio, nec bona mentis emi,
 Impietas, animam; est insanio vendere corpus:
 Fortunam fas est vendere; fas emere.

31 *Autoritas & ratio.*

In dictis hominum non Quis! considero, sed Quid:
 Contra in divinis, non rogo, Quid? rogo,
 Quis?

32 *Lucifer.*

Stella micans Veneris nocturna diurna que noctem
 Nunciat inducto vespere, mane diem,
 In cœlo semper solem comitatur euntem.
 In terra lucem cur fugit ergo Venus?

33 *De fine Mundi.*

Narravit Moses Genesin, primordia mundi;
 Exodon at nobis dicere non potuit.

34 *Ad Pontilianum.*

Uxoresne bonas binas tibi præstat, an unam
 Ducere difficilem, Pontiliane, rogas?

Alterutrum si sit mihi ferre necesse malorum;
 Quod minimum est, unam ducere malo malam.

35 *Perfectio legis Amor.*

EX bis quinque duo præceptis, æque duobus,
 Unum servato, sufficit illud; Ama.

36 *Devotio.*

Divitias Cleri peperit devotio vulgi;
 Degenerem prolem relligiosa parens.

37 *De cælo & terra.*

Terra oculos prope tota latet; patet undique
 cælum,

Humani generis te, puto, terra, pudet.

38 *Ad Aulum. In Sextum, de Quinto.*

Invidet, Aule, mihi Sextus? miseretco ego Sexti;
 Quinto, qui mihi non invidet, invideo.

39 *In Pollionem.*

Deseris uxorem; quo jure relinquitur? ante
 Conjugium a multis tacta probatur, ais.

Conjugium Præ-contractus, scio, non nego, frangit;
 At præ-con-tactus, Pollio, non dirimit.

40 *Meræ Tricæ, Ad N.*

Ese meras tricæ meretrices, haud male dixi?
 Scorta tamen raras in cute *τρίχας*, habent.

41 *Ad Pannicum exilem problema.*

Liber in exilio quodammodo, Pannice, vitam
 Nunc agis, in patria qui prius exul eras:

Vita magis fortunarum tolerabilis harum:

Extera libertas, exiliumne domi?

Quæ mea sit si forte rogas sententia? Malo

Esse relegatus quam religatus ego.

42 *Vespere.*

Sol abiens paulum lucis post terga relictum
 Monstrat; uti Mosis posteriora Deus.

Mane.

Mane.

Nos pulchram Phæbi faciem surgentis Eoo
Cernimus; Antipodes posteriora vident.

43 *Baptismus. Ad Judæum.*

LOtium Baptisma est; at Circumcisio vulnus:
Curantur sacra vulnera legis aqua.

44 *Heautontimorumenos.*

DUm mortem vitare studet, vitamque tueri,
Se toto vitæ tempore torquet homo.
Bruta bonis fruitur præsentis bestia vitæ;
Dum vivit, vivit; cum moritur, moritur.

45 *Ad Guil. Sidley, Equitem & Baronetum.*

ÆRe meres, & Te virtute mereris honorem,
Cum te nec mereat, nec mereatur honor.

46 *Ad I. P.*

GRæco-Latina, sagax, sapiens tibi quæritur uxor;
Quæque figurate syllogizare sciat.
Quæ cum Majorem præsumserit atque Minorem,
Ex male præsumtis urgeat Ergo sequi
Versata in parvis quæ naturalibus olim
Virgo, Magistra Artis nunc sit in arte sua.
Et respondeat Opponentibus omnibus una;
Cumque suo de omni differat Ente proco.
Tam rationalis mihi si contingeret uxor;
Mutarem tecum, si tua bruta foret.

47 *In Ramistam binembrem.*

DEfinis primum, tum dividis omnia; rursus
Definis: iterum dividis omne genus.
In tot particulas generalia singula scindis,
Longior ut *Μέθοδος* sit tua, quam sit *ἰδὸς*.

48 *Ad*

48 *Ad S. Paulum. De civitate Dei.*

Verberibus cum cæsus eras, defensio præfens,
Civis Romanus sum ; tua, Paule, fuit.
Judicii suprema dies cum venerit, an tum
Sat, Sum Romanus, dicere, civis, erit ?

49 *Christus.*

Venit in hunc mundum : vidit mortalia, mortem
Vicit ; & ad superos in sua regna redit.

50 *Ad G. Camdenum, Magnæ Britannia illustra-
torem maximum.*

Infula pene suis obliviscenda Britannis,
Mox in lethæos præcipitanda lacus.
Hoc tibi quod superest, Camdene, Britannia debet :
Tu quoque dum superest illa, superstes eris.

51 *Ad Perpennam.*

Est tibi Iunatæ, Perpenna, Parenthesis instar,
Inter cornua frons ? dura parenthesis hæc,
Dura Methatesis hæc, uxor tua prodiga carnis ;
Tota (b) *Κεῖς*, totum te facit esse (c) *Κεῖρας*,
(b) caro, (c) cornu.

52 *De vitiiis & divitiis P.*

Nemo hominum vivit sine crimine, sive crumenas
Crimine raro suo plena crumenta caret.

53 *Mortis & Macelli apologia.*

Mors nisi mactaret juvenes, laniique juvencos,
Omnia stultorum plena boumque forent.

54 *Hevæ & Proserpinæ collatio.*

Hevam delusit serpens ; Proserpina Ditis,
Capta dolo, vana spe specieque boni,

Exiit Heva parens Paradiso cur? quia malum

Edit: at in malo nesciit esse malum.

Inferno exisset, malum Proserpina si non

Edisset, taciti neſcia virgo mali.

Heva fuit mortis, Proserpina præda Plutonis:

Illa fuit Jovæ filia, & ista Jovis.

Utraque gustavit vetitum, pœnasque pependit;

Hæc flores, fructus dum legit illa, perit.

55 *Astrologus & Geographus.*

Dividitur totus vos inter maximus orbis;

Cœlum est Astrologi, Terraque Geographi.

56 *Ad Fanniam, nobilem, pulchram & pauperem.*

Indotata viro locupleti nubere quæris

Fannia? paupertas irrita vota facit.

Sis ortu, generosa licet, speciosaque vultu,

Sordidus externas ambit amator opes.

Prima Categorias inter Substantia sola,

Plus in amore potest, quam Genus & Species.

57 *Conscientia.*

In verbis nunc hæret Amor; non rebus, ut olim;

Penditur a sensu, non ratione Fides.

In caput adscendit quondam quæ in pectore sedit

Relligio; cerebri est, quæ modo cordis erat.

58 *Sacrificium mundum.*

Hic mundus Templum domini; crux, ara; sacerdos,

Et maestanda Deo victima, Christus homo.

59 *De peccato M. & V. Ad Christum.*

Mors tua peccati duplicis discrimina tollit;

Quod mortale fuit, crux veniale facit.

60

In Inhospitales.

Aspecta non ego sum domuum, non hospes earum,
In quarum foribus Janua limen amat.

61

Alter idem.

Aντὸς, non ἑταῖρος mihi sit, mihi qui sit ἑταῖρος:
Sit comis, quisquis vult meus esse comes.

62

Sinite parvulos venire ad me.

Lena procaxque caro juvenes in devia ducit:
Mentis at improbitas in sene major inest.
Suspisor hinc, juvenes in cœlum ascendere paucos:
Paucos in cœlum suspisor ire senes.

63

In Paracelsum.

Discipulos terræ esse salem cum dicat Iesus.
Esse salem terram cur Paracelsus ait?

64

De Ovis.

Induit humanam Persona secunda figuram:
Ovipara formam tertia sumsit avis.
Piscibus atque avibus benedixit Conditor orbis;
Vivi-paris bene non dixit, at ovi paris.

65

De Roma & Mundo.

Roma vetus quadrata fuit, mundusque rotundus;
Nunc mundus quadra est, & nova Roma rota.

66

Generatio Magica.

Illudat formosa viro quasi succuba dæmon;
Ex hoc concubitu non generatur homo.
Incubus at Serpens; mulier fit succuba: Nasci
Ex Satana soboles & muliere potest.

67

De Pane & Butyro.

INvenio nostræ veneranda vocabula linguæ,
 In Genesi (d) Bara, (e) Menin in Illiade.
 (d) Bara prima vox Genesi. (e) Menin prima
 Illiadis. Bara autem Cambro-Britannice
 panem, Menin butyrum significat.

68

Ætas Mosis & Davidis.

VIvet homo (a) centum viginti Mosche ait annos:
 Et Moses annos (b) tot super ipse fuit.
 Vita hominis (c) septem deni (dixit David) anni:
 Quod dixit, vixit, (d) septuaginta, David.
 Annos quod statuit vitæ, tot vixit uterque:
 Ergo propheta fuit mortis uterque suæ.
 Qui Mosen numerare suos, David optime Regum,
 Ille tuos docuit Te (e) numerare dies.

(a) Gen. cap. 5. v. 3. (b) Deut. c. 34. v. 7. (c) Ps. 90.
 v. 19. Psalmus hic vocatur oratio Mosis, hominis
 Dei. (d) 1. Sam. 2. cap. 5. v. 4. (e) Psal. 90.
 v. 12.

69

Numerus par & impar.

OMnis habet medium, sed dimidio caret Impar:
 Dimidium omnis habet par, medioque caret.

70

*Medici & Juris-Consulti collatio.
 Ad Galenum.*

TE formidati metuunt, Galene, Tyranni.
 Stat regum in vestra vitæque morsque manu,
 Arbitrium vobis vitæ mortisque potestas
 Summa data est, uni proxima pene Deo.
 Nos damnare neci sed non sine crimine Judex,
 Non sine teste potest; tu sine utroque potes.

71

De Grege, Rege & Lege.

Rex pastor, populique greges sunt, pabula leges,
 Æger, Grex: Medicus, Rex: Medicinaque
 Lex.

72

*Ortho-graphia, & Fides Orthodoxa,
 Ad Ebræos.*

Læva sinistrorsum, dextrorsum dextera tendens,
 Non bene Naturæ convenienter eunt,
 Tendat at in dextra si læva, aut dextera lævam,
 Concurrent geminæ convenientque manus.
 Ebræis vos ortho-graphi, nos ortho-que-doxi:
 Spiritus est noster: Litera vestra manet.

73

Pauci electi.

Solus & omnis homo cœlorum Numen adorat,
 Peccat in hoc Numen solus & omnis homo.
 Solum omnemque hominem venit servare Redem-
 tor.
 Servatur solus, non tamen omnis homo.

74

De salinis, Ambiguum.

Anglorum ingeniosa licet generosaque gens sit,
 Anglus emit parvo sal, minimoque sales,
 Sit quamvis albus Britonum sal, Gallicus ater;
 Pluris, quam noster, venditur iste niger.

75

Novitas.

Quæ nova sunt, non semper erunt nova, nulla
 placebunt
 Ergo diu, sola quæ novitate placeant.
 Non sola placuisse igitur novitate videntur,
 Sed bonitate nova, quæ placuere diu.

76

Homo non Homo.

Gignit iners natura homines; homo condidit artes;

Ars opus est hominis, non opus artis homo.

Nemo ducem sequitur Naturam; vivitur arte:

Factus homo est operis nunc opus ipse sui.

77 *Autores peccati. In Grammaticastros, Autores errorum.*

Non bene Grammatici confunditis autor & autor:

Pythagoras quicquid dixerat, αὐτὸς ἔφα.

Peccatum, infelix produxit, originis, arbor;

Unde per exemplum noxius edit Adam.

Peccati serpens autor, dux foemina facti.

Criminis Autor Adam non erat: Auctor erat.

78

Anagramma Diaboli.

Διάβολος βία δόλος,
vis, fraus.

Circuit & quærens quem devoret, ut leo, Dæmon:
Errantes animas vi, quasi ventus, agit.

Infruit occultas Satan, ut vulpecula, fraudes:

Quos vi non potuit perdere, fraude ferit.

79 *Facere & Docere. Act. 1. v. 1.*

Nuda sacerdotis docti bene credere inertem

Verba docent populum: Vivere vita docet.

Ut decuit docuit qui re sua verba probavit.

Plus malefacta nocent, quam bene dicta docent.

80

Fœnus & fors.

Sorte tua contentus abi: rem fœnore turpe est

Quærere: contentus vivo sorte tua.

81 In-

81 *Inventio veri. Ad Dubitantium,*

Dicitur invento post mille pericula vero
Pythagoras totum sacrificasse bovem,
Hinc tam difficilis facta est inventio veri;
Ut tibi sit vitulum sacrificare satis.

82 *Circumcisio & Baptismus.*

Circumcisus eras & baptizatus, Iesu
Christe; tibi neutro cum tamen esset opus,
Cui purganda parum est utrumque ad crimina; quare
Alterutro tantum fas mihi, Christe, frui?

83 *Sapientiae duae, Salomon & Jesu.*

Ponitur Apocryphos inter Sapientia libros
Utraque, semper erit, qui sapit, Apocryphus;

84 *In avaros; Vende omnia, quae habes, &
da pauperibus,*

Occidit miseros hæc Litera tristis avaros:
Quidque sibi velit hic Spiritus, usque rogant,
Spiritus hoc sibi vult, quod vos non vultis, Avari;
Pauperibus dare vult omnia: vosque nihil,

85 *In Sextum Anabaptistam,*

Visibilis sit necne Ecclesia, Sexte requiris:
Vestra invisibilis, nostraque visibilis.

86 *Exsulis solatium,*

Non extorris ero, dum vivam terraque stabit;
Nec dum terra solum dicitur, exful ero.
In caelis extra terramque solumque beatus,
Mortuus extorris, mortuus exful ero.

87 *Venator, Piscator, Auceps, Homo.*

Divitias & opes venor; laudes & honores
Aucupor: expiscor mystica: scire volo.

Dum

Dum fluitus desidero scire, superbus honores
Ambio; villis opes; inter-*ea* inter-*eg*.

88 *De iisdem.*

Discurrit canis in terra, piscisque profundo
Innatat; ad cœlos avolat ales avis.
Fertur in occultum sapiens cum pisce profundum;
Ambitiosus avi par, avidusque cani.

89 *Solacium pedestrium.*

Non equus ad cœlos generosum Castora vexit:
Nec puto Triptolemum currus in astra tulit.
Semita cœlorum est angusta, pedestribus apta:
Ambulat in lata curtus equusque via.

90 *Cera.*

Utiliter triplex ego sum, sacra, iusta, salubris:
A mystis, medicis, iuridicisque color.

91 *In quendam formosam instabilem.*

TE rex astrorum decorat, regina gubernat;
In vultu Sol, in pectore Luna tuo.

92 *De anima & corpore.*

Appellant Graji servos sua * *σώματα* quare?
Nam mens in serua libera carne latet.

* Corpora.

Corporis est dominus, dominus; Rex corporis est
rex,

Non animæ; soli noscitur illa Deo.

Corporis est genitor, genitor; mens Numine divum
Ducit ab ingenito non generata genus.

93 *De Miraculis Christi. In incredulum.*

Non tibi tanta fides, facere ut miracula possis,
Tanta nec, ut possis credere facta, fides.

94 *Testamentum vetus.*

Usque ad testantis mortem suprema voluntas
Ambulat, & nullo jure valere potest.

Ergo

Ergo Patris testamentum vetus unde vocetur,
Nescio, cum mortem nesciat ipse pati.

95

Testamentum novum.

HOc testamentum Christique novumque vocavit
Nescio, quis primus, quisquis at ille fuit.
Nulla tamen, dum testator superesse Jësus,
Testamenti hujus litera scripta fuit.

96

Errorum plena sunt omnia. Cic.

ÆGrotant Medici, fraudantur Jure-periti,
Descendunt multi in tartara Theologi:

97

Contra omnes gentes.

Condidit in terris hominem Deus unicus unum
Factus homo multos fecit in orbe Deos.

98

In Atheos.

Primus in orbe Deos fecit timor? est tamen, eheu!
Pene Dei reliquus nullus in orbe timor.

99

*Ad Mæcenatem suum, Gulielmum
Sidley, &c.*

Longævi quis non optet tibi Nestoris annos?
Vota facit vatum qualia vulgus iners.
Annum, non annos tibi plures opto; sed Annus
Hic, mea si valeant vota, Platonis erit.

100

*In Cottam, pauperem & ineptem
scriptorem.*

Sæpe novis opus esse inopi tibi vestibus, inquis;
Est opus ingenio plus tibi, Cotta, novo.

F I N I S

LIBRI SECUNDI.

EPI-

EPIGRAMMATUM

JOANNIS AVDOENI

Oxonienſis,

Cambro-Britanni,

*Ad**Mecenatem ſuum,*

ROGERUM AUDOENUM,

Equitem auratum.

Liber Tertius.

Ad Rogerum Owen, Mecenatem.

Eſt tua, virtutis ſtudium, prope propria virtus:
 Hanc tu ſponte foves, ingenioque faves:
 Alterutrum, in quocunque vides, amplecteris ultro;
 In te meſura cum fit utrumque pari.

In Ponticum, ſanum inſanum.

Proſpera te fecit fortuna ſaluſque ſuperbum;
 Cum fueris æger, Pontice, ſanus eris.

Quota hora eſt?

Viventi mors obrepit, juvenique ſenectus;
 Horaque dum quota ſit quæritur, hora fugit.

Bacchi Apotheoſis.

Vinum vera vetus promit; myſteria prodit:
 Sicca latent hominum pectora; pota patent.
 Vinum cor aperit; renes Rhenefia vina
 Scrutantur; Bacchum quis neget eſſe Deum?

In Labienum taciturnum.

Si ſapis, eſ ſtultus, cum nil Labiene loquaris:
 Sive, quod eſ, ſtultus ſis, Labiene, ſapis.

6

Fides cerea.

CRedebant nummos sine chirographo, sine cera
Sinceri veteres, nunc sine utroque nihil.

7

Ad Firmicum. De septem planetis.

SOL aurum astrologo est, argentum Cynthia;
cuprum

Alma Venus: (Veneri patria Cyprus erat)

Mercurius vivum argentum: Mars funebre ferrum;

Juppiter est stannum: plumbeus huic pater est.

Accipe de septem tibi, Firmice, quinque planetas,

Sat mihi Sol solus: Luna sat una mihi.

8

In quendam Illiberalem.

CArmina de cœlo possunt deducere Lunam,

Ex oculis Lunam carmina nulla tulis.

9

Prisatus maritalis.

NOcturnum imperium muliebri, virile diurnum
est;

Regnat enim noctu Cynthia, Solque diu.

10

In quendam.

PLuma supra caput est, & sub pede suber: utrum-
que

A capite ad calcem te probat esse levem.

11

Fides.

AStra oculos vicina, polum sed opinio cernit,

Sic oculo cœlum cerno; Fideque Deum,

12

Ad Thomam, Baronem de Ellesmer, Cancellarium Angliæ, &c. 1612.

AMissus tibi filius unus, & unica nuper

Filia: adhuc superest, unus; at ille trium

Instar, Joannes, natorum summa tuorum,

Summus adhuc superest, non modo summa trium.

13

Contentus Mundi.

Felicem vitam vis vivere? spernito vitam;

Vivit enim misere cui sua vita placet.

14 *Ad Robertum carum, Vicecomitem Rocestriae,
& Henricum Danvers, Baronem
de Dantesay &c.*

Jacobus tu quinque & tu mihi quinque dedisti:
Non temere vobis disticha quinque dedi.
Me vestro nec amore licet nec munere digner:
Si tam cara forent cætera, dives eram.

15 *Ad amicum cœlibem.*

Ureris? uxorem ducas, non expedit uri;
Conjugis in gremio mortificanda caro est.

16 *In Baldinum.*

Edidit indignos in lucem luce libellos
Baldinus, dignos attamen igne libros.

17 *Decalogus & symbolum.*

Cur credenda mihi faciendis plura jubentur?
Non tam difficile est credere, quam facere.

18 *Scientia & Charitas.*

Sunt duo noscendi, duo sunt mihi semper amandi;
Numen & ipse Ego; Numen & alter Ego.

19 *De Decis. Ad Laicos.*

Qui venit hinc fructus, fructus supereminet
omnes:

Posterior nono est undecimoque prior.

Quam bonus en Deus est sibi, qui non exigit ipsa
Plus decimo, vobis qui dedit ipsa decem?

20 *De Deo & Mundo.*

Non est in mundo Deus hoc: hic mundus in illo
est,

Hoc sumus in mundo nos; utinamque Deo.

21 *Jus decimarum & Primitiarum.*

Omega & Alpha Deus: rerum petit ergo tuarum
Jure sibi decimas primitiasque Deus.

Spes, Fides & Charitas.

SOLUS amor nobiscum intrat penetralia cœli,
 Non habet in cœlo spesve fidesve locum.
 Credendum post funera nil erit omnia cerno:
 Sperandum mihi nil, omnibus ecce fruor:
 Semper erit, quod ametur: amor post funera vivit,
 Dum Deus in cœlis ipse superstes erit.

In Polydorum.

CUI jacet in clausa nummus quasi mortuus arca,
 Argenti vivi nil Polydorus habet,

Ad seipsum.

BIBLIOPOLA tuos ambivit, Oëne, libellos,
 Dixisti pretium versibus; ille dedit.
 Excusus liber exstat; emis tua carmina nummis:
 O miser! ingenium vendis emisque tuum.

In uxorium.

CLAVUM in puppe tenes; ac te tua cymba gubernat;
 Quæ gerit hæc eadem te tua cymba regit.

Conjuges Duo in carne Una.

CORPORE mistorum nisi Cor amor uniat: ambo
 Non fiunt unus; sed fit uterque duo.

Homo solaris.

SOL semper rapido currit contrarius orbi:
 In cursu vitæ solem imitetur homo.

In Montanum.

INGENII, Montane, tui est vigor igneus. Unde
 Colligis hoc? inquis; Nascitur igne nihil.

Londinum.

URBS sterilis fructus agrorum in stercora vertit:
 Fertilis in fruges stercora vertit ager.
 Tu victum debes avido vitamque colono;
 Debet stercorebus non minus ille tuis.

30 *Ad amicum cognatum, Theodorum Prife,
Theologum.*

Semper in incerta re tu mihi certus amicus,
Ne sit amicitiae nomen inane, caves.

Quem verbis profiteri, probas tu rebus amorem:
Linguae vocali consona vita tua est.

31 *De Atbeis & Polytheis.*

Tot timet esse Deos quot fert incommoda pauper;
Esse Deos nullos sperat Avaritia.

Impietate minus, quam Copia, peccat egestas;
Ista Deos posuit, sustulit illa Deum.

32 *Soli (ci) tudo. Ad Ponticum.*

Nocte dieque aures clamoribus uxor adimplet,
Te tua sollicitum, Pontice, semper habet.

Quid superest remedi? de soli (ci) tudine tanta
Tertia dematur syllaba, salvus eris.

33 *FAS.*

Spe caelos & Amore Fideque ascendere FAS est:
Absque (f) tribus caelos his penetrare NE-FAS.

Spes laevae dextraeque Fides afficit Amori:
Virtus in medio maxima constat amor.

(f) Fides, Amor, Spes.

34 *Ad doctum & disertum Equitem, Ro-
gerum Orven.*

Esse videreris juvenis; doctissime, si vel
Surdus ego; vel Tu mutus, Oëne, fores.

Te juvenem credat nemo, nisi clauserit aures:
Te, si non claudat lumina, nemo fenem.

35 *Octo.*

Servator mundi pronunciat octo beatos:
Servatrix quatuor-bis beat Arca Noë.

36 *De primatu viri, problema.*

CUr Deus omnipotens ex conjuge condidit Evam?
 Congeneri ne se diceret esse parem.
 Si terra prognata foret, soror esset Adami;
 Seque parem fratri crederet Heva soror.

37 *Conjux.*

INferior cum sit quævis matrona marito,
 Unica cur sexum signat utrumque nota?
 Cur æque conjux vir & uxor uterque vocatur?
 Uxor enim non est æqua, at iniqua, viro.

38 *Epigramma.*

ESt nostrum, quorum est epigrammata scribere
 munus,
 Quolibet ex ligno Mercurium facere.
 Versor ego in verbis, veluti Paracelsus in herbis;
 Subjicit ille sibi res, ego verba mihi.

39 *In Paulam fœminam lectissimam.*

Miraris; quare lectissima Paula voceris,
 In medium lectus te tenet usque diem.

40 *In quendum litigiosum.*

CAusidicus si non esses, litesque creares:
 Causidicus quamquam sis, morerere fame.

41 *Lectio sacrorum.*

ET Iatro, & cautus præcingitur ense viator;
 Scripturam Herætica Catholique legunt.

42 *Ad Joannem Williams, Cambro-Britannum
 Oxoniensem, Theol. D. & Collegii Jesu
 Principalem.*

SCrutaris Tu Scripturas Veteresque Novasque:
 Janus es; a tergo quid sit, & ante vides.

43 *Ad Joannem Williams, Cambro-Brit. Cantabrigiensem, Theologum, & Collegii S. Johannis Socium.*

Ingeniosum Juvenis ne conde talentum:
Corobrum per te perpetuandus Honor.

44 *Ad Joannem Williams, Cambro-Brit. Londinensem, Regis Aurificem.*

Civile ingenium plusquam civile videtur
Jane tuum; plus, me judice, cive sapis.

45 *Ad eosdem.*

Tres mihi cognati, mihi vos tres estis amici,
Tres Jani, vester sum quoque Janus ego.

46 *Ad Creditorem.*

Est tibi, qui debet servus, qui solvit, amicus:
Debita qui non vult solvere quid? Dominus.

47 *Veritas in profundo. In fucatam.*

Falsa patent, at vera latent; in te patet istud;
Nam faciem fictam, cætera facta geris.

48 *In Phyllidem.*

Das gratis; at Phylli negas tamen oscula gratis;
Ingratum & gratum est, quod dare Phylli soles.

49 *Gravitas & Levitas.*

Sint gravitas levitasque sibi contraria quamvis;
Sic grave nolo meum, sit leve nolo caput.
Quorum utrumque malum est, odi contraria;
conjug

Sic mihi nolo levis, sit mihi nolo gravis.

50 *In garrulum, morbo colico laborantem.*

Lingua loquacior est, cujus taciturnior æquo:
Illa loquendo homines, ille tacendo necat.

51 *In Theologastrum sopbistam.*

Quid tibi neglecta virtute scientia prodest?
Desine jam verum quærere: quære bonum.

52 *Actio & Passio.*

Qui mala multa facit, patietur multa vicissim;
At mala qui patitur plurima, pauca facit.

53 *Resipiscentia & Reminiscentia.*

Me miserum meminisse dolet jam, quæ mala feci;
Plurima quæ passus sum, meminisse iuvat.

54 *Damnatus.*

Tristis, & undecimo tua par fortuna Decembri;
Post lucem sequitur nox tibi longa brevem.

55 *Beatus.*

Undecimo Juni tua par fors læta videtur,
Post noctem fulsit lux tibi longa brevem.

56 *Felix & Festus.*

Infestus tibi Paule fuit sanctissime Festus,
Infelix Fœlix, & tibi Paule fuit.

57 *Democritus & Heraclytus.*

Temporis iste sui casus & crimina flevit;
Risit stultitiam temporis ille sui.
Semper erunt miseri mortales, semper inepti,
Hic ut in æternum rideat, ille fleat.

58 *Semper* { *Idem*
Eadem
Idem.

Spes eademque Fides sit semper, Amorque sit
idem,
Ingeniumque tibi sit sibi semper idem.

59 *In ignorantem arrogantem, Linum.*

CAptium, Line, te tenet ignorantia duplex:
Scis nihil, & nescis te quoque scire nihil.

60 *In Poëtam Mævium.*

A Non-ente malum, Mævi, nil discrepat: ergo
Plurima cum facias carmina, nulla facis.

61 *Helenaë & Penelope.*

TYndaris Iliadem fama super æthera vexit:
Implet Odysseam gloria Penelopes.

Penelopes Helenaë morientur nomina nunquam:
Hæc quoniam voluit, noluit illa, rapi.

62 *Vita.*

Vitam sic texit Natura, ut aranea telam:
Longus, at in lapsum pronus, uterque labor.

63 *In Paulam.*

USuris vir Paula tuus, tu corporis usu,
Vir victum quærit fœnore, tu femore.

64 *In avarum parcum.*

NII Numerare juvat, nihil Addere semper acervo,
Multiplicare nihil; divide, dives eris.

65 *Veritas & Virtus.*

NUnquam tam pauci, quam nunc bene vivere
discunt;

Nunquam tam multi, qui docuere viam.
Credendi docuere vias, hoc tempore multi,
Qui docuere vias, non docuere viam.

66 *Scriptores hujus sæculi.*

CArpinus extremas voces & verba priorum,
Priscorum, qui nunc scribimus, Echo sumus.

67 *Tres Rectores Mundi.*

Theologus sapiens sit, ut omnibus omnia fiat:
Juridicus prudens sit, Medicusque sciens.

68 *Votum Auctoris.*

Nec paupertatem nec opes desidero magnas:
Nolo Parum: Nimium non volo; Sat mihi
Sat.

69 *Libri prohibiti.*

Nitimur in vetitum semper cupimusque negatum,
Uxor amatori fordet, amica placet.
Deformis, dum servatur, formosa videtur;
Sic vetitus pulcher creditur esse liber.

70 *In Festum.*

Cum tibi sim per Fidus ego, mihi perfidus es tu:
Cur ita? respondes; Proximus ipse mihi,
Proximus esto tibi; nollem mihi proximus esses;
Cur ita? vicinos non amo, Feste, malos.

71 *Pseudo-ecclesia.*

Se sponsam Domini quæ non ecclesia jactat;
Pars tamen istarum quanta meretriculæ?
Si non mentitur sibi pseudo-ecclesia plures
Uxores Christi quam Salomonis erunt.

72 *In Decianum.*

Mundus, ais, malus est; cum sis tamen unus
eorum,
Quorum opera mundus fit, Deciane, malus.

73 *In Dindymum.*

Baccalaureus es verita jam Mœchus in arte,
Dindyme; cum fueris Leno, Magister eris.

74

Ad G. T. 1606.

Servi discipulus cum sis dominusque magistri,
Felix es dominus, discipulusque miser.

75

Ragion di Stato.

Regnum Juris erat recti respublica quondam:
At nunc jus regni, regnat ubique novum.

76

In quendam crucigerum Hypocritam.

Esse crucifixi juratus creditur hostis
Belzebug, & visæ vertere terga cruci:
Non tamen iste crucem fugit impius Angelus
omnem;

Et tibi nam (g) Crux in pectore, corde Satan.

(g) La Crux en los pechos.

Y el Diabolo en los bechos.

77

Christi vita & mors.

Multa tulit pro me Christus fecitque: probavit
Perpetiundo hominem se; faciendo Deum.

78

Stella Magorum.

Stella Mathematicis incognita, duxit euntes
Ad Christum magnos ex Oriente Magos.
Invenere Magi Dominum duce fidere fido;
Ad Christum ducat me, mea stella, Fides.

79

*Vitulus aureus a Mose confractus. Exod.**c. 32. v. 10.*

Quem facer ex aturo vitulum conflavit Aaron,
Non finis in magnum crescere Mosche
bovem.

80

Triumviri.

Immodicus Medicus, Legistaque vivit ut ex lex:
Quid sunt Theologi? nil nisi Theo-logi.

K 6

81 Ad

Liber in historia loqueris? nocet esse locutum;
Admisces falsi nil? tacuisse nocet.
Diffimulans simulansque sibi per omnia dispar,
Qui volet historiam scribere, servus erit.

Lascivi propter peccata pudenda caloris,
Improbis in gelida mergitur orbis aqua.
Peccatum propter gelidum frigentis Amoris,
Restat, ut hunc mundum devoret ignis edax.
Per sua sic morbos medici contraria curant:
Algor iners flammis vincitur; Ardor aquis.

Nil Evangelicum tibi debeo præter amorem;
Præter Apostolicam nil tibi credo Fidem.

Nullum vult salvum fieri Dæmon; Deus omnes,
Personæ acceptor nullius ille, nec Hic.

Poenam malum post facta manet, sua præmia justum,
Alter quod sperat, quod timet, alter habet.

At tale, sacra piæ miscenda Theorica Praxi,
Sanctorum vitas perlege: Fac simile.

Te sine nil video, sapio nil: Tu meus es Sol
Solutus, Tu mens es Sal, mea sola Salus.

Magna quidem virtus hummis est posse potiri;
Scire uti, major; maxima, velle frui.

89 *In scriptores hujus seculi.*

Scribendi fatuos tenet insanabilis error:
Sat sibi, si quod non sunt videantur, habent.
Dum temere sibi quisque placet, mortalia scribit:
Raro placet aliis, qui placuere sibi.

90 *Paradoxon.*

Descendat tristem licet Atheus omnis in Orcum,
Nullus in inferno est Atheus, ante fuit.

91 *In Gaurum.*

Laudas Gaure nihil, reprehendis cuncta: videto
Ne placeas nulli, dum tibi nemo placet.

92 *Ad seipsum.*

Scire velis Odoëne, quotus tibi restet amicus?
Pondere non numero discute, certus eris.
Calculus & digitus numerantem sæpe fefellit;
Sic licet ignis, habet non leve pondus amor.

93 *Regis & Tyranni discrimen.*

Quid jus sit, Rex, atque pium, considerat æquus:
Quid jussit, memori in mente tyrannus habet.
Jussa boni Regis precibus præpono tyranni:
Cum rogat iste, jubet; cum jubet ille, rogat.

94 *In quendam.*

Sultorum *Bed-lem*, nebulonum Regia *Bried-wel*,
Utram harum mavis, ingrediare licet.

95 *Mater Ecclesia.*

Vos estis Christi fratres, ego sponsa salutor,
Fratria sum vobis: cur vocor ergo parens.

96 *De sectis.*

Sensus quinque homini veteres tribuere Sophistæ,
Tres animas: Animos quis numerare potest.

Cunctorum posuit Moses in sanguine vitam
Legifer: In Christi sanguine pono meam.

98 *Ad Thomam, Baronem de Ellesmer, Angliæ Cancellarium, consolatio de obitu Mariæ unice filia, optima scemina. 1612.*

Quis dubitat, Nestor quin plurima, Nestore plura
Fleverit annosus funera Mathusalem?
Nemo diu vivit, videat quin crebra suorum
Funera: Felices tristitia multa vident.
Crebra tuæ doleo, videas quod funera prolis;
Gaudeo, quod funus non videt illa tuum.

Scripsisti æternos, si fas mihi dicere, libros:
Fine carent libri principioque tui.

100 *Ad tres Mæcenates, Eduardum Noel, Guiljelmum Sidley, & Rogerum Owen.*

Certatis semperque precor certare vicissim,
Mæcenas vestrum fit mihi summus uter.
Hanc litem inter vos (Litem sine lite) fovebo:
Nec vinci quemquam, vincere quemque sinam.
Non dedit hæc vobis pia concertatio damnum;
Cessit at in nostrum Lis generosa lucrum.

Mortuus est flendus lachrymarum flumine prin-
ceps,
Spes Britonum, Patris gloria, Matris honor.
Cui fratrem præter germanum, nemo secundus,
Præter germanam, nemo secunda fuit.
Vivus honoratur Princeps, extinctus amatur.
Gentis Honor & Amor, dum fuit ille, fuit.

Hæc ego dum madidis mecum meditarer ocellis,
 Salsa mihi e gemino guttula fonte fluit,
 Non ignare mali Lector, mihi credito, fletu
 Sermonis cogor rumpere fila; Fleo.

102

Ad ejusdem Manes.

TU mihi curasti numeranda stipendia nuper
 Annua, sublatum est hoc mihi morte tua,
 Hac vellem te lege tamen superesse Britannis,
 Adderet ut rebus nil tua vita meis.
 Nil prodesse potes mihi nunc, Tibi nil ego: gratum
 Quis tamen in cineres me vetat esse Tuos?

103

Ad eundem.

TU *(b)* mihi Cæsar eris, nuper tibi carmine dixi:
 Heu mihi dicendum nunc mihi Cæsar eras!
(b) Epigr. i. lib. i. ad E. Noel.

FINIS
 TERTII LIBRI.



APPEN-

APPENDIX
EPIGRAMMATUM
JOANNIS OVVENI.

- 1 *Virtus.*
PRæter virtutem nihil immortale tenemus;
Mens manet & virtus; Cætera mortis erunt,
- 2 *Fides Christiana.*
OMnis nostra fides pendet ab historia.
- 3 *Regula vita.*
ESto multorum, soli tibi notus amicus;
Et quod vis alios ipse filere, file.
- 4 *De modo faciendi lapidem Philosoph.*
NEscio, vel si forte scio, me nescio scire:
Quod scio, Socratice me scio scire NIHIL.
- 5 *De Rosa.*
QUo nares perfundat, habet Rosa suavis odo-
rem:
Quo contrectantem pungat, acumen habet.
- 6 *Ad Effigiem Dn. Thomæ Egerton, Baronis de
Ellesmer, Angliæ Cancellarii.*
Virtutis quicumque oculo vis cernere formam,
Ecce tibi Virtus hujus in ore Viri:
Libertas quanquam pictoribus atque Poëtis
Audendi semper quidlibet æqua fuit,

Carmine mentitum nihil hoc liquet esse Poëtam,
Mentitus nihil est Pictor in arte sua.

7 *De Jos. Scaligeri discessu ex Gallia.*

Ablentem nunc Gallia Te desiderat unam;
Dum tua Te tenuit Gallia, nullus eras.

8 *Ad Jacobum Petzerum, I. C. Patritium
Noricum.*

Fluxarum contemtor opum, cupidusque videndi
Vera per omne solam, mira per omne salum,
Impiget extremum currens PETZERUS ad axem,
Per terram æternas & mare quærit opes.

9 *Ad Joachim. Morsum.*

Mors Jus

Non habet in te.

IN libro, Joachime, tuo mea nomina scripsi;
Dignus es in libro nomen habere meo.

10 *De Thoma Farnabio, commentatore Se-
neca Tragedi, ad Lectorem.*

Qui tantum modo lectus erat lectissimus Autor,
Nunc intellectus, non modo lectus erit,
Suspensum Senecæ te littera nulla tenebit,
Farnabii dum te spiritus intus agit.

11 *De Thoma Pantfchmanno.*

GAllinas pingues, perdices, & phasianos
Divitibus mittis, pauperibusque nihil.
Mittere personæ vis convenientia cuique,
Mitte cibos miseris, divitibusque famem.

12

In Gulonem quendam.

HAufisti quos ferre tuus quit pocula venter;
Pocula non lædunt paucula, multa nocent.

13

Nobilitas cujusdam Hugonis.

CUm sis vir nihili, vis nobilis, Hugo, videri
O Hugo nugo, nobilis es nebulò.

14

Onus Ebrii.

PEr varios haustus, & per tot pocula Bacchi
Tendimus in lotium.

15

Focus D. Oweni.

JUvenis oritur, conjugatus moritur,
Viduus resurgit, Phœnix alter.

Ad hunc ita alludit Paul Stocmannus.

INvito vitam, mortem, redivivaque membra,
Cernere si culpas; hoc Epigramma legas,
Cælebs es? vivis: moreris sociate: resurgis,
Si viduus. **MORSIO** cautus **OWENUS** ait.

16 *Morabantur simul in diversorio Londini Jac. Fetzerus, Joach. Morsius, & Matthias Lejus. Ad hos cum viseret Owenus, præsentia ejus ita gratulatur Fetzerus.*

HOc erat in fatiis, at numine fata reguntur,
Quod nos conjuncti tres in amore sumus.

Cui responsum ab Oweno:

Ultimus hue veni: ter tres heic ante fuistis;
Non tamen ad Musas venit Apollo novem.
Fetzerus iterum:

Ad Musas gratus venit Apollo novem.

17

Owenus de cælibatu suo.

IPsa mihi quamvis uxor sapientia detur,
Uxorem nolo ducere, mundus ait.

At Martinus ait ; sine conjuge vivere nolo,
Ipsa licet conjux sit mihi stultitia.

18

Ad M. L.

TU duc stultitiam ; mihi sit sapientia conjux ;
Tu regito uxorem : Me mea nupta regat.

19

Imitatio hujus Epigrammatis.

ET si sponte mihi sapientia nubere vellet,
Uxorem nollem ducere, mundus ait.
Conjuge, stultus ait, non vellem sponte carere,
Præsto licet conjux sit mihi stultitia,
Ast ego malo meis, quam istorum sensibus uti :
Non bene mundus ait ; non bene stultus ait.
Sit tibi Stultitia, ast mihi sit sapientia conjux :
Illa tibi magis, hæc sed mihi nupta placet.

M. MATTHIAS LEIUS,

Arvillariensis.



Nobi-

Nobilissimi

D. JOACH. MORSII

EPISTOLA,

Ad V. Cl.

D. OWENUM, &c.

Celeberrime Domine Owene, fautor & amice pl. observande.

Cum in Britanniam Vestrum abeat nobilis & præclarus Vir GOTFRIDUS HEGENITIUS noster, charissimum Phæbo & Musis caput, committendum mihi non putavi, quin ad te scriberem, memoriamque tibi suavissimæ illius conversationis recen-
tarem, qua me & JACOBUM FETZERUM, Patritium Noricum, annis aliquot retro, sæpius apud vos beasti. Nunquam singularis tua pietas, eruditio incomparabilis, ac virtutes eximie effluere ex animis nostris possunt: quarum nos nullibi non apud optimum quemque præcones grati vivimus.

Certe nulla dies elapsa, quod non cum presentium exhibitore amicissimo (quamdiu Hamburgi commoratus fuit) sermones honori-

norificos de te habuerim: vel potius in de-
 prædicatione immortalium tuarum laudum
 cum eo non certarim. Si quis enim in Ger-
 mania, qui nobiscum Te summopere admi-
 ratur, & justo æstimo ob divinas ingenii
 tui cœlestis dotes colit, hic ipse est: quem
 æternum tuæ præstantiæ obligaris, si ejus
 fidei & amori concredes nova quedam in-
 edita tua Epigrammata, Thespiadum in
 æde locanda. Quod ut facias, eumque tua
 benevolentia & familiaritate digneris, non
 solummodo ego cum illo, sed & melior pars
 cordis nostri FETZERUS, post longin-
 quam peregrinationem suam, per omnes
 prope totius terrarum orbis plagas in pa-
 triam redux (ubi jam consiliarii & legati
 munere fungitur,) unice nobiscum te obte-
 statur.

Nihil enim aureis tuis versiculis venu-
 stius, nervosius, argutius, & doctius uspiam
 reperitur. Non tantum provocasti omnem
 ubique Antiquitatem: verum & longe la-
 teque illam in specimine hætenus publica-
 torum superasti, in quo nihil vastum, inane,
 turgidum; nihil dissolutum, exsangue, vel
 spinosum, atque abhorrens a noto genere &
 modo loquendi: sed cuncta pressa, apta,
 pudica perspicua & scite conspersa sali-
 bus,

bus, jocos, lepore, ac naturali sua pulchritudine exsurgentia, existunt: sic ut iis nihil addi, nihil demi queat. Vale decus seculi nostri; & me veteri tuo affectu orna, in ejusque testimonium me aliquando politissimis tuis literis & carminibus invise. Dabam cursim Hamburgi, anno ære Christianæ MDCXXVII. exeunte Junio.

Subitanis inclusi hisce ex Epigrammatibus D. HEGENITII, quod superioribus diebus in honorem vestrum scriptum mecum communicavit. Peto ut illud cum meis extemporaneis & inconcinnis, tua humanitas egregia benigno vultu excipiat.

G. HEGENITII

In Laudem

MARTIALIS

BRITANNICI

EPIGRAMMATION.

Vulgus opinatur, sat laudis habere Poëtam,

Qui sciat immensis fundere metra logis.

Ecquid OWENE putas? Tua quod MELE-

TEMATA filo

Sint contexta brevi, laus erit inde levis?

Non

Non Puto. Namque tua sophos in brevi-
tate nitescit,
Nec labor iste levis, taliter esse brevem.

A L I U D.

Nescio cujus.

QUantum Biblico debet sua patria vati,
Tantum pæne Tibi patria debet
humus.

Nemo Tibi arguto, facili, puroque, bre-
vique

Scribere par poterit tale Epigramma stylo.

Sed explicet elogium OWENI; Elegis
mage & inferiis memoriam defuncti fas
esset prosequi. Nam ille nobis heu pro
novem Musis, novem has litterulas ultima
voluntate reliquit, SEQUIMINI.

Imo habe, Lector, & cogita, nos ordi-
ne, quem DEUS ac Natura jusserit, cun-
ctos secuturos.

TANTUM EST.

Supplendæ chartæ hæc adji-
cere visum fuit.

Cum virtuti suus debeat honor, quem,
invito quolibet, ipsa sibi vindicare pot-
est, lubentissime testatus sum, ac testor, Vi-
rum

rum egregium, GOTFRIDUM HEGENITIVM, F. U. Candidatum, quemadmodum in aliis Academiis ita vixit, ut primorum celeberrimorumque hujus aetatis virorum benevolentiam amoremque, quod in rebus humanis primum est, sibi conciliaret, eundemque assiduis officiis meritisque tueretur; ita in hac nostra, in qua aliquamdiu versatus est, ita se gessisse, ut quantum vel in aliis profecerit, vel ex hominum magnorum amicitia ad virtutem lucrifecerit, vel in aulis Principum, in quibus versatim intelligimus, didicerit ac observarit, quotidie re ipsa atque usu probet, ita ut tum morum probitate, tum vero eruditione, atque imprimis Juris Utriusque, in qua aliquamdiu, etiam publice, se exercuit, peritia omnibus se approbarit.

Lugd. Bat. Anno 1629.

3. Jan.

DANIEL HEINSIVS.

FINIS.

Pal. 8. 7. 2



